



ДАГЪИСТА
ХАЛКЪАНАЛА
КУЛЬТУРА ВА
ГІЯДАТУНИ

4

Рамазан МяхІяммадов

ДАГЪИСТА ХАЛКЪАНАЛА КУЛЬТУРА ВА ГІЯДАТУНИ

4-ибил класслис

*Дагъистан Республикала Багъудила ва гІилмула
министерстволи тасдикъбарибси саби*

КІинайс дураибси



Махачкала
ООО «Издательство НИИ педагогики»
2008

УДК (391+811.35)
ББК 63.5(2Р-6Д)+81Д3(дарг)
М12

МяхІяммадов Р. М.

М12 Дагъиста халкъанала культура ва гІядатуни: 4-ибил кл. — /ДР-ла Багъудила ва гІилмула министерстволи тасдиқъбарибси саби — Махачкала: ООО «Издательство НИИ педагогики», 2008. — 168 с.

Магомедов Р. М.

Культура и традиции народов Дагестана: 4 класс.

УДК (391+811.35)
ББК 63.5(2Р-6Д)+81Д3(дарг)

Жуз балкъаахъес гІяхІти насихІятуначил кумекбарибти педагогикала гІилмуртала кандидатуни Ш. А. Мирзоевлис, С. М. ХІяжимурадовлис, рецензия белкІунси МяхІячкъалала 11 ибил школала учительница ГІ. Р. ГІялиевас, материал газетализи кабяхъибхІели, ил ункъбарести пикрумачил кагъурти музадухъахъунти «Заманала» бучІантас авторли баркалла балахъули сай.

4-ибил классла бучІантас гъалабихъибси Дагъиста узити халкъанала гІядатуначила жузлизир чедаахъили сари лебтанилра цаван дузахъес гІягІнити дубурлантала рухІла давлалди диубти чихъти адамдешла пергерти гІядатуни.

ISBN 978-5-94328-245-4

© Магомедов Р.М., 2002
© Издательство НИИ педагогики, 2002
© ООО «Издательство НИИ педагогики», 2008

АССАЛАМУ ГІЯЛАЙКУМ, ХІУРМАТЛА УЧІАН!

ИшбархІи хІуни Дагъиста халкъанала пергерти гІядатуначила школала бучІантас хІядурбарибси гІядатла ахІенси цаибил жуз някълизи кайсулри. Даршани дусмала манзиллизир кадизурти нушала хала бегІтала гІядатуни биалли миллатла мекелли халаси ва дурхъаси давлаличи шурдухъун. Сен хала бегІтани нушаб букъурдарибти гІядатунала илгъуна мурхъси ва хъулчиданси къадри лебси?

Галга мякъи агарли хІебухъуливан, халкъ гІядатуни агарли хІербиэс хІебирар. ХІячмазибад къяббердибси галга буръни ашкарси саби. Чула хала бегІтала гІядатуни хъумартурси миллатлара я ишбархІила игъбар я талихІчеб челябкъла хІебирар. Илбагъандан гІяхІти, гъаркъяти гІядатуни хъумуртес бехІбихъни миллат букъбулънила ва пасатІбирнила бехІбихъуд саби. Духули бурули бирар, убла ибсиличила къайгъи миллатла шаласи челябкълаличила къайгъиличи шурбулхъан или. Ил сабабли хІяна дусмала рухІла къиматуни детхІехъахъес багъандан, илди лебтанилра далес ва детурхахъес гІягІнибиркур.

Нуша дахъал миллатунар улкализир хІердирулра, ва нуша нушала рухІла давлала хІурматбирес бурсихІедиахІелли, нушазиб царалти миллатунала гІядатуначира хІурмат-хатир ахІелкІан, илди мучлаагардирес, далтІес дехІдирхъехІе. Ил биалли рухІла къарциндешличи ва миллатуни-ургарти къижъалаличи бархъси гъуни саби. ВегІла гІяда-

туни хъумартни халкъ миллат сабливан бетихъ-
ниличи ганз саби.

Вава мицІирси жагадеш саби, илини галга ва
алавла жагадиру. Дубурлантас биалли мурталра
къугъадеш дигахъу. Амма илдани галга жагати
вавни сабабли хІебирар убалтусину мурити цІедеш
багъандан бирар. ТІабиГІятлизиб вава цІедешличи
шурбулхъан. Вавнани галгаван багъудлумани адам-
ра жагаиру. Галгала вавни цІедешличиван, хала
бегІтала гІядатуначила бучІантала багъудлуми ил-
дала гІяхІти баркъудлумачи чараагарли шурдухъес
хІяжатси саби: гІядатуначила багъудлуми лерли,
гІяхІти баркъудлуми агарси адам — вавни лерли,
цІедеш хІедахъуси жугъан галгаличи мешуиркур.

Илбагъандан Дагъиста узити халкъанала дур-
хъати гІядатуначила хІела багъудлуми хІела гІяхІти,
жамигІятлис манпаГІятти баркъудлумачи шурду-
хъаб, хІела гІямрула кабизли ва бетуцли детааб.
Илдани хІу бегІтала хІулбукІрилис ва шантала
пахрулис кайзурси дарган ва урибси багъадур
ветаахъаби.

ХІези, хІурматла учІан, ца гъатІи насихІят бу-
рулра: иш жузла гъарил дарс хІуни бегІтачил барх
белчІен, ва ил белчІунсиличила хІуша дарх пикри-
дахъеная. Ва гъар бархІи гІяхІти баркъудлуми
дирен.

ХІушала бегІтас, хІушаб арагІер гІямрулизир
арадешра, талихІра, халати сархибдешунира,
мурхъти багъудлума, гІяхІги баркъудлума
диубли дигули, жуз белкІунси.

Рамазан МяхІяммадов





НУШАЛА ВАТІАН

ВатІан
селичибад
бехІбирхъуси

Гъарил жаниварла ва арцанна пукъа бирар. Гъайгъай, илдала гъариллис сунела пукъа дигахъу. Гъала хІеблизиб гъарахъти улкназибад

чатІа бархъли сунела пукъализи чарбулхъан. ГечдикІути арцантала тІабигІят илгъуна саби.

Гъарил адамлара шилизиб яра шагъарлизиб сай акІубси ва хІерируси хъалира дигути бегІтира бирар. Гъариллис сунела бегІти, сай акІубси ва дурхІядеш деркІибти мер-муса дигахъу. Илис илди мурталра дурхъати дирар. Адамла тІабигІят илгъуна саби.

Нушаб ВатІан нушала бегІтачибад, нуша акІубти дурхъати мер-мусаличибад бехІбирхъур. Гъарил адамлис вегІла ши, вегІла район, вегІла улка — цараван буралли — вегІла ВатІан дигахъу. ВатІайчи кахІедурхути дигиличила назму хІебелкІунси цалра (шыгІир) поэт хІергар. Даргала машгъурси поэт Рашид Рашидовли, лебил дубурлантаला пикруми иргъахъули, ВатІайчила ишкъяйда белкІун:

ХІед ну далайхІейкІули,
ГІур чис далайикІиша?

БегІтира ВатІанра чеббиркІути ахІен. ВатІай нуша агарлира гІямалбиру, амма нушани ВатІан

агарли, селра барес хІедирехІе. Илбагъандан гъарил-
ла чебла саби ВатІайс даимти мардеш дихІни, ил
даимал чебяхІбирни ва мяхІкамбирни. ХІяздан ахІен
ВатІайс неш-ВатІан бикІути, ил нешван дигахъули.
Дубурлантас тарихла бухъянси манзиллизиб чула
ВатІан дурала улкнала гъармукабазибад ва чяб-
хъинчибазибад берцахъес чуйна дявила ярагъ касес
хІяжатбикѳба? Илбагъандан сари дагъѳстанлантани
гъабзадеш мурталра дебели ахъли къѳматладирути.
Илдигъунти шуртІразиб саби дагъѳстанлантала иш
бурала акІубсира: «ВатІан багъандан вебкІибсила у
хІеубкІар». Ил бурала, хІяжатдикибхІели, ВатІан
багъандан жан къурбандарахъес жамигІятла жи
бетаур. Чум гъабза алхуна азирти дусмазиб дигуси
ВатІа азадеш ва хъархІерагардеш багъандан?
Илди «хІунтІен булгъарла чакма дицІайчи хІунтІен
хІили» бургъутири ва чедибиркутири, улхутири,
амма мутІигІхІебикІи. Бургъи илди «даршлизи
ца улхъули». КІарахъала Гъѳдатлила жамигІятла
гІядат хІясибли, дявила вайгъабзачирад хъунул
аррукъес ихтияр лебсири. Даргазивра илгъуна
мучлахІейрули, «Ит хъунча сай» бикІар. Ил
биалли адамлис, илала дурхІнас ва хъалибарглис
бархли халаси цІахдеш саби. Дубурлай гъабзадеш
бегІ гъалар, ВатІайчи диги мардирули, чедаахъес
гІягІнисири. ВатІан-гІядатла дев ахІен.

ВатІанна ЦацабехІ адамтас, хІянчизартас бузес ва
жи къуллукъѳбирес урхІла мер-муса къадар-
дирар. Амма илаб чус яшавлис шуртІри
сецад къулайли, илартѳ мер-муса сецад къугъати
диалра, ахирра илди дурхъаси ВатІа жили чула
дурхІядеш деркІибихІи чарбиру. Ил жили саби

шагъарлизи гечбиубти замана-заманаличиб чула шимази, чула бегІтала мер-мусаличи битІикІути.

ГІяхІцад дагъистанланти дурала улкназиб хІербирули саби. Илди дурала улкнази 50-100 дус гъалаб гечбиуб. Илдазивад ца гъалавван бегІтала ВатІайзи чарухъун. Самолетличивад кацІибхІели ил кьукъубачиикиб, ва ахІерси ванза байбариб. КІинайс ил ахъиуб ва, зубразидяхІ някъби ахъдуцили, тІамадариб:

— Дагъи... Дагъи... Дагъистан!

Илдигъунтани бурули бирар: «ВегІла ВатІайзивад къябвердибсилис ВатІа шуркъ дархли мури-тили гъанарар».

Дагъиста халкъанани ВатІан, вегІла ВатІайчи диги черяхІдирути ва гапдирути дахъал буралаби акІахъуб: «Нешла хІурматхІебирусини ВатІара хІурматхІебиру», «ВатІан агарси адам дуклума агарси арцангъуна сай», «УрхІла мерличив шагъ виэсичив вегІла ВатІайзив садакъачи виъни къу-лайси саби», «Нешлизивад мяхІрумиубси гъачам цІуръа, ВатІайзивад мяхІрумиубси — вецІна».

Нушала ВатІан Дагъистан саби.

Нушала
ВатІан — Россия

Дагъистан Россияла ца бутІа саби.
Россиялизир хъархІерагарті 21
республика лерти сари:

Адыгея республика
Алтай республика
Башкортастан республика
Бурятунала республика
Дагъистан республика
Ингушунала республика

Кабардинтала ва Балкартала республика
Калмыкунала республика
Карачайтала ва Черкесунала республика
Карелияла республика
Коми республика
Марий-Эл республика
Мордовияла республика
Саха (Якутия) республика
Северная Осетияла республика
Татарстан республика
Тува республика
Удмуртия республика
Хакассияла республика
Чечентала республика
Чувашунала республика.

Илди Россиялизи кадурхути миллатунала республикаби сари. Илдала дурарад Россиялизи кадурхар урусла дахъал областунира крайтира. Илкъяйда, араҕеб Россия нушала ВатІан саби. Россияла тахшагъар Москва саби.

Ца ВатІа лебилра халкъани ца хъалибаргван уржили ва цабалги хІербиэс чебиркур.

Дугъбала баян.

Тарих — история

Булгъар — гъалаб чакма дарес хасси тяхІярли хІядурбарибси хурумла ца жура.

Хурум — хасси тяхІярли хІядурбарили, имцІаливан чакмалис хІядурбарибси гули.

СУАЛТИ ВА ХІЯНЧУРБИ:

1. Селичибад бехІбирхъуси ВатІан?
2. ВатІан багъандан дургъбазиб алхунти хІушала шантала уми гъандикахъая. ВатІа ЧеряхІти дургъбазиб хІушала чум шан алхуна?
3. ВатІайчила хІушани сегъунти буралаби дагъуррая?
4. Адамлис вегІла мер-муса дигниличила бурая. Илди дигиличила хІушани сегъунти хабурти делчІунрая?
5. Ца ВатІа миллатуни сен уржили ва цадалги хІердиэс гІягІнити?
6. Картализир Дагъитан ва царалти республикаби даргая. Илдачила хІушани се баладая?
7. ВатІайчи диги чедиахъути гІергъити белкІани делчІеная.

Къ. Мигърабов

ВатІан

ВатІаннис адам сай гІягІниси хІекъли,
Адамдешли уркІи гарчли бицІибси,
Мас-хазналис, лявлис, хупІ-кІучІла мекълис
Ламус-хІая бекІлил дирцхІедирцуси.

Адамлис ВатІан саб гІягІниси хІекъли
ГІямрула гІеркъаси — къантІси жуз белкІес,
Гъунила дубличиб цІелда катІахъес,
Мурхъси къадализиб шинкъан тІашбатес.

ВатІанни сай инсан бурсиварибси,
Лигуби дялчалра, мутІигІхІейкІахъес,
Чедибдешличи хъул даим бихІяхъес.
Адамли саб ВатІан бурсибарибси,

Лигубала мехІе садилтІаллира,
КъянахІебирахъес бурибси гъайлис.

ГІ. Абу-Бакар

ВатІан

Чуйнара набчи чебуркъубсири камси заманалис
яра вахъхІи дурав кали, дила ВатІайзи чарухъес,
ва гъар чуйна чарулхъаслира, дила уркІи дебали
гъалаксарули бирар.

Гъанбикесли бирар, ванза гъар чинабалра
цагъуна саби, чинар-дигара дубурти ва вацІурби,
гъатІира жагати урхъу дубани чедаэс вирар или.

Амма адам мурталра сай акІубси мерличи,
хала бегІтани белкахъунси ва дунъяличи хІеризес
багъандан, вегІлира бегІ гъалаб ахъибси унабурхІ
лебихІи, гІур тикрархІедиэсти гардла далуйти ди-
къули калунси мерличи къалабаикІар.

Дила ВатІайчила ну пикриикІулра. Ца Дагъис-
тан ибси девлира адамла уркІилизир хІябилра да-
хъал пикруми алкІахъули къалли! Адамла уркІи
сунела ВатІайчи, сунела ванзаличил бархбасунси
гъар секІайчи разибирес ва пахрумабиркъес гІягІ-
нисира саби.



Жагаси у Гъарил адамла, дубурла, хІеркІла,
урхъула, шила ва пачалихъла у бирар
Нушала улкала у пергерси ва хамси саби —
Дагъистан! Илала мягІна «дубуртар улка» ибси
саби: дагъ — «дубура», стан (истан) — «улка». Ил
у нушала узити халкъанала тухумти мезаназиб
дебали жагали ва уктемли зайбикІар: кІарахъала
мезли — Дагъистан, дарган мезлизиб — Дагъистан,
къумукъунала мезлизиб — Дагъыстан, лезги мезли-
зиб — Дагъустан, булеги мезлизиб — Дагъустан.

Дагъиѣстан хІейгахъес хІейрар. Ишаб, чина хІеръалра, хІулбала хІер касеси жагадеш чебиур. Ахъти дирихъмази ва гъагултази дургъути дубуртала дахъдешли, илдала хамси ва гъайбатси кабизли чи-дигара хІяйраниру. Илди зубрази бургъуси ца лацличи шурдулхъули сари. ГъатІира ахълир, къалайли цІубдарибтиван, хабарла магъила хІурхъи чедиур. Илди ахъанайтани адамла уркІилизи нахру, чулагъунти кагибдеш, уктемдеш, къуват сахаватли картІули сари.

Ахъти дубуртани ахъти адамдешла халкъани
абикъур.

Дубуртала мер-мерличир шинишли чедиули

сари вацІурби ва унхъри, чунира дубуртала бяхІяни гьатІира жагадирути.

Дубуртала къадурбани, илдала мурхъдешли хІерикІусила уркІи кахбиргІяхъу. Ила берхІила нуруни кадиули ахІен, илар даимти хІябцдеш ва цІябдеш сари.

Удирван, дубуртала хъарлар, диркъбикуни сари, дегІнуби, адамла някъла ванадеш хъумхІертути тІутІила унхъри сари. ГьатІира удиб хІяна Каспи урхъу саби, бурямхІели, жиндралабиубси арсланван кахси ва къуватси, паргъатси аргълизиб биалли бушинбиубси житала дурхІяван малхІямси ва паргъатси.

Урхънази ахъти хІурхъачирад хъярхъти хІуркІби, варачанти кадухъи сари. ЧяхІ-заблис гІергъи илди думкъар, вецІнази халадиур, галгуби хъусдыхъили, халати шурми гердикІахъули, кахси дуцІ гьалакбиру.

ХІурхъала цІуба дяхІила бугІярдешличибад урхъу дублабси цІалагъуна буцІардешличи — илгъуна саби Дагъиста тамашала тІабигІят, илди-гъунти сари сунела дахъал рангани: цІуба дяхІи, шиниша вацІурби, дубурла гъурша ва берхІе катругуни, хъанцІа зак, мургъи-ранг ризкъила авлахъуни, ляжи хІунтІена гІинцби, духъутІа курега, азир рангли рурхІуси урхъу.

Дубурлантас чула ВатІан — Дагъистан дигахъу, илгъуна жагадеш дигхІейгахъесра хІейрар. Илбагъандан гъарил миллатла гъарил поетли сунела бегІла гІяхІсигъуна назму, гъарил далайчини бегІла гъарбизурси далай чараагарли дурхъаси Дагъистайс багъишлабирни тамаша ахІен:

Дагъиѣтан ахІерси,
Дагъиѣтан гІязизси,
Ахъ дубуртар Дагъиѣтан.

Дагъиѣтайчи мурхъти дигили диѣѣбти илди къяяни гъарил даргай сунела уркІилар тикрарди-ру, цунухъунхІели къумдиру.

«Дигусила ура жагаси бирар», — бикІули бирар дагъиѣтанланти. Илбагъандан ахІенара нушала ВатІа — гъайбатси ва чихъси Дагъиѣта — ура нушала гъариллис илцад жагабилзуси? Ил дигахъухІели сарра нуша илис «дила Дагъиѣтан» диѣѣти.

Ванза Дагъиѣтан лебил дунъялис азирти дусми гъалабал машгъурси Кавказла дубуртазиб саби. Дагъиѣта лебил ванза 50 азирлим 300 квадратный километрличи абикибси саби. Халасив ил яра биштІасив? Гъайгъай, дунъяличир нушала Дагъиѣтаничир халатира улкни лер. Амма нушала улкара илцад биштІаси ахІен. Сунела ванза хІясибли Дагъиѣтан Арменияйчибра, Данияйчибра, Албанияйчибра, Швейцарияйчибра, Эстонияйчибра халаси саби.

Дагъиѣта дазула бухъяндеш 1700 километрличи абиркур. Илала хІябал бутІала ца дегъличибад ахІенну кабизурси, урхъуличибад саби.

Унруби Гъайгъай, Дагъиѣта бахъал гІяхІти унруби леб. Дагъиѣтанланти чула унрубачил мурталра узбиван даршули ва уржили хІербирути халкъ саби.

Дагъиѣта унруби саби ишди: кьиблала шайчибси унра — узиси Азербайжан, кьиблала ва магърибла

шайчибси унра — узиси Грузия. Нушала илдачилси дазу илди улкначилси Россиялара дазу саби.

Россиялизи кабурхути Дагъиста унруби саби: магърибла шайчиб — Чечентала республика, северла ва магърибла шайчиб — Ставропольла край, северла шайчиб — Калмыкунала республика.

Дагъиста лебилра халкъанала гІяхІси гІядат леб: унрубачил даршули, узбиван цабалги хІербирни. «Гъамси унра гъарахъси узиичив имцІали багала-ирар», — ибси бурала унра халкъаначира чебетиуси саби. «ТалихІ унрубачил даршули ва уржили хІериэс балнилизибра саби», — насихІят бурули саби Дагъиста халкъанани.

Даргантира чула унрубачил (кІарахъала, булугуни, къумукъланти, агулланти, рутулланти, табасарант, азербайжанланти) даршули хІербирули саби. Гъайгъай, гІяхІцад даргантира царалти миллатунала ургаб царалти миллатунала хъалибаргуни даргазирван, уржили хІербирули саби.

Дагъиста халкъанала гІядатунаниван, бусурман диннира унруби даршули хІербирни чІумали тІалаббироули саби: къияндешуназиб — барсур кумекбироули, шадлихъуначиб — разидеш буртІули.

Дугъбала баян.

Магъриб — запад

къибла — юг

шягІир — поэт.

СУАЛТИ ВА ХІЯНЧУРБИ:

1. Сегъуна саби Дагъистан ибси девла мягІна?

2. Дагъистан ибси дев цацадехІ мезаназиб секъяйда зайбикІули?

3. Дагъиста тІабигІятличила, жагадешличила бурая.

4. Картализиб Дагъиста унруби чебаахъая, Дагъиста ванзала халадешличила бурая.

5. ХІушаб унрубачила сегъунти буралаби гъандиркура?

6. Сен унрубачил даршули хІериэс гІягІниси? ХІуша унрубачил секъяйда хІердирулая?

Ражаб Адамадзиев

Дагъистан

Каспила дубличибад
ХІурхъла хъари бикайчи
КІантІити хъумала бегІ,
ЧІумати шурмала бегІ,

Ламуслис асил ВатІан,
Дила дару Дагъистан.

Ванза хала бегІтала,
Ванза даим жагътала —
Шарабла гІинзурбала,
Сахаватти унхърала.

БерхІи ванаси ВатІан,
Дила дару Дагъистан.

Хъярхъти делхъанала бегІ,
Ахъти далуйтала бегІ,
ВецІдехІ мезла халкъ-ургар,

ЦадехІ гьалмагъдешла бегІ.
ХъанцІа лагънала ВатІан,
Дила дару Дагъистан.

Сабурла суратчиба
ЛукІули хІебелкІунси,
Хабарла хабарчиба
Бурули хІебурибси.

Адаб-ряхІмула ВатІан,
Дила дару Дагъистан.

СяхІбатлис хІериахъес
Катасри Парижлизи,*
Ну хІечи гьуцІикІаси,
Бусурманван хІяжлизи.

Дарданас дарма ВатІан,
Дила дару Дагъистан.

* Париж — Франция бикІуси улкала жагаси тахшагъар.



ДИЛА ДАХЪАЛ МИЛЛАТУНАР ДАГЪИСТАН

**Дагъиста
халкъани**

Дагъистан дубуртар улкацун ахІенну, дахъал миллатунарра саби. ГІялимтани бурни хІясибли, Дагъиста уржибси хъалибарглизир 33 миллат лер. МажахІят дунъяла царал улкализир илдицад миллатуни лердиэс ва Дагъистайзирван даршули хІердирули диэс.

Дагъиста лерилра миллатуни лугІилашал цагъунти ахІен. Илдазирад лугІилашал халати 14 миллатла саби бегІти алфавитуни лер, илдала мезаначир газетаби, жузи, журналти дурадулхъули сари: кІарахъала, даргала, къумукъла, лезгибала, булугунала, табасарантала, азербайжантала, ногъайла, дубурла жугъутІунала, аккалан чечентала, рутуллантала, цахуртала, агуллантала.

Дагъистайзир, илдала дурарад, чула адамти лугІилашал камти гъатІира ишдигъунти миллатуни лерти сари: андиланти, ахвахланти, караталанти, ботлихланти, бежталанти, тиндиланти, багваланти, годобериланти, чамаланти, гинухланти, гунзибланти, цезаланти, хворшиланти, ва цархІилтира. Илбагъандан саби Дагъистайс дахъал миллатунар бикІуси.

Дагъиста бекІлибиубти халкъанала белкІ-белчІ (чула мезаначир жузи, газетаби, журналти), чула мезаначир радиоллизир передачаби, чула мезаначир

спектакльти чедиахъути театрти, чула мезаначиб дурайуси литература, собраниебачиб чула мезли гъайбикIес ва паспортлизиб вегIла миллат чеба-ахъесра ил вегIла мезли бицIахъесра ихтияр лер. Ил нушала халкъанала халаси сархибдеш ва гъести имканти сари, сенахIенну дунъяличиб илдигъунти ихтиюрти агарти бахъал халкъани къаршибиркути саби.

КIарахъала (дидойланти, цезаланти...) имцIа-ливан Дагъиста магърибла шайчиб минабиубти саби, дарганти ва булугуни — Дагъиста дайлабван, лезгиби, агулланти, цахурланти, рутулланти — кьиблала ва магърибла шайчиб, къумукъланти — северла ва машрикъла шайчиб, ногъайланти — северла шайчиб.

Дагъиста халкъанала уржибси хъалибарглизиб 2 миллион 600 азирцад адам хIербирули саби. Дагъиста миллатунала ургаб дарганти лугIилашал кIарахъантас гIергъи кIиибил мерличиб саби. Дагъиста лебилра халкъанала дахъал гIядатуни, хъа ва бузерила ваяхI, далуйти, делхъани, макъамти, хабурти, буралаби мешудиркур. Дагъиста им-цIатигъунти миллатуни дин хIясибли бусурманти саби, илдала диннис ислам бикIар.

Гъариллис арагIеб Дагъистан ва вегIла миллат дигахъу. Иличила ункъли буриб даргала шягIир (поэт) Газим-бег БяхIяндовли: «Ну дарган виънили-чи, ну даргала халкъла урши виъниличи пахручевли, хIелили убкIули, лерил гIямру дуркIулра. Илкъяй-да биэс гIягIнилира бургар. СенахIенну вегIла халкъ дигахъес хIейрусини урхIла халкъра дигахъес хIейрар». Илди хIекъти ва духути гъай Дагъиста

гъарил миллатла гъарил адамли тикрардарес виар.
Дагъиста халкъанала уржибдешличила бурули,
Расул ХІямзатовли къугъали зайбикІуси мешубуц
пайдалабариб: «Дагъиcтан дахъал журала вавнала
къалтин саби». Гъарил миллатли Дагъиcтан вавали
къалтинван жагабирули саби.

Дагъиcта Дагъиcтайзиб аслу-минала халкъа-
гъалмагъуни начил уржили ва цабалги дахъал
 царалти миллатунала вакилтира
хІербирули саби. Илдала лугІилизиб леб бахъал
дурала улкнала адамтира. Дагъиcтан чула ВатІайзи
халбарили, нушачиб хІербирули ва бузули саби:
урусуни (210 азир), украиналанти ва белорусуни
(урег-урегал азир), армянти (5 азир), грузинти (5
азир) ва цархІилтира.

Илкъяйда Дагъиcтан дигиаурли саби ишди-
гъунти миллатунала вакилтасра: туркани, казаху-
ни, узбекуни, таджикуни, венгрияланти, польша-
ланти, хантыланти, якутуни, чукчиби, корейланти,
китайланти, грекуни ва цархІилтира. Лебилра
илди дубуртар улкализиб уржили, ца кулпетван,
хІербирули саби: дагъиcтанлантас чили бегІ гъалаб
Дагъиcтайзиб урдубяхъибал, чи кІинайс бакІили
хъурабиубал декІардеш агара. БекІлибиубси, адам
чиди миллатла виънилизиб ахІенну, ил гІяхІси,
ламусла, духуси виънилизиб саби. Адамличи илгъу-
на хІер ва тІалаб Дагъиcта халкъанала духудеш ва
адамдеш сари. Гъариллис сунела гъалмагъуни ва
гІяхІли мяхІкамбирес чебиркур.

ДугІли ахІен нушала дубуртар улкалис би-
кІути:

ГІяхІгъубзнала Дагъистан —
Багъадуртала ВатІан,
Марти узидешлара
Адамдешлара мягІдан.

СУАЛТИ ВА ХІЯНЧУРБИ:

1. Дагъистайзиб уржили чум миллатла адапти хІербирули?
ХІушала шилизиб, райойзиб царал миллатла адапти
хІербирулив?

2. Чула белкІ-белчІ лебти ва агарти Дагъиста миллату-
начила бурая.

3. Сен халкъани уржили хІербиэс гІягІнити?

4. Селизиб дакІубулхъули Дагъиста халкъанала гІякълу?

5. Дагъиста гъалмагъуни бурая.

6. Халкъани-ургарти гъалмагъдешличила белкІани дел-
чІеная.

ГІяхІмадхан Абу-Бакар

Къьичи къалайчила тухум

Мармар къаркъала ганзухъличи хунжира
кадихъили, гІяйсаличи хъарахъили хІерикІулра.
Ванзаличибти лебилра адапти тухумтигу ибси
пикрира акІуб. Дила тухум пикрибарая: хала
дудеш дарган, хала неш — кІарахъан, неш хІясибли
уршила рурси — булеги, илкъяйда уршила урши —
табасаранлан, неш хІясибли узила урши — осетин,
узила рурси — украиналан.

ЦацабехІти хъалибаргунала бухІнаб биалли
гъатІира дахъал миллатунала вакилти чебаэс виар,
тяп азир рангли бершибси къалтинничи мешу-
биркули бирар илди.

Дагъистан

Гъарахъти дусмазиб, къяркъти ва чихъти,
Дудешуна бихІиб Дагъиста цадеш,
Аманатра дариб дурхІнас даимти
Халкъанала ургар марти узидеш.

Даршдусмазиб бургъаб цаси Дагъистан —
Дахъал миллатунар дурхъаси ВатІан,
Марти гъалмагъдешла чІумаси къала,
ХІела цадеш нушаб — дурхъаси давла.

Дубурла халкъани — узби ца нешла,
Дагъиста асилдеш черяхІдирути,
Цадешлизиб саби талихІ узбала,
Цадалгундешлизиб — шалал челябкъла.

Дагъиста гъар миллат — чебяхІси миллат,
АрагІеб Дагъистан жагабируси,
Цадешличил цІакъси Дагъиста гъунар
ГъатІира ахъбиру гъарил миллатли.

Марти гъалмагъдешла ахъанайтачи
ДашехІе уржили Россияличил,
Ил гъунили нуша аркути сарра
Баракатличира талихІличира.



ДАГЪИСТА ПАЧАЛИХЪЛА БЕХІБИХЪУД

Тарих Дунъяличиб акІни, бехІбихъуд, насаб агарси селра бируси ахІен. БехІбихъуд бирар гъарил хъалибаргла, тухумла, гъарил шила ва махъила, улкала ва хІукуматла.

Дагъиста пачалихъла насаб дебали жявхІели, нушачирад цІакъли гъарахъти хІяна замунтазиб бехІбирхъули саби. Илкъяйда заманалашал дебали гъарахълиб бехІбирхъули саби нушала улкала асил тарихра.

Нушала манзиллис гъалабси авъибил даршдуслихълизиб Кавказла дубуртазиб Албания бикІуси пачалихъ буили саби. Баягъи ил Кавказла Албаниялизи ишхІелла Азербайжа северла шайчибси бутІара, кьиблала шайчибси Дагъиста белгиси бутІара, машрикъла шайчибси Грузияла бутІара кадерхуртири. ИлхІелла Кавказла Албаниялизиб 26 кьамла адапти хІербирули калун. Илдазибад цацабехІти саби албанти, каспиби, легани, гелани, дидурти...

Царалти кьаманала чябхъинтауб ва бяхъянауб ил Кавказла Албания пашбехъуб. Сагаси манзилла 7-ибил даршдуслихълизир Дагъистан буцес, мутІигІбарес ва бусурман дин кабизахъес гІярабунани 700 дус духъяндитІунти дургъби дехІдихъиб. 10-ибил даршдуслихълизиб гІярабла гІялим ва гъун-

къя Аль-Масудини Дагъистайзиб 70-йчиб имѳали
къам бейгун. «Гъарил къамла — белкун илини,
— сунела гядатуни, сунела мез лер, гъарил къамла
сунела пача лев».

Къаманала Даршани ва даршани дусми гъалар
цалабахъуни цалабахъуни чумал къам цала-
дикили, къаманала имѳали ѳакъти
цалабахъуни алкутири. Нушала тарихчибани ил-
дигъунти къаманала цалабахъунала уми якъин-
дариб: халати ва ѳакъти къаманала цалабахъуни
дуили сари: Лакз, Табасаран, Гумик (Кумух), Зирех-
геран (Кубачи), Хайдакъ, Къяба-Дарго, Ахъуша-
Дарго, Сарир (Авария), Джидан (къумукъунала).

Дагъиста Дагъиста дахъалгъунти миллатуни
санигъат табигъатла мешути шуртразир хер-
дирули сари. Табигъатла ва яшавла
шуртара белгиси гъамдешли дагъистанлантала
баркъудлумазиб, хасиятуназиб, санигъатуназиб
белгиси мешудеш аклахъуб.

Дагъистайзиб хъубзарла санигъат жанаси,
амма мурталра хурматла бирусири. Илдас дубурла
бахъаназир, къаркъубазирад умударили яра луцри
делши, хъуми дирес чебуркъуб. Дубурлантани дел-
ги анкги, мухъи, мяхяр, мучи, хъара, картошка,
унхъри удалти. Дагъистан ил жявхелла санигъат-
лис ишхелера марли лебал.

Дубуртазир миѳираг адилкъес шуртри вайти
ахенри. Дубурлантани жявхейчирад хала хъай-
ванти (къули, унци, гамушуну) ва маза-мас адил-
къа. Дагъистайзир камхедиуб урчира эмхера.
Илбагъандан Дагъистайс миѳираг адилкъанна
санигъатра жявхейчибад тянишси саби.

Дагъистайзир хІурматла сари анхъчила ва тІутІи дашахъанна санигІятунира.

Адамлис гІямрулизир дахъал ваяхІ ва гІягІни-ахъала хІяжатдиркур: юрт, палтар, кьулса, балала дурега, сири, гажин, къянари, ханжал ва цархІилтира. Илди ва царалти гІянтІикІа ваяхІ биалли устнани дирути сари. Илбагъандан Дагъистайзиб жявхІейчибад бахъал журала устни акІуб, ва устала санигІят хІурматла бетаур. Устадешла шайчиб Дагъиста даражаличи абикеси цархІил мер Россиялизиб лебси ахІенри. ХІязлис ахІенри дубуртар улкалис «устнала улка» или ируси, сенкІун Дагъиста пахрубарести пагъмурти дахъалри: кьалтинти лушила, мургъи-арцла, мегъла, урцуйзирад гІянтІикІа ваяхІ дирнила, кьисла, лацла, арсавартала, някьишла, варгънала, палтарла, дабрила, тІалхІяна дирнила, дяхънушаби шинкъанкулаби ва бахъал царалтира.

КІинайс мегъла устни хъа ваяхІличил къяйли ханжулти, шушкни, дявила ярагъ диресра бурсибиуб.

ЖявхІелла Дагъистан дахъал санигІятунар буили саби.

ИшхІелла гІямрули Дагъистайзир дахъал сагати санигІятуни акІахъуб: мугІяллим, тухтур, туkenчи, ялчи, шофер, тракторист, дукъдуунти машинаби къулайдиран, телевизорти далдиран, бухгалтер, набт адилтІан, гъундури диран ва дахъал царалтира.

Устадеш чеахъдикІнила ва сагати санигІятуни алкІнила дазу лебси ахІен.

Дугъбала баян.

ГІянтІикІа — жагаси секІал, гІягІниахъала
машрикъ — восток
насаб — акІнила, бетаънила гъаб-гІергъидеш.

СУАЛТИ ВА ХІЯНЧУРБИ:

1. ЖъавхІелла чиди пачалихълизи кабурхусири Дагъиста белгиси бутІа?
2. Се сабабли заманала цалабахъуни акІуба? Илдала чумал у дурая.
3. Дагъистанлантала бекІлидиубти санигІятуни гъандикахъая.
4. ИшбархІи хІушала шилизир (шагъарлизир) сегъунти санигІятуни лера.
5. ГІергъиси белкІ белчІеная ва пикрибарая.

Б. ГІялиев

Тарихла гІилмуртала доктор

Даргантала тарих

ЖъавхІелла манзиллизир цаличи ца гъамти къамани ва тайпаби декІар-декІарти къукънази ва пачалихъла кабизунази дархдиркутири, халати ахІенти тухумтала къукъни цадирутири ва тухумла халати цалабикуни ва шими алкІутири.

ГІялимтани марбарибси саби, Дагъистан ва илала халкъани сунези цадурцуси цаибил пачалихъ Кавказла Албания биъни. Илизи Дагъиста гІяхІ-цад мер-муса кадурхутири. ЖъавхІелла Албаниялизи Дагъистан каберхниличила бурули саби Албаниялизир дахъал къамани хІердирнили ва дахъал мезани лернили. Илди сари легаиби, гелазиби, ди-

дурти, гаргарти, албанти, гандикунѝ, содиби, тава-спарти, каспиби, удинти ва цархІилти.

Гъанбушибти къаманала ва царалти халкъанала ургаѝ ишхІелла даргантала къамла чихъали сабрил, чІумали бурес къиянни саби. Амма дарган мезла, Дагъѝста цархІилти халкъанала мезанала къяйда, удинтала мезличѝ халасѝ мешудеш леѝ. Даргала ва удинтала мезаназир ца хІячила дегІти дахъал дугъби лер. Илди нушаѝ чула бухІнабуц хІясибли мешути яра гъамти сари или гъанбиркули саби:

удинтала	даргала
мукинах	мукеки
бех	бекІ
хаа	хя
курр	кур
уксан	укес
улух	цула
уки	уркІи
хен	шин
кода	кІатІа
кала	халал
бег	берхІи
калабаг	халабаиб
айзесун	айзес
зу	ну ва цархІ.

Удинтала мез Азербайжа Нидж ва Варташен шимазир, Грузияла Октомѝери шилизир гъаннара кали сари. Академик А. С. Чикобавани белкІи къяйда, «Кавказла Албанияла калунти мезаназираѝ илди цадехІ сари».



ДАГЪИСТА НАСАВ

Кавказла Албания жявлил пашбехъуб, аркъулри даршдусми. Дагъистайзир къаманала цалабяхъуни, дегІ гьаларти, цаибти пачалихъла кабизуни акІуб. Дусми цалис ца гІергъи зуздитІири, ва къаманала диштІати цалабяхъуни имцІали уржибти пачалихълизи цаладиркесдяхІиб. Ил — заманала тІалабли акІахъубси хІяракат сабри, сенахІенну халаси пачалихъла цІакъра, давлара, имкантира имцІали гьесли дирар. Илкьяйда Дагъиста мер-мусара сунези кадурхуси Кавказла Албания пашкабехъубли гІергъи, нушала манзилла IV-V даршдусмачибад бехІбихъили, Дагъистайзир гІяхІцад диштІати пачалихъла кабизуни акІуб. ГІялимтани марбарни хІясибли, дарганти хІербирути мер-мусаличир акІубтала лугІилизир гъандушес вираб Хайдакъ, Зирехгеран (Кубачи), Къарак, Шандан, Филан ва ХІямри.

Дагъистайзир пачалихъунала цалабикунас, кабизунас бекІдеш дирутири хананани, талхъунтани, нуцалтани, шамхалтани, майсумтани.

XVIII-ибил даршдусла цаибил байхъайзиб кІарахъан Шамилли Дагъиста ва чечентала цаибил пачалихъли биубси имамат акІахъуб. Амма ил имаматлизи арагІеб Дагъистан каберхурси ахІенри.

1860-ибил дуслизиб, Шамил ясируцили, Да-

гъиѣтан Россiяличил тамай цалабикибхIели, дубуртазиб урусла пачани Дагъиста область акIа-хъуб, сунесра пачала эпсертани ва хIякимтани бекIдеш дируси. Дагъиста область 10 вилайтличи (округличи) бутIибсири. Илдада лугIилизир лер-ри: Даргала округ (вилаят), КIарахъала, Кайтаг-ла-Табасарантала, ГIяндила ва цархIилтира. Вила-ятунасра бекIдеш дирутири начала эспертани. Сунела яргалис гъарил вилайтлизир (округлизир) наиб бекIли виубти наиблхъунира декIардариб, чусра 1900-ибил дусличибад полицияла участкаби бикIути.

1920-ибил дуслизиб (Октябръла инкъилаблис гIергъи) Дагъистайс белгиси хъархIерагардеш — автономия — гибсири. ИлхIейчибад Дагъиста пачалихъла у ДАССР — Дагестанская Автономная Советская Социалистическая Республика — бетаур. Илди дусмала Дагъиста начальхъдешла лишанти имцIали гIячихъли дагъардухъун: сунела Конституция (БекIлибиубси закон), Халкъла Собрание (Народное Собрание) ва Министртала Совет (Совет Министров) лерни.

1992-ибил дусличибад нушала пачалихъла у РД — Республика Дагъистан — саби. ИлхIейчирад нушала республикала ихтиюрти ва имканти гъа-тIира имцIадиуб. Дагъистайс гъуни чебилахъули саби 14 миллатла ца-ца вакиллизибад цалабикибси Пачалихъла Советли (Государственный Совет). Илала цаибил председатель, бекI ветаур дарган МяхIяммадов МяхIяммадгIяли МяхIяммадович.

Республикалис хIяжатти къанунти къабулдиру халкъла Собраниели. Лерилра къабулдарибти хIук-мурти, къанунти гIямрулизи детурхахъу Министр-

тала Советли, Министр тала Совет Дагъиста хІукумат саби.

Дагъиста шагъурти Дагъиста пачалихъ дешла хаста лишан тира лер: герб, гимн. Дагъиста тахшагъар МяхІячкъала саби.

Дагъистайзир веџІал шагъар лерти сари: МяхІячкъала, Дербент, Буйнакъск, Избербаш, Каспийск, Хасавюрт, Къизлар, Къизилюрт, Южносухокумск, Дагестанские Огни. Илдазирад деџІла жагъти шагъурти сари: Южносухокумск, Дагестанские Огни.

Дагъистайзир 42 район лерти сари. Илдазирад шел дарганти хІербирути райони сари: Ахъушала (районна центр Ахъуша), Дахадаевла (районна центр Уркарахъ), Лавашала (районна центр Лаваша), Хайдакъла (районна центр Мажалис), Сергокъалала (районна центр Сергокъала). Царалти миллатунала вакилти даргазибван, гІяхІцад дарганти Дагъиста царалти миллатунала районтазибра хІербирули саби.

Дагъиста царалти районира гъандуршехІе: Ахтила (районна центр Ахти), Бабаюртла (районна центр Бабаюрт), Ботлихла (районна центр Ботлих), Буйнакъскла (районна центр Буйнакъск), Гергебилла (районна центр Гергебил), Гъунибла (районна центр Гъуниб), Дербентла (районна центр Дербент), Къарабудагъкентла (районна центр Къарабудахкент), Къизларла (районна центр Къизлар), Курахла (районна центр Курах), МяхІярамкентла (районна центр МяхІярамкент), Новолакла (районна центр Новолак), Рутулла (районна центр Рутул), Тарумовкала (районна центр Тарумовка), Тляратала (районна центр Тлярата), Унцукулла (районна центр

Унцукул), Хасавюртла (районна центр Хасавюрт), Хивла (районна центр Хив), Хунзахъла (районна центр Хунзахъ).

Пергъити районтала уми биалли районтала центрталайчил цугдиркули ахІен: Агулла (районна центр Тпиг), Ахвахла (районна центр Карата), Ауховла (районна центр Яриксу-Аух), Гумбетла (районна центр Мехельта), Докузнарила (районна центр Усугчай), Казбековла (районна центр Дилим), Къаякентла (районна центр Новокаякент), Кумторкалала (районна центр Коркмаскъала), Кулила (районна центр Вачи), Лакла (районна центр Кумух), Ногъайла (районна центр Терекли-Мектеб), Сулейманстальскийла (районна центр Къасумкент), Табасаранна (районна центр Хучни), Цумадала (районна центр Агвали), ЦІунтІила (районна центр Бежта), Чарадала (районна центр Цуриб), Шамилла (районна центр Хебда).

Дугъбала баян.

Имамат — динна имам бекІли виубси пачалихъ

мажлис — совет

къанун — закон

вилаят (округ) — сунес гъуничебиахъути хІякимтачилси пачалихъла чІябарла белгили кабизахъурси бутІа

эпсер — офицер

СУАЛТИ ВА ХІЯНЧУРБИ:

1. Дагъиста пачалихъла кабизуначила ва ишхІелла пачалихъла агиличила бурая.

2. ИшхІелла Дагъистайс гъуни чебиахъути органтачила бурая.

3. Дагъистайзир чум шагъар лера? Илдала уми дурая. ХІушала бегІти имцІваливан чиди шагъарлизи башара?

4. Дагъитайзир чум район лера? Чумал районна уми дурая.

5. ХІу чиди райойзив хІериулри? Мухчализи хІуни хІела адрес секъяйда лукІада?

6. ХІушала узи-рузи Дагъиста чиди-биалра райойзиб хІербирулив? Тухумти?

7. Даргала районти дурая. ХІушалайла унра районти дурая.

8. ПІергъиси хабарла мягІна пикрибарая.

ХІ. Арсланбеков

Цадеш

Наб бурес дигулра Дагъиста халкъанала уржиб-деш чебиахъуси 1395-ибил дуслизиб кабикибси ца анцІбукъличила.

Ургабси Азиялизивад вакІибси гъармука Тимурланнис лебилра-сера Дагъистан буцес имкан-бакІилри. Амма гъачамлис илини Ахъуша-Дарго мутІигІбарес хІейублири. Даргантас чулайчиб дарш-нали халаси Тимурланна гІяскарличил бургъес бархІичиб бархІи къиянбикІулри. Даргантас бегІла къиянбухъунхІели, кумекбарес кІарахъалара булугуналаре бургъанти бакІиб. ИлхІели Тимурлай илди бургъантази хъарбаили сай:

— Сен хІуша, дила бусурман динна узби, гъачамлис бусурман дин къабулхІебарибти даргантас кумекли дакІибтира?

ИлхІели кІарахъалара булугуналаре бургъантани жаваб чарбатур:

— ХІу нушала динна узи сайли хъалли, даргантани нушала хІила узби саби. Илбагъандан нуша илдас къиянбухъунси замана гъандуцес хІедиубли кумекбарес дакІибтира.



ИНСАНИЯТЛА КУЛЬТУРА



Култура Дунъяличир дахъал миллатуни лер: урусунала, узбекунала, гІярабла, не-мецунала, англияланта, америкаланта, даргала, кІарахъала ва цархІилтира. Илдазибад цабехІ давлачебти саби, итилти — мискинти, цабехІ — берхъибти, итилти — лугІилашал камти. Амма дунъяличиб дахъал дусмала манзиллизиб акІубси ва кабизурси култура агарси миллат лебси ахІен.

Се саби култура? Култура бекІахъудила ва рухІла шайчир дахъал дусмала манзиллизир акІубти ва кадизурти миллатла сархибдешуни ва устадеш сари. Инсаниятла културали лебил дунъяла миллатунала култураби алавдурцу.

**БекІахъудила
культура**

Инсаниятла бекІахъудила культурали биалли алавдурцу гъарил миллатла мицІираг адилкънила, ванза бузахънила, унхъри дашахънила, хъулри ва шими лушнила, хурегла жураби дирнила, палтар ибнила тяхІярла шайчирти миллатла сархибдешуни ва устадеш.

Гъарил миллатла бекІахъудила культура сунечицун хасси бирар: масала, жявхІелла дагъистанлантала палтар, я шими, я хурег я урусуналайчи, я гІярабуналайчи, я гуржналайчи, я немецуналайчи гъеч мешути ахІенри. Гъарил миллатли чула мермусаличи далдикибти духълуми дашахъу, мицІираг адилкъа. ЦацадехІ ванати мераначир лерти, духълумазирад, масала — бананти, мицІираглизирад — валруми Дагъиста дубуртазир агара. Илбагъандан дагъистанлантала ил шайчирти устадешуни ва сархибдешуни ахІекІуб. Нушала дубурлантала биалли ризкъилизирад анкІи, мухъи, мяхІяр, цІедешлизирад гІинцби, хъярби, курега дашахънила шайчирти азирти дусмазир акІубти ва кадизурти устадеш ва сархибдешуни мекелли зурбати сари. Илди устадеш чеахъдикІнила дазу лебси ахІен. Ашкарси саби, масала, цаибти хъубзурала ризкъи дашахънила шайчирти устадеш камти диъни. Илдани, хатІабиркули ва хІялумцІули, гъе делгІнила мурхъдешра, заманара, хъуми гІявадирниличи хІяжатдеш лебнира, арцІи ирцІнира ... дуб-дубли белгидариб.

**РухІла
культура**

БекІахъудилайчил къяйли инсаниятла рухІла культура акІуб. Инсаниятла рухІла культурализи кадурхар дунъяла гъарил миллатла мез, макъамти, накъра, далуйти, хабурти, буралаби, багъираби, делхъ ва цархІилтира.

Дагъиста халкъанала лебил рухІла давла бекІа-хъудилаван инсаниятла культурала бутІа саби.

Чум Дунъяличир дахъал журала культураби
культура лер: адабла культура, ихтиярла культура,
лера бузерила культура, къаркъа культура,
някъишла, дугъаилзнила культура, салам
бедлугнила культура.

Дунъяличир чум миллат диалра, илдала гъарилла культура бирар: урусла культура, франциялантала культура, гІярабунала культура, китайлантала культура ва, гъайгъай, Дагъиста гъарил миллатла культура.

Культура бирар бухІнабси ва дураласи. Ца бутІаван, адамла дураласи культура багъарбулхъан илала куцла чебаълизиб, палтарла умудешлизиб ва ибгибдешлизиб. БухІнабси культура лебили чисалра вайдеш хІебиру, сунечи хъарси дурусли ва заманаличиб бетурхахъу, адамлис ламарт я кІибяхІяндеш хІедиру.

Адамлизир бухІнабси ва дураласи культураби чараагарли уржили диэс чебиркур.

Дугъбала баян.

Инсаният — дунъяла гІялам, лебил дунъяла халкъ

Мисри — Египет (гІярабунала ца улкала у)

накъра — музыка

СУАЛТИ ВА ХІЯНЧУРБИ:

1. Се саби культура?
2. Се кабурхара бекІахъудила культурализи?
3. РухІла культурали се алавдурцулил, бурая.
4. Культурала жураби дурая.
5. Сен адамлизиб дурабсиличил къяйли бухІнабси культурара биэс гІягІниси?
6. Сен даргантала агарти валруми, барткелти адилкънила ва бамба дашахънила шайчирти устадешуни ва сархибдешуни?



ДАГЪИСТА ХАЛКЪАНАЛА КУЛЬТУРА

**Мурхъси
асар**

Дахъал миллатунар Дагъистан азирти дусмазиб даршули ва цабалги хІербирули саби. Чула акІни хІясибли Дагъиста лерилра миллатуни узити сари.

Дагъиста лерилра миллатунала кьисматуназиб, асилси тарихлизиб, чучи чедакІибти балагъ-къадарлизиб, илди хІербирути мер-мусализиб ашкарси мешудеш чебиу. Ил анцІбукълира, дубурла халкъани акІни хІясибли узити биънилира, илди-ургарти бархбасуни мурталра цІацІати диънилира Дагъиста культурализиб белгиси гъамдеш акІахъуб.

**Дагъиста
бекІахъудила
культура**

Дагъиста халкъанала бекІахъудила, яшавла шайчирти сархибдешуни халати сари. Илдани жявхІейчибад багъур чинар анкІи, чинар мухъи, чинар мяхІяр яра мучи ункъли духъарал, чинар картошкала халати сабухъуни сархес вирарал, чинар хъярби яра курега мурити дирарал — дубурланти пергерти ванза бузахъанти ва анхъчиби саби. Дагъистанланти ванза бузахъантицун ахІенну, бурибти мицІираг адилкъантира саби. Ил шайчир нушала ишхІелира чихъти сархибдешуни лерни гъариллис гІячихъси саби.

Адам хІяйранирахъу дубурлантала юртани, гумурби, арсаварти лушнила устадешунани ва сархибдешунани. Дагъистанлантала гъар-урла пал-

тар ва азихъ чилайчилра — я урусуналайчи, я узбекуналайчи, я гІярабуналайчи — мешути ахІен. ЧІянкІли ишхІели нушала миллатла палтар цацабехІ гІяртистуначир ахІи чедаэс вирули ахІен, илди нушани тамай детихъахъулра. Юртани, шими лушни, палтар, азихъ — лерил илди дубурланта бекІахъудила культурализи кадурхар.

Дагъиста рухІла культура Дагъистан халкъанала рухІла культурала рухІла бухъянси тарих лебси саби. Жъавти замунтазибал белгибиуб гъарил адамлизир сегъунти къиликъуни диэс гІягІнитил: гъабзадеш, бархъдеш, кайзурдеш, уркІе-цІичевдеш, адамла хІурмат... Илди дусмазибал Дагъиста жамигІятли чараагарсилизи халбариб бузери далай-личил, делхъличил ва макъамличил гІеббуцни. Илдир дубурланта рухІла культурализи кадурхар.

ГІералкІути наслуби гІяхІтигъунти гІибратуначиб бяркъес ва чула багъудлumi мурхъдарес, дахъал наслубала багъудлumi даимлис калахъес халкъанани хабурти, буралаби, багъираби, айтуби акІахъуб.

Бузерила культура Илкъяйда жамигІятлис багаладияхъес, илала гІямру гъуйчидуршес дугъаил-знила, салам бедлугнила, гІяхІял къабулирнила ва дахъал царалтира къяйдурти кади-захъур, жамигІятлизир кагахъиб. Дагъиста рухІла культурала, гъайгъай, Дагъиста лебилра узити халкъанала чула саби-бегІти культурабазибад цала-бикибси саби.

ЖъавхІейчибад Дагъиста халкъанала къасчебси бузериличи, бузерила халати сархибдешуначи ун-рубира, дурала улкнала гІялимтира, гъункъябира,

тарихчибира хІяйранбирутири. Дубурлантала иб-
къси бузерила сархибдешуни ва устадеш ахъли
къиматладариб Дагъистайзи 2300 дус гъалав ва-
кІибси машгъурси гІялим ва тухтур Гиппократли,
Х-ибил даршдуслизив вакІибси гІярабла гІялим ва
гъункъя Аль-Масудини. XVII-ибил даршдуслизив
Дагъистайзи вакІибси гІялим П. Граббени
ишкъяйда белкІун: «Дахъал наслубала даршдусмала
бузерили зурбати чІянкІти дубурти хъуми ва ухъри
детаахъниличи хІяйранхІейэс хІейрар». ИтхІелла
дагъистанланти, гІяхІти хъубзурицун ахІенрину,
пергерти мицІираг адилкъантира сабри.

ЖявхІелладаршдусмазиргІямрулахІяжатдешу-
нани Дагъистайзир устнала санигІятуни акІахъуб
ва вавалидыхъяхъиб. Кавказлизир ва Кавказ
лизирцун ахІи машгъурти сари Табасаранна
къалтинти, чІянкІби, паласуни, Унцукулла урца
ваяхІ, ГІяндила варгъни, Балхарла ва Сулевкентла
тІалхІяна, Кубачила мургъи-арцла ва Хъярбукла
мегъла ваяхІ. Дубурлантани дирути картІибтигъун-
ти гІягІниахълуми азербайжантала, грузинтала,
чечентала яра царал миллатуналайзирад, чучи
хасти лишанти лерниличирли, дагъистанлантала
диъни гІячихъли декІардулхъан. Чебиуливан,
бузерила культура Дагъистайзиб жявхІейчибад
ахъси даражаличиб сабри.

Хъубзарла байрумти Дагъиста дубуртазиб гІяхІси, сабухъ-
чебси бузерила мурталра хІурматра
бири. Илбагъандан Дагъиста лебилра
хакъанани жявхІейчирад хъубзарла шадлихъуни
дурадуркІу. Хъубзарла байрамлис кІарахъала —
оцбай, булугуни — курдаккаву, лезгиби — къуьгъвер
сувар, табасарант — эверчин, даргала — хъубяхІруми

бикІар. ХІебла байрумти сари кѣумукѣунала ва булугунала — навруз, лезгибала — яран сувар, даргала — гІянжибяхІ ва цархІилтира.

ХѣубяхІруми — цаибил гѣарш кайѣнила байрам — арагІеб Дагѣистайзиб бала. ИшхІелира ил байрамличи халкѣ жагали бегІбиубли башар. Байрамличир урчи дуцІдиру, жагѣилтани декІар-декІарти абзани (дуцІла, кѣаркѣа иргѣнила, тІяхІулхѣнила, мушулвашнила...) дурадуркІу, далуйти зай-дулхѣахѣу, делхѣани думжахѣу. Абзаназир гѣести гІямрула адамтанира бутІакѣяндеш диру.

Сабухѣ бурчнила байрам (мишахѣари) Дагѣиста гІяхІцад халкѣанас кумхаси биалли, хѣубзарла хІурматлис дурадуркІути вавнала ва бягІлила шадлихѣуни имцІаливан лезгибачир ва табасарантличир кѣаршидиркур.

Даргала Дагѣиста узити халкѣанала культура-
культура лизиб белгиси мешудеш биалра, гѣарил
 миллатла саби-бегІси, даршани ва азир-
ти дусмала манзиллизиб акІубси ва кагибси куль-
тура лебси саби. Илкѣяйда дарганталара саби-бегІси
культура леб, сабира даргала лерилра шимала
культурабазибад цалабикибси. Сен Дагѣиста гѣарил
миллатла, масала, даргалара, саби-бегІси культура
акІубси?

Даргантала гІямру-яшавла шуртІри ва тарих
Дагѣиста узити халкѣаналайчи мешути диалра,
илдазиб гІяхІцад декІардешра чебиур. СенахІенну
дарганти хІербирути мер-муса, тІабигІят, илдас
даршдусмазир кѣадардиубти гІяхІра вайра, илди-
алавти духѣлуми, хѣа ва дугІла мицІираг Дагѣиста
царал халкѣаналайчи тамай мешути диѣс хІедирар.

Илди ва царалти хасдешунани, декІардешунани

даргантала саби-бегІси миллатла бекІахъудила ва рухІла культура акІахъуб.

Мез рухІла культурала мягІничебси бутІа сари. Мезличи мицІирси ва мицІирси ахІенси тІабигІятла асар чумал мисалличибли баянбирехІе. Дарганти — урхъначибад тѣйдили, къумукъуни урхънала мякълаб хІербирули саби. Ил сабабли бялихъунала лерилра жураби аргъахъес дарган мезлизиб леб ца дев — бялихъ, урхъу дублаб хІербирути къумукъунала мезлизир-чумал дев. Сен дарган мезлизир бекІ бархІил (урус мезлизирад дакІайчи) крокодил, жираф ибти дугъби агартилра, якъинни саби: дарганти хІербирути мер-мусаличир илди мицІираг лерти ахІенри. Чебиуливан, тІабигІятли мезличи ва адамличи асарбирули саби.

Даргала культура Дагъиста культурала мягІничебси ва пахрубареси бутІа саби, суненира сагати ранганачил Дагъиста ва инсаниятла культура жагара давлачебра бируси.

Девла баян

Азихъ — беркала, хурег

СУАЛТИ ВА ХІЯНЧУРБИ:

1. Дагъиста халкъанала культурабала белгиси гъамдеш селичибли баянбируси?

2. Чина, селизи кабурхуси Дагъиста культура?

3. Сен Дагъиста гъарил миллатла сунечицун хаста культураби лера?

4. Хъубзарла байрумтачила бурая. ХІушала шилизир сегъунти байрумти дурадуркІу?

5. Даргала культураличила бурая. Илизиб хІушала шила культура лебси биъниличилара гъанбикахъая.

АДАМДЕШЛА ГІЯДАТУНИ





АДАМЛА КУЛЬТУРА

Адам
сайгъунтала
ургав

Гъарил инсай сунела гІямру цархІил-тала ургар дуркІу, адам адамтала ургав хІериэс акІубси сай. Ил гъар бархІи бахъал адамтачил къаршиир-кур. Масала, учІан ца бархІила манзиллизив бахъал адамтачил цугикес асубирар: бегІтачил, чула клас-сла бучІантачил, мугІяллимтачил, директорличил, хъулри ушканничил, совхозла ялчиличил (колхоз-ла членничил), бухгалтерличил, шоферличил, ун-рачил, гІяхІяйчил, зиланничил, жагъилличил, рухъначил, шадив дуравхъунсиличил, архІяли-чивад чарухъунсиличил ва царалтачилра. Сегъунти бархбасуни сари илдачил учІанна? Секъяйда къар-шииркули ил илдачил — салам бедили, сегъуна салам ва секъяйда бедили? Секъяйда декІариркулив учІан илдаживад — селра хІеили яра адам разиварес-ти гІяхІти гъай дурили? Балулив илини кабиибтази сейкІусил, архІяличи аркъусилизи се бурусил? Сегъуна пикри алкІули учІанничила лебилра илди цугбикибтала? ГІяхІси яра вайси? Селичивли декІа-рулхъана ца учІан (адам) итиллиживад, палтар-лиживад, дяхІла ва къаркъа къалиплиживад ахІен-си?

Илди суалтас жаваб ца саби: гъар секІал адамла культуруализирад дигахъу, сенкІун гъарил адам су-

нела култура хІясибли вяшикІар, гІяхІдеш булгу
яра хІебулгу, вархъли дугъаилзан. Адамла култура
халкъла гІяхІти ва гъаркъяти гІядатуні чекайзурли
детурхахънилизібра дакІубулхъан. Дахъал милла-
тунас кумхатіра къиматуні, дурхъадешуні дирар:
адамдеш, бархъдеш, малхІямдеш, кумекбирни, са-
хаватдеш, дигичевдеш, ламус...

Илдас инсаниятла — лебил дунъяла — рухІла
давлуми бикІар.

Адам — Дарган мезлизіб адамдеш ибси дев
адамдеш адам ибсизибад бетаурси саби. Мар-
лира, адамдеш агарси адамлис адам
сай викІес къиянни бирар. Сен цалис «Ит адам сай»,
царалис биалли
«Ит адам ахІен»
бикІути? Се сари
гъатІи адамдеш?

Царалтала хІурматхІебирни —
вегІла вегІли хІурматхІебирни саби.
Даргала, кІарахъала бурала.

Дагъистайзіб адамдеш ибси цашаликарли
хІергъу. Дубурлантани адамлизир ахъли къимат-
ладиру гІяхІялдешдирни, ламус, абад, сабур,
инсап-хІяя, уркІеЦичевдеш, сахаватдеш, барсур
кумекбирни, бархъдеш, гъабзадеш, дигичевдеш,
малхІямдеш ва цархІилтира. Лерилра илди инса
гІяхІти къиликъуні адамдешли, адам ибсизі
алавдурцу. Ил адамла култура саби.

Адамдеш ахъли дихІен!
ХІяя умули дихІен! —

— Мурталра махбикІар дубурланти никІабази,
гІулухъабази, жагъилтази.

Илди ахъти адамдеш лерси дубурлан бухІнабси

культура лебси адам сай. БухІнабси культурула адамли халкъла лерилра гъаркъяти гІядатуні дузахъу. Дураласи культура адамла палтарла ибгибдешлизиб дакІубулхъан. Гъарил адамлизир бухІнабсира дураласира культураби диэс чебиркур. Гъарилла мурталра сагати палтар хІедирар, амма илди мурталра ибгили ва умули диэс гІягІниси саби.

**Адамдешла
мягІничебси
лишан**

Дагъиста лебилра халкъанани адам-
дешла бегІла мягІничебси лишан
адамла хІурматбарнилизиб чебиу.
ХІурматбируси саби гъарил адамла:

ил виштІаси виаб яра त्याмада, вегІла миллатла виаб
яра царал, хІяким виаб яра хъубзара. Хаслира
халаси хІурматбиру халасила. Халасила хІурмат-
барни ишдигъунти баркъудлумазиб дакІубулхъан:

— халасилизи гъалайкили салам бедлугни;

— дагъаилзухІели халасила (ва гъарил адамла)
у бурни;

— халаси чевакІибхІели, алзни; илис мер
акъубалтни; илис гъуни бедлугни; гъалав ахІи,
янашав яра гІергъи вашни; имкан биалли, халасили-
чи къакъбарили кахІейъни;

— халасила хъарбаркъ, тилади хъярхъли ва
дурусли бетурхахъни;

— халаси вехІихъайчи, чилра укес вехІхІер-
хъни;

— халасила мякълав гІялахажали хІеркъни,
вайтахІеркъни, вавхІейкІни;

— халасиличил варсхІерхъни, жалтахІеркъни,
халатала гъайлизи ургахІелхъни, илдази малхІямли
гъайикІни ва цархІилтира.

Гъарилли адамла илкъяйда хІурматбирни, Дагъиста халкъанала гІядатуни хІясибли, сунела адамдеш ахъли ва умули дихІнира адамла культура лебнира саби.

СУАЛТИ ВА ХІЯНЧУРБИ:

1. Адам сайгъунтала ургав хІериэс гІягІниси биъниличила бурая.
2. Се иргъахъули «Ит адам сай» ибнили?
3. Адамла хІурматбирен ибси секъяйда иргъулраял, бурая.
4. Адамла культура селизиб дакІубулхъана?
5. ХІушани халасила секъяйда хІурматбирулрая?
6. Гергъиси белкІ белчи пикрибарая.

Р. ХІямзатов

Дубурланна хъя

Дубурлай хъя биру: «Адамли акІубра — адамли убкІус».

Дубурланна гап: «ГъатІи илдигъунти адамти агара. Ил адам сайри».

Дубурланна лягІнат: «ХІушала жинслизир адамра урчира мадиаб».

Дубурланна гІяйиб: «Илис гъай харжмадирид. ИлкІун адам ахІен».

Дубурланна тІалаб: «Хъали ва хъу дица, лебилра давла бетахъахъа, амма адамдеш мадирцид ва детмайхъахъид».

Дубурлантани гІяхІдеш балгни: «Адам ветаи».



КАЙЗУРСИ АДАМ

Адам Дубурланта гІядатунала тІалабуни хІясибли, гъарил адамлизир ишдигъунти къиликъуни диэс чебиркур: адамдеш, ламус, абад, къасчевдеш, серхурдеш, дигичевдеш, сабур, адамла хІурматбирни, гІяхІялдешдирни, сахаватдеш, бархъдеш, гъабзадеш, гъайлис мардеш, гъалмагъдеш, кумекбирни, уркІеңІичевдеш, сунела чеблуми лайикъли ихъни, малхІямдеш, хІяя...

Илкъяйда Дагъиста лерилра миллатунани уржили далтІули дирар цацабехІ адамтала инкарла къиликъуни: гъимичевдеш, къясдеш, уркІеңІиагни, дигиагни, адуцалаагардеш, бузерилизиб азгъиндеш, хІясаддеш, убяхІдеш, чурхдеш, усалдеш, гъаргъдеш, ламартдеш, пасатІдеш, къиркъирдеш, вайгъабзадеш, кІибяхІяндеш, бархъдешагни... Илдигъунти къиликъуначилси адам чула жинслизив ахІенну, чула миллатлизивра вархли акІубли хІейгахъу. Нушала халкъанала тІалабуни хІясибли, гъарил дагъистанлайзир икІидигъунти гІяхІти къиликъуни диэс чебиркур, адамтала жамигІят адамдешла ахъси даражаличиб биахъес багъандан.

Кайзурси адам Гъарил шилизиб царалтазибад дахъал пергерти, гапла баркъудлумачибли, малхІямдешличибли декІарбулхъути адамти бирар.

Илдигъунтас нушачиб кабизурти адамти, ба-

гъадурти бикІар. Кайзурси адамлизир, урибси ба-
гъадурлизир чедир гъандушибти гІяхІти ва гапла
къиликъуни имцІали дагъардухъи, азадли ва са-
хаватли датдухъи, эркинни дерхъили дирар. Ила-
ла баркъудлумазиб кагибдеш, гъайлизиб сабур ва
духудеш, шанти-ургаб халаси хІурмат чараагарти
сари. Илала гъайличи шанти лехІихъур, ил гъим-
букІибтала ургала балбикахъес маслигІятличил
урхъу.

Гъалмагъуназивад кайзурси гъалмагъ имцІали
марси вирар. Кайзурси дудешли сунела хъалибарг
бекІахъудила ва рухІла ахъси ва хІялалси
даражаличиб хІербиру. Кайзурси учІан чІянкІли
шулали учІар, илала шикъатІала гаплацун дирар.
Кайзурси даргайзир даргантала гІяхІтигъунти
къиликъуни имцІали гІячихъли дакІудулхъан,
кайзурси дубурлайзир — дубурланна дегІла
гІяхІтигъунти къиликъуни. Шилизиб, юлдашуни-
ургаб кайзурси адамла хІурмат халаси бирар.

Гъарил миллатла кабизурти адамтала
СайвегІ дурабад дебали пагъмучебти ва жаваб-
карти, халаси къасчебти ва ирзуси масъалаличи,
барес хІяжатсиличи сагаси, сай-вегІси мурхъси хІер
лебти адапти — сайвегІуни — бирар. СайвегІ
декІарулхъан мурхъти багъудлумачил, бугаси
гІякълуличил, ибкъси бузериличил, гъабкъя-
силигІив даим умцІниличивли, баркъудлумазив
сунела миллатла гІяхІтигъунти гІядатуначи хъа-
рихъниличивли, жамигІятличи сунени бируси
халаси асарличивли.

СайвегІуни чула миллатла ва арагІеб Дагъиста
пахру саби. Дагъиста сайвегІунази халбирар дар-

ган, машгъурси тарихчи Расул МяхІяммадов, Дагъистан Республикала президент, кІарахъан, лебил дунъялис машгъурси поэт Расул ХІямзатов, гІялишти ГІябдулла ВяхІидов, МяхІяммадсягІид Мусаев ва цархІилтира.

СайвегІдешличи гъуни мактаблизибад бехІбир-хъур. Амма ил гъуйчир мурхъти багъудлумира ибкъси бузерира гъеч даибти ахІен. Илди хъарахъили диэс гІягІнибиркур вегІла миллатла черикІла къиликъуначи: адамдеш, ламус, адамла хІурматбирни ва цархІилтира. Гъарил адамли, гъарил учІанни сунела чебяхІси къас гІямрулизиб чекайзурдешличил бетурхахъуси саби. Сегъуналра ахъдешличи кункли чилра ацІес хІейрар.

Дугъбала баян.

СайвегІ — личностъ, сай вегІти гъаркъяти пикрумачилси адам.

тарихчи — историк, тарихла гІилмулизив узуси адам.

инкар — отрицание

маданият — культура.

СУАЛТИ ВА ХІЯНЧУРБИ:

1. Сегъунас кайзурси адам, кайзурси гъалмагъ, кайзурси учІан, кайзурси унра, кайзурси хІянчизар бикІара?

2. ХІушала шилизиб, мактаблизиб лебти кабизурти адамтачила бурая. Илдала хІушаб сегъунти къиликъуни гІяхІдилзана?

3. ХІушани сайвегІуначила се баладаяв? Сегъуна адам сая сайвегІ?

4. Се барес гІягІниси учІанни кайзурси адам, сайвегІ ветаэс?

Абад ва урези-хІяя

Абадла вегІ культура агарси виэс хІейрар. Абадчевси, кьутІхІедяхъили, тянишла хъулира ахІейцІур. Абадчевсили гІяргикІусилис, сукъурлис, къакъуйлис, маъмаикІусилис гІергъи хІеръили мучлаагарси гъай хІебуру. Абадчевси цархІилтала ургав паргъатли, малхІямли вяшикІар, гІялаха-жали хІеркъур.

Абадла вегІли сунела хІурмат сунечил барх бузутала, сай-алавтала, сунела хъалибаргла, сунела шила, арагІеб ВатІа хІурматличил бархбалсахъа, хІяяла бухъа-зегъа датахъес чІумали калзан. Абад агарсила ламус-хІяя хІедирар. Булугунала писатель Э. Капиев викІусири: «Хазна бетяхъахъибси ахІенну мискин пяхъир, ламус бетяхъахъибси сай». Иличиб-ра цІакъси мягІна зайбикІули саби дубурлантала буралализиб: «Ламус-асилдеш детахъахъниличиб бебкІа гъалаб саби».

Урези-хІяяли сай адам адамдешла дазулизив вихІуси. Урези-хІяяла вегІли сунес гІяхІдеш багъан-дан урхІлис ламарт хІебиру. Царалтала къияйчил хІериэс къабулхІеркур.



ДУБУРЛАННА ЛАМУС

Ламус ибси девла —
кѣл мягІна

Ламус ибси девла кѣл мягІна
лерти сари: кѣакъаси ва тІинтІ-
си. Кѣакъаси мягІнализиб или-
ни иргъахъу: «вегІлис барибси гІяхІдеш (савгъат)
чисалра бацІли балтуси ахІен, вегІлира илгъуна
бируси саби». Ил мягІнализиб ламус ибси дев дебали
зумали бузахъу: «Ит ламусагар сай», «Даршал дус
ардукъялра, хІед барибси ламус хъуммартид»,
«Нуни итала ламус хІебихІис».

ТІинтІси мягІнализиб ламус ибси девли хъали-
барглизир ва жамигІятлизир адамти-ургарти барх-
басуни ва илдала чеблуми иргъахъу. Масала, ца
пулан адамла ишдигъунти чеблуми диэс асубирар:
сунела бегІтала гъаларти чеблуми, хъалибаргла бекІ
сайлин чеблуми, узи сайлин чеблуми, унрала гъалар
чеблуми, шан сайлин чеблуми, бусурман сайлин
чеблуми, хІянчизар (мугІяллим, тухтур, ялчи, хъуб-
зар, букІун) сайлин чеблуми, дарган (кІарахъан,
булеги, лезги...) сайлин чеблуми, дагъистанлан
сайлин ва царалти чеблуми.

ТІинтІси мягІнализиб ламус ибси девли алав-
дурцути чеблуми ишдигъунти сари.

ДурхІнала
чебла

Дагъистайзиб бегІтала гъалаб дурхІ-
нала чебла бегІла дурхъасилизи,
чекайзурли ихъес гІягІнисилизи

халбиру.

Илизи кадурхар: бегІтала халаси хІурмат бирни, илди даим къайгъили алавбуцни, чула гарил балбуцлизиб чебетаибси кумек бирни, илдала хІяжатдешуни ихъни, илдала хъарбаркъ бегІ гъалабси яргализиб бетурхахъни, илди чебберхурхІели, илдала хІябрачи башни.

«КашлихІиб хайгина бирадра, нешла чебла хІейхъид», — бикІар дарганти. «Неш лебтачиралра ахъси сари», — насихІят бурули саби булугунала буралалира. Илдигъунти буралаби лезгибалара, къумукъуналар, ногъайланталара лер, чузибра бегІтала гъалабси дурхІнала халаси чебла чебиахъути.

Узбала ва
рузбала чебла

Узбалара рузбалара саби-ургар гІяхІ-
цад чеблуми дирар: цаличи итилли
къайгъи дакІубирни, цалис цали
кумекбирни, цали итил гІевурцни. ХалабаибхІели,
илди декІар-декІарти шимазиб ва шагъуртазиб
хІербиэс къадарбиалра, илдас чула бархбасуни
къябдердахъес асубириси ахІен. ГІузру биубхІели,
саби сецад гъарахъли биалра, чула дарес гІягІнити
урдатурли, чараагарли музабулхъути саби.

«БегІтира узи-рузирайчив чилра гъалав левси ахІен», — бикІар дарганти. Къумукълантани иру: «Узбира рузбира хункІлизир ца някъла тІулбиван уржили биаб».

БегІтала
чебла

ДурхІнала гъалар бегІталара чеблуми
камти ахІен. Илдазирад чумал гъан-
дуршехІе: дурхІни бигахъни, илди

гІяхІси бяркѣличил ва напакѣаличил гІеббуцни,
гъар гІяхІси ибсилазиб дурхІнас чихѣси гІибратли
биѣни, дурхІни дархибти гІямрулизиб бархѣли
къелгІеббикни.

Хѣалибаргла Хѣалибарг гъарли-марси, кабизурси
гъаларти хѣалибарг бетарар, нагагъ хѣали-
чеблumi баргла гъарил биркІай хѣалибаргла
гъаларти сунела чеblumi дурусли ва
заманаличир ихѣули виалли.

Хѣалибаргла биркІа чеblумазирад сари:
хѣалибаргла гъарил биркІай шилизиб ва дураб
хѣалибаргла хІурмат ахѣли бихІни, хѣалибаргла
яшав ункѣбиахѣес уржили ва цауркІли вяшбикІни,
барсур кумекбирни ва цархІилтира. «Хѣалибарг
махІкамбирусини вегІла ламус махІкамбирули
бирар», — бикІар булугуни.

ЖамигІятла Адам жамигІятлизив хІерирули,
гъалабси илизивад азадли виѣс хІейрар. Илба-
чебла гъандан гъарил адамла жамигІятла
гъаларра дахѣал чеblumi лерти сари:
жамигІятла хІурматбирни, илала гІяхІти баркъуд-
луми гІердурцни, сай гъарахѣлив виалра, жами-
гІятличилти бархбасуни къябхІевдахѣни, жами-
гІятли дурадуркІути билхѣабазир жигарчерли
бутІакъяндешдирни (умудеш барес, шин кес,
гъундури къулайдарес...).

«Шантала тур варгѣила биалра кабирхІур», —
бикІар дарганти жамигІятла цІакѣличила.

ХІера илкѣяйда иргѣуси саби тІинтІси мягІна-
лизиб ламус ибси дев.

Ламусличила даргала халкъла гІяхІцад бурала-
би лер: «ГІяхІнала ламус хІебала», «Ламус бебкІа-

личибра ціакъси саби», «Ламус бухънахІебиур», «Ламус базарличиб асес хІейрар», «ХІяя агарсила ламус хІебирар», «Шангла хъар гъаргли биалра, хялара ламус биэс чебиркур».

СУАЛТИ ВА ХІЯНЧУРБИ:

1. Ламус ибси девла мягІнубачила бурая.
2. Сен жамигІятлизив хІерируси адам чеблумазивад азадли виэс хІейруси?
3. Сегъунти сари бегІтала ва дурхІнала чеблуми?
4. Узи-рузи секъяйда хІербиэс гІягІнисил, бурая.
5. Шантала гъаларти чеблуми гъандикахъая.
6. Ламусличила буралаби делчІеная ва илдани се иргъа-хъулил, бурая.
7. Сен «Ламус дубурланта ла рухІла къанун саби» бикІути? Ламусли адам адамдешла даражаличив вихІниличила бурая. ХІуни ламус секъяйда ихъулри?
8. Сен «адамлис ламусла дукІлизивад ца гъигълис вердес» асухІебирара?

ХІялалси дурхІя

(Даргала халкъла хабар)

Мискин бегІтала левли уили сай хІялалси урши. Дебали вайсири илда ла яшав, амма ил урхІла секІайчи хІерхІейкІи, давлачебтачи къясдеш хІебири. ГІяхІил калабабарили бегІтира, дурхІя талихІ баргес архІяли дуравхъи сай.

Вашули, вашули, ил вамсур, гушиуб. Ил ца хІеркІла дубла ваиб. ИлхІели хІеркІли илала мякъла бикъурси хІунтІена гІинц хиб. Гушиубси дурхІя дебали разиуб ва гІинцли укесиуб. Амма

илала байхъала беркунхІели, ил селичирил шакикибсиван хІякизур: «Иш беркникІун секІал бигІнигъуна саби. Ишала вегІ варгес ва набчибси гІяйиб чебахъес гІягІнили саби», — иб дурхІяли. Ил хІеркІла къярдлизивад лагвяхІ ватихъиб. ГІяхІцадхІи вашули, илини гІинцбала халаси анхъ баргиб. Илизив илини анхъчи чеиб.

— Ва анхъчи, — малхІямли тІамадариб дурхІяли, — ну хІела танбихІлиу викилра, нуни хІела анхълизибадси гІинцла байхъала беркира. Секъяйда чебахъес вируси нуни набчибси гІяйиб? Сен-сен гъарбариша барибси хатІа?

Анхъла вегІ чи абдал сая иш иша вакІибси или пикриухъун, ва иб:

— ХІуни ил секІал барни багъандан хІу набчив хІябал дус узес гІягІниси саби. ИлхІели чебихъид хІуни хІечибси гІяйиб.

ХІябал дус калун ил хІялалли ва ламусличил узули. ВягІда сабаибхІели, анхъла вегІли дурхІялизи иб:

— ХІябалра дус хІу набчив хІялалли ва амъурли узади. ХІуни хІечибси танбихІ ахъири. ЧІянкІли цакамси кали саби. Дила рурси тер кІелра лихІилизир гІянцІа, кІелра хІуызир сукъур, някъби-къяшмиагар. Иличи хъайчикайадли, хІуни хІела чебла тамай ахънилизи халбирисра.

ДурхІя уркІухъун. Амма чебла ахирличи бикайчи хІехъили арукъес илизиб къас аги.

ДурхІя къабуликиб. ЧебакІибси децІла халадешли илини селра хІясиббириули ахІенри. Киб ил анхъчини сунела юртлизи ва хабарла исбагъиван жагаси рурсила гъала тІашватур. Сунела хІулбачи

хІерхули, дурхІя анхъла вегІлизи викІули сай:

— Иш ит баягъи хІу викІуси рурсив яра хІела царал рурси леру? Лерси риалли, къалабали ваахъабая иличи.

— Иш дила цайли цаси рурси сари, — жаваб лугули сай анхъчини.

— Амма илини чера биули, иргъра иргъули сари, илала някъбира лер, къашмира, — тамашаиуб ва разииуб дурхІя.

— Амма илала тІабигІятла ца хасдеш лебси саби, — викІар анхъчи. — Сунес гІягІнидеш агарси секІал илини я чехІебиу, я иргъхІергъу, урхІла секІал касес някъ гъахІебалта, гІягІнидеш агарси мерличи архІякъян. ХІябал дусла ухІнав хІу наб гІяхІизурри, ва нуни къасбарира, дила рурсилис гІур ишичив лайикъси мурул гІягІниси ахІен или.

Гъамли илдани мекъ бариб, рурсила дудешли жагъилтас анхъра пешкешбариб.

— ХІялалдешра, ламусра, адамдешра дархъли къиматладирути сари, — викІули вирар ухъна анхъчи.



УЛИ АДАМ ЖАГАИРУЛИ САЙ

Дунъяличиб гъар минут азирти уршби ва рурсби алкІан. Гъарил улкализиб гъарил акІубсилис сай веґІси у бедлуга, сенахІенну адамтала жамигІят уми агарли хІербиэс хІебирар. Уми агарти диалри, унра шилизивси яра шагъарлизивси гъалмагъличи кагъар белкІес яра мугІяллимли, классла журнал-лизи чис сегъуна кьимат кабатурал, багъес хІейри.

Азирти дусмала манзиллизир адамтала уми миллатунала кьиматуни ва давла детаур. Гъарил миллатла имцІали дузути ва дигути уми дирар.

Уми дирути сари аслу-минала ва гІерасибти. ИшбархІи Дагъиста халкъанала умазир, аслу-миналаван ахІи, гІерасибти уми имцІали сари.

Жагати «Жагаси улира адам жагаиру», —
уми бикІули нушала хала бегІтани ишди-
 гъунти къугъати ва зайдикІути уми
акІахъуб: ХъункІултІутІи (роза, булугунала у),
Къизилгюль (роза, лезгібала), Айгуль (бацла вава,
къумукъунала у), Айбатир (бацла гъабза, батир,
къумукъунала), Зубари, Зубарият (даргала уми).

БиштІати уршби-рурсби мурталра жагати бирар. Илди жагаси ули гъатІира къугъабаралли, гІурра гІяхІси саби ибси пикриличил ва умутличил Дагъи-ста халкъанани чула биштІатас ишдигъунти умира дирхъули сари: даргантани — Мургъи, Мургъият, Меседу (мургъи), лезгібани — Къизил (мургъи),

Динара (мургыла гІяббаси), Фарида (жавгъар духури), Фируза (хъанцІа яра шинишдухъунти рангла дурхъаси къаркъа). Гюламан (дубурла вава) булугунала у саби. Гергъити уми арагІеб Дагъистайзир къаршидиркур: Маржан (дурхъаси къаркъа, коралл), Зугъра (вава). Иличи мешуси саби кІарахъала Беневша (гулвава) ибси ура.

Гергъитира адам жагаирути уми сари: Амин (марси), Аминат (марси хъунул адам), Сарият (кабизалачерси), Басир (духуси), Пяли (чевяхІси), Сабир (сабурчевси), СягІид (талихІчевси), СягІидат (талихІчерси), ХІусен (жагаси), ХІябиб (дигуси), ХІябибат (ригуси), Заира (духуси, пергерси), Заза (ригуси), РяхІим (уркІецІичевси), Савдат (талихІ) Самад (бебкІаагар), ХІява (ригуси), Шакир (баркаллала), Кабират (халаси).

БегІтани чула дурхІнас бац-бархІила умира дедлуга: Шумайсат (биштІаси берхІи), Шамси (берхІила), Шамсият (берхІи чехІейгахъан, зонт),

Чамса (берхІи), Чамсулвара (берхІила тІякъ), Айгум яра Айгун (бац-берхІи).

Аслу-минала	Дубурланта
уми	и кІди уми гІярабла,
	Турцияла, Персияла мезаназирад
	дакІибти сари.

Дагъиста лебилра халкъанала аслу-миналара къугъати гІяхІцад уми лерти сари:

къумукъунала: Ана (неш), Ата (дудеш), Апа (халал рузи),

кІарахъала: ЧегІерай (цІудара), Тликалав (гІяхІси), Дада (дудеш), Царгуин (муриси у), Царлик (гІяхІси у), Чаран (шандан),

лезгибала: Ксен (гІяхІси), Яру (хІунтІена), Чулав (цІудара),

татанала: (Дедей (неш), келедедей (хала неш),
Бибеле (дудеш),

Дарганталара аслу-минала гІяхІцад уми лер: Аба,
Абаба, Халаба, Ази, Адада, Халада, Урши, НикІа,
ИштІал (ВиштІал), Зубари, Зубарият, ГІяхІил, Жаго,
Издаг, Чумиздаг, Мургы, ЦІибац (сагаси бац).

Тарих Миллатла уми миллатла тарихличил
ва уми дархдасунти сари. Гьалар дубурлантала
бархбасуни гІярабтачил, туркличил
имЦІахІели, илдачирад нушачи дахъал уми дакІиб.
ГІергъити 70-80 дусла манзиллизир Дагъиста ва
Россияла бархбасуни мурхъдиубхІели, дубуртазиб
дуб-дубли ишдигъунти уми дедлугес бехІбихъиб:
Ирина, Эльвира, Альберт, Марина, Оксана ва цар-
хІилтира.

СУАЛТИ ВА ХІЯНЧУРБИ:

1. Адамлис у сен гІягІниси?
2. Чумал жагати у дурая.
3. Даргала аслу-минала уми гьандикахъая.
4. Чидни мезаназирад дакІили нушала уми?
5. Умалара жамигІятла тарихлара бархбас селизиб чебаэс
вирава?

Р.ХІямзатов

Наб у бихъни

БегІ гьалав акІубси уршила у ил дунъяличи
дакІувиэс гьалавал лебилра шантани балусири,
сенахІенну илини, гІядат хІясибли, миЦІиртала
ургав агарси дудешла узила у бихес гІягІниси саби,
ва шилизиб лебтанилра ирусири: ХІямзатхъала
хъалибарглизив жявли МяхІяммад дакІуирав.

Ну дунъяличи дакІувиэс замана гьамбикІу-
хІели, гьалабван бибкІибти яра урхІла дунъяличи
алхунти, итданиван хІурматличил сунела у ванза-

личиб нуни бихесли, наб у бихъеси дудешла я гъамти, я юлдашуни лебти ахІенри.

Ну акІубхІели, уршилис у бирхъуси гІядат барес дигули, юртлизи дудешли шила бегІлара хІурматла адамти жибариб. ХІятта дунъяла арагІеб къисмат ирзухІеливан, илди къалабахІебикІули ва пахруличил хъули кабииб.

ЦархІил хъулирад дурарухъунси дила нешли ну тѣп идбагличи мешуси ухънази сайри веибси.

Ухънани ну някъбачив хъа бурхани ваайчи ахъуцира ва иб:

— Рурсила у зубарила лямцІличи яра вавнала малхІямдешличи мешуси биэс гІягІниси саби. Мурул адамла улизир биалли шушкнала цІяйхъла тІама ва жузала пасихІдеш зайдикІес гІягІнити сари. Жузи дучІули, нуни дахъал уми дагъурра, дахъал уми дагъурра шушкнала цІяйхълизирра. Дила жузи ва дила шушкни гъанна наб гІердугъули сари Расул ибси у бихъахъес.

Идбагличи мешуси ухъна дила ца лихІиличи гІяшиуб ва шивкІивухъун: «Расул!» ГІур дила итил лихІиличи гІяшиуб ва ахъли тІамадариб: «Расул!» ГІур висуси ну дила нешлизи веира, иличи ва лебтачи дугъаизурли, илини иб:

— ХІера иш Расул.

Хъули кабиибти лехІкахъили, ил уличи къабулбикиб.

Дубурлай кІел секІал мяхІкамдирес гІягІнити сари — къапІара ура.

Расул ибси гІяраб мезли «вакил, вакилварибси» ибси саби.

ХІебиалли, ну чила вакил вирусира, чили вакилварибсира?

(Шурбатурси М.Абакаров)



УБИХЪГЪУНА ВЕТААХЪЕС ДИГУЛИ



**Къуват
серхурдеш**

Дагъиста миллатунала гІяхІцад ума-
зир бархъдешличи, гІяхІдешличи,
асилдешличи, рухІла умудешличи ну-
шала хала бегІтала хъул ва жи гІячихъли чедиули
сари. ВатІа азаддеш багъандан, дурала улкнала
хІурбуначил зумали бургъес чевкъуси Дагъистай-
зир гъабзадеш, серхурдеш, гъунарчебдеш мурталра
ахъли къиматладири. Чула дурхІни цацадехІ
къуватти мицІирагван цІакъти, саберхурти ва мегъ-
шанданван чІумати бетаахъес дигули, жявхІелла

дагъистанлантани тамашала уми акІахъуб: Арслан, Къаплан, ХІяйдар (арслан), Асад (арслан), Гъазанпар (лезгибала, булугунала у -арслан), ГъалбецІ (арслан), Руслан (арслан), БарцІ (булугунала у -бецІ), Хасбулат (хасси шандан)), Булат (шандан), Темир (мегъ), Темирбулат (мегъ-шандан)...

Хан ЖъавхІелла дусмала Дагъистайзиб адамла
Пача даража имцІаливан акІни, жинс хІясибли бирусири. Талхъа, ханна тайпализив акІубсила имканти гъарзатири, лагъла хъулив акІубсилаван ахІи. Илдигъунти шуртІразиб гІядатла халкъли чула дурхІни хананала даражаличи умазиб абиркахъули саби: Бек (Бег, Бега), Агъа (господин), Агъалархан (господин хан), Хан, Амир (буйрухъикІуси), Шагъ, Паша (пача), Султан (пача), Малик (пача), Элдар (улкала хала веГІ)...

Идбагунала Убихъгъуна ветаахъес дигули, Дагъистайзир биштІатас идбагунала уми
уми дедлугнира гІядат бетаур. Илдазибад бегІла зумали пайдалабируси саби бусурмантала идбагла у. Дагъистайзир ил МяхІяммад (гІяраб мезли — гапируси, гапла) ибси ула чумал жура лер: БяхІмуд БяхІямад, БяхІянд, МяхІмуд, МухІамма, МухІяммад... Ил къяйлизиб саби ГІяхІмад ибси ура (дебали гапируси.) МяхІяммад ибси ула (даргазир къаршихІедиркути яра камли къаршидиркути) царалти журабира лер: Мамед (лезгибала, азербайжанта), МяхІяч (кІарахъала), Баммат (къумукъунала), МяхІяд (булугунала). Лезгибала Ярмет ибси улизиб «яр» — хІеб, мет — МяхІяммад ибси ула бутІа. Ногъайлантала ГІялимет (ГІяли ва Мет-МяхІяммад) хъунул адамла у саби.

МяхІяммад идбагла хъуна ва рурсбала умира Дагъистайзир зумали къаршидиркур: Хадижа (заманахІебаили раркъибси), ГІяйшат (мицІирдеш), Зайнаб (рабза, рицІибси), ПатІимат (Фатима) (михъирличирад черсарердибси), БатІа къантІбарибси ПатІимат ибси у саби, къаршибиркур даргазиб ва булугуназиб.

Убихъгъуна ветаахъес ибси къасличил дирхъути сари Дагъистайзир царалти идбагунала умира: СалихІ (гІяхІси), Ибрагъим (халкъанала чевяхІси дудеш), ИсхІякъ (дукелцІи), Юсуп (имцІабиубси), Сулайбан (даршуси), Муса (шиннизивад айтІунси), ГІиса (Аллагъли верцахъаб), ИсмягІил (Аллагъли аргъаб)...

ИшхІелла ил
журала уми

Чедир гъандушибти уми Дагъистайзи азирти дусми гъалар дакІиб.

Идбагунас гІергъиси заманара ду-

нъяличиб машгърти адамти камхІебиуб. Дагъистанлантани чула дурхІнас, илди убихъгъунти бетаахъес дигули, машгърти адамтала уми дедлугнила жявхІелла гІядат ишбархІира жигарчебли даимбирули саби: Ленинбей (1917-ибил дуслизиб хІукумат гъятІаили, совет хІукумат кабизахъурси инкъилабчи), Спартак (жявхІелла пунтбиубти лугърала гІяхІгъабза бекІ), Куйбыш (урусла инкъилабчи Куйбышев фамилиялизибад), Ворошилов (граждан дургъбала машгъуриубси хІуребачи), Сабрина (Италияла машгърси далайчи)...

КІирка у Дагъистайзир дахъал кІирка уми къаршидиркур. Илди акІнила бекІбархІила сабаб белгибарили сай даргала гІялим ГІябдул-хІямид ГІялиевли: «БекІализивад верца-

хъес багъандан, адамла у барсбирнила гІядат дубур-
лантала ургаб ишхІелира лебал. Иличил бархбасунси
саби цализир кІел у цаладирхънира МяхІям-
мадимин, ГІябдуллахІяжи ва цархІилтира. Илди
«къянала» уми сарри: бекІа ца ула вегІ виштІасилис
гІергъи бакІибхІели, илини виштІал дурхІя царал
уличил ургу, ва ил бацІли чарбулхъан».

ИшбархІи, гъайгъай, ил жавхІелла пикриличи
бирхути бахъал хІебургар.

СУАЛТИ ВА ХІЯНЧУРБИ:

1. ХІушала шилизиб вегІла тухумлизивадси машгъурси
адамла у виштІасилис бедлугнила гІядат лебал, пикру-
духъеная.

2. Цакъти ва садерхурти жанивартала уми дурхІнас
дирхъниличибли бегІтас се аргъахъес дигулири?

3. БегІтас чула дурхІни ахъри-даражала бегІти бетаурли
дигни секъяйда багъес вирара?

4. Нушачир идбагунала уми тІинтІидиънила сабабличила
бурая.

5. БекІ бархІи кІирка уми сен акІубти? Чумал кІирка уми
дурая. Илди секъяйда лукІути?

ГІ. Абу-Бакар

Гъачам се бетаура

ХІуни аргъибси ахІену, гъачам театрлизиб
пъеса бегІлара бемжурси замана, унза абхъили цали
«МяхІяммад, дуравхъен!» или тІамадарибхІели,
театрлизибтала байхъалара-сера адамти дурабухъ-
ниличила?

МяхІяммад

Ва МяхІяммад! или
 Вјавъира нуни,
 Гъаббакиб вецІалцад
 МяхІяммадуни,
 Бухънаби ва жагъти,
 Ахъти ва гІяшти.

У — жагадеш

Абубакар — Бакарла дудеш (Бакар — жагъси валри), Абакар, Абубекир, Абукар ва булугунала Абачара Абубакар ибси ула жураби сари.

Абузар — мургъи-дудеш, ил у леб кІарахъала, лезгибала, табасарантла.

Абулмуслим — Муслимла дудеш, Муслим ибси биалли бусурман ибси саби.

АвхІяд — цаибил, цаси (булугунала у).

Авшалум — даршудешла дудеш (татла у).

Айбала — бацла дурхІя.

Айгул — бацла вава.

Айдамир — бацла мегъ, бацла талихІ.

Айна — дяхІимцІала.

Амин — марси.

Амир — бекІ, халасигъуна.

Анвар — нурани.

Басир — мурхъли секІал пикрибируси.

Барият — исбагъи, къуймур (пери-лизибад).

Башир — разидеш бихан.

Билал — араси.

Булат — шандан.
 Бурлият — бриллиант.
 Вагъаб — пешкешдируси.
 ВяхИид — цаси.
 Валида — рурси, букъур (лезгибала у).
 Варис — букъур.
 Герей — хІурматла.
 Гитин — виштІаси (кІарахъала у).
 Гугурчун — лагъа (къумукъунала у).
 Гулбагъар — хІебла вава.
 Гулнара — нарла вава.
 Гулпери — исбагъи вава.
 Дадаш — узи.
 Даниял — Данна аллагъ (Дан — жявхІелла
 Израильлизибси ца къамла у).
 Дауд — гъалмагъ, дигуси.
 Даштемир — къаркъа-мегъ.
 Жабраил — аллагъла ургъан.
 Жавагъир — жемчуг.
 Жалал — чебяхІдеш.
 Жамал — жагадеш
 Жамила — жагаси.
 ЖягІпар — гъалжанала хІеркІ.
 Заза — ригуси, дурхъаси.
 Зайпадин — динна шушка.
 Зайнудин — динна шушка.
 Зарема — мургъигъуна.
 Зарипат — бугаси гІякълу.
 Зияудин — динна шала.
 Зубайдат — рицІибси.
 Карим — адуцалачевси, вархъси.
 Къасум — дуртІуси.

Латип — урКецИла веГ.

Мадина — шагъар.

Мажид — къуватси.

Мандат — риштІаси яра беркала, берклумачилси
стол.

Мансур — чедииркуси.

Мариям — къутІкъуси.

Муртаза — чеввикІибси.

Мухтар — викІибси.

Мустапа — викІибси.

Наби — идбаг.

Нажмудин — динна зубари.

Написат — дурхъаси, исбагъиси.

Нурислам — исламла (динна) нур.

Ражаб — верхІъибил бацла у.

Разакъ — ризкъи, беркала луган.

Рамазан — урЧемъибил бацла у (илала жураби
сари Рабадан, Равдан, Разу, Рабазан).

Сабир — сабурла.

Самад — даимси, убкІхІебКІуси.

Саният — кІиибил.

Сиражудин — динна шала, динна чирагъ.

Тарлан — лачин.

Тимур — мегъ.

Унайзат — гежба.

Хайрудин — динна хайри.

Шакир — баркаллала, гапла.

Элдар — улкала ахърила веГ.

ЯхІъя — аллагъла гІямру.

Якъуб — къячІа буцибси яра гІергъи лявкъуси

Ярали — хІеб ГІяли (ГІяли — чевяхІси), Ярали
лезгибала у саби.



АДАМЛИ СУНЕЛА У ЖАГАБИРУЛИ САЙ

Хала
бегІтала
уми

Дагъистайзир бегІтани чула дурхІнас хала бегІтала, тухумла, хІурматла гІяхІ-лала уми дедлуга, сарира чула бегІтани черикІла баркъудлумачирли жагадариб-ти. АкІубсилис илгъуна хІурматла у бедниличил бегІти мубаракбирули, унруби ва юлдашуни бикІар: «ХІушала урши сунела убихъгъуна хабардерхурси гъабза ветааб. Ил дурхъаси у сунени гъатІира жагабараб.

Сунела у убяхІбарниичиб
вебкІни гъалаб саби.
Даргала халкъла бурала.

ГІиниз
гуми
татаул...

ВегІла у вегІли саби жагара жяргара бируси. Адамли сунела у чІянкІли гапла, черикІла баркъудлумачибли саби къугъабируси. ИлхІелира илди баркъудлуми ва къайгъни чараагарли жамигІятла пайдалис дяхІчаили диэс чебиркур. ЖамигІятлис гІяхІдеш барибси адамла у жамигІятли хъум-хІерту.

Буйнакъла районна Эрпели шилизивадси Ахаев Дадани шантас гІиниз балкъаахъур. Ил гІинизлис шанти гъаннара дигиличил «Ахав гІиниз» бикІули саби. Адамли жагаси, жамигІятлис манпагІятси баркъудиличил сунела у жагабариб, лямцІбухъа-хъун.

КІарахъала ишхІелла Шамилла районнизи-
вад-си ГІяхІмадов ХІясай Къойсу хІеркІличибад гуми
бариб. Ил гумилис халкъ уб ва гъанна ХІяса гуми
бикІар.

СирхІяла ва муирала халкъли хъумхІертур
«ЖугъутІ къадалаб» гІиниз барибси хІурхъан
ГІязиз. Илис жамигІят ГІязизла гІиниз бикІар.

Гъарахъти дусмазиб губдалунтла ургубализиб
татаул барахъес халаси къайгъи барибсири Ра-
жабли. Ражабли илкъяйда сунела у къугъабариб.
Ил татауйс губдалунт Ражабла татаул бикІес
даимбиубли саби.

ЖъавхІелла гергай шила жамигІятлис сунела
мулклизибад дуки-гъунила мер хасарбатурли
сунела у жагабариб: илхІейчибад илди мер-мусалис
Лугъайла хасарбат бикІар.

Чебиуливан, жамигІятлис багаласи баркъудили
саби адамла у къугъабириси.

Шими
шагърти
къакъурби

Дагъиста цацадехІ шимала ва ша-
гъртала умира адамталайчил дарх-
дасунти сари: МяхІяммадкъала
(Мамедкъала), Къасумкент, Къоркъ-
маскъала, Шамилкъала, Халимбек-аул, Къаранай-
аул. Илдигъунти уми даргазирра къаршидиркур:
ШягІбанмахъи, ГІялиханмахъи, Къадиркент, Уцу-
мимахъи, Сергокъала...

Дагъиста кІел шагърлира машгърти ду-
бурлантала уми дихули сари: МяхІячкъала,
Буйнакъск.

Илкъяйда Дагъиста хІябал райойс хабардер-
хурти сайвегІунала уми дедни ашкарси саби:
Дахадаевла, Шамилла, Сулейман Стальскийла.

Ашкарлигу вайси адамла жярга у я шилис я райойс хІебирхъу.

Гъарил шилизир ва шагъарлизир машгъурти адамтала, бурибти багъадуртала уми дедибти дахъал къакъурби лер.

Поэт
гІялим ва
цархІилтира

Дагъистайзиб чула уми чуни жага-
дарибти, саби Дагъиста пахрули
бетаурти гъарил миллатла бахъал
пагъмучебти поэтуні, гІялименти ва

хІянчизарти леб: дарганти — Батирай, Р. Рашидов,
ГІ. Абу-Бакар, МяхІяммадрасул, Расул МяхІям-
мадов, МяхІяммадсягІид Мусаев..., кІарахъанти:
МяхІмуд, ХІ. ЦІадаса, Р. ХІямзатов (гІялим),
къумукъланти И. Къа-
закъ, С. ХІяжиева (гІя-
лим), булугуни Ю.
Хаппалаев, Н. Джида-
лаев ва бахъал царалтира.

Адам гІяхІси виалли, илала
ура гІяхІси бирар.
Даргала халкъла бурала.

Гапла баркъудлумачирли чула уми жагадариб
бахъал дагъистанлантани: мушлукъянабани, космо-
навт Муса Манаровли, Россияла игит МяхІяммад
Толбоевли...

СУАЛТИ ВА ХІЯНЧУРБИ:

1. Адамли сунела у секъяйда жагабирули?
2. ХІушала шилизиб, райойзиб чила-биалра у биху-
си гІиниз, гуми, татаул, анхъ, забла хъали лебал, пикри-
духъеная.
3. ХІушала шилизир гІяхІгъубзнала, машгъурти адамтала
уми дедибти къакъурби дурая.
4. Се иргъахъули шилизиб хІела ули — гІяхІси яра вайси
баркъуди?

5. Буралабала мягІна белгибарая: «У нясбиалли, бирцес хІейрар», «Мургъи-арцичиб умуси у гъалаб саби».

6. Даргала халкъла багъира баянбарая: «ВеГІла саби, амма царалтани имцІали пайдалабиру».

Адамли сунела у нясбирули сай

Асил баркъудлумачибли адамли сунела у жагабируливан, цацабехІтани усал, цІахти баркъудлумачирли чула уми багъаагардиру, халкъли асил уван, усал ура хъумуртули ахІен.

Пачала замана Дагъиста пунтдиубти шими генерал Аргутинскийла буйрухъ хІясибли жанивардешла къяркъдешличил дячІун. Дагъиста халкъанани ил эпсерла къяркъдеш ва у хъумхІертур: илала у дубурлантани хялис бедиб — АргъутІ. Чисалра веГІла у илкъяйда хІурматагарбиахъес къадармабиаб. «Адам убкІар, у кавлан», — бикІар дарганти. Ил у секъяйда кавланал — царалтас шалабикІули яра мучлаагарбиубли — ил ула веГІла баркъудлумазибад дигахъу.



САЛАМ БЕДЛУГНИЛА ГІЯДАТУНИ.

**Халаси
къадри**

Дагъистайзиб салам бедлуга ва дугъабилзан вегІла шайзи, дурашайзи, царал миллатла адамлизи, гъар къаршиикибсилизи. Дубурлантала салам бедлугнилагІядатуназиб «Иш нушала сай», «Ит урхІла сай», «Их царал миллатла сай» гъеч лерти ахІен. Салам бедни бегІ гъалабси яргалис вегІла вегІли хІурматбарни, сунела адамдеш чедаахъни саби.

Салам бедни дакІу-гъаргси ихтилатлис гІяхІси бехІбихъудра адамличи бирхауди акІахънира, адамти-ургарти бархбасунас чІумаси хъулчи кабихънира саби. Салам хІегили чевакІибси адамличил уркІи-гъаргси ва разиси ихтилат бетхІерар. Салам хІегибсини адамти-ургаб тІягІямагардеш алкІахъу.

Салам бедни зилантани гІяхІцад зумали някъ буцниличил чебирцІахъулира бирар. «Някъ бурцуси саби адамла някъла ванадеш гъанаахъес, — викІули сай даргала машгъурси белкІчи П. Абу-Бакар, — ва иличивли абзур бархІи адам гІяхІси гъавлизив кавлан». Адамла някъ цІацІабарили ва салам бедили, илала гъав ахъбуцни, нушала гІядатуни хІясибли, гъарилла чебла саби.

**Саламцун
баибси ахІен**

Дагъиста узити халкъанала гІядатуни хІясибли, анцІбукъ ца салам бедниличибли таманхІебирар. Салам бедни

байхъу баркъуди саби. Илала дурабад дагъистан-лантани чараагарли хъарбиу хъалибаргла, неш-дудешла, узи-уршила, унрубала арадешличила, дегІнубала, шин-къарла, аргъла, дяхІнила агили-чила.

Дагъиста халкъанани салам бедлугни илкъяйда тІинтІли иргъу.

Салам бедили гІергъи бучІантани хъар-хъар-дахъес асубирар бегІтала, узи-рузила арадешличила, белчІудиличила, школала (мактабла) сагати хабуртачила, белчІунси сагаси жузличила...

Илкъяйда салам бедлугни дубурлантала гІядат-цун ахІенну, илдала цараван биэс асухІебируси гІямрула бетуц ва кабиз саби.

Чили Даршдусмазир кадизурти дубурлантала
чизи салам бедлугнила кагибти къяйдуртани
бурули саби чили чизи гъалаб салам бедлу-гусил. Илди къяйдуртала хъулчилизи кабихъили саби халасила, сайичив къиянси агилизивсила хІурматбарни. Ил багъандан гъалайкили салам бедлуга:

— виштІасини гъарил халасилизи,

— катхІел аркъусини лаг лявкъусилизи,

— мурдали (машиналичив, велосипедличив ар-къусини...) хъурали вашусилизи,

— чевакІибсини(шалгІевулхъусини)кабиибтази, тІашбизуртази,

— гІяйибкарли сунени гымукІахъибсилизи, децІагахъибсилизи,

— диркъси мерличиб, — къакъалаб, гъуйчиб, жаняхІлаб — дяхІчили лябкъухІели, гІяхІси бяркъла вегІли гъалаб салам бедлуга.

Илди гІядатуни лебтасалра цати сари, амма гъарил гІяхІси адам гъалаб салам бедес къайгъилизив виэс чебиркур.

Салам Дагъиста халкъани, гъалабра бурили-
бедлугни ва ван, дин хІясибли бусурманти саби. Бу-
дин сурман диннира салам бедлугни чІу-
мали тІалаббирули саби.

Бусурмантала идбаг МяхІяммад сунела агъ-
лулизи хъарикІусири: «Цализи цали салам бед-
лугеная». Ва илини баянбариб: «Гъалаб салам бед-
лугуси Аллагълис имцІали дигахъу».

СУАЛТИ ВА ХІЯНЧУРБИ:

1. Салам бедлугнила къадриличила бурая.
2. Чили чизи гъалаб салам бедлугуси? Сен?
3. Сен ца салам бедни баибси ахІена? ГъатІи селичила хъар-хъардахъес гІягІниси? ХІушала шилизиб селичила хъарбиули бирара?
4. Сегъунти сари салам бедлугнила шайчирти динна тІалабуни?
5. ХІушани секъяйда салам бедлугули дирудая?

Рамазан МяхІяммадов

Салам

Эй, хамси халаурхан,
ХІейги наб хІела салам!
Эй, мезлукъ — шин думкъахъан,
ХІейги хІелара калам!
Бургъалра, гъимбуркІалра
Бархъдеш хІейгутала къам,
ХІейги наб хъулкилара
ТамяхІкарлара салам.

БуцІархІели — цІуэри,
ГушхІели — кѣацІ велкѣари, —
Се бикІаллира гІялам,
Наб гІяхІгѣабзала салам.
Се бикІаллира гІялам,
Наб вайгѣабзала салам —
ЧІянкІхІели — кѣяркѣти чилла,
КѣутІкѣу шуркѣла пигѣала.

Наб хІялалсила салам —
АтхІебла ванал берхІи,
ХІяйбатахѣурли уркІи
Шадирахѣуси вахѣхІи.

Нушагѣуна сай или,
Кѣунба бугѣутанира
Вершала юлдашлира
Магаб наб салам бекІли.



САЛАМЛА ЖУРАБИ

Савлила салам
— хІулбукІари

Савлила саламли адамла абзур
бархІилис уркІила хІял ункъбиру,
разидеш имцІабириу.

Даргантала савлила салам «ВелхІунрив!» саби.
Ил, гъайгъай, даргала аслу-минала дев саби.

ЖъавхІейчибад кабизурси гІядат хІясибли, сав-
лила салам ишкъайда бедлуга:

«ВелхІунрив, МяхІяммад-ада»,

«РелхІунрив, рузи», «ВелхІунрив, Мухтар».

Мактаблизиб муғІяллимтази савлила салам
ишкъайда бедлугни гІядатли бетаурли саби:
«РелхІунрив, Хамис Рабадановна, «ВелхІунрив,
Къурбан Мурадович».

Дагъистайзиб кІирка салам бедлугулира гІяхІ-
цад къаршибиркур: Ассаламу гІялайкум. ДелхІун-
раяв!

Дагъиста цархІилти халкъанани савлила салам
ишкъайда бедлуга: кІарахъантани. — ВорчІами,
булугунани — Израв, къумукълантани — Танг
яхши болсун, лезгибани — Экуънин хайирар.

Савли ахІенси
манзилла
салам

Савли ахІенси манзилла салам дар-
газиб аги-къяйдаличи хІеръили
бедлуга. Аги-къяйдаби биалли чумал
журала диэс асубирар: кайибсиличил

яра чарухъунсиличил къаршиикни, тІашсиличил
яра дуравхъунсиличил цугикни. Савли ахІенси

манзил салам аги-къяйдаличи балбикахъили бедлуга: «Кариилрив, Нурият-аба», «Дуравхъунрив, Къади», «Дуарухъирив, СалихІят-рузи», «Ташизурлирив, Къурбан», «Ташдизурлираяв, гьалмагъуни», «Чарухъунрив, хала дудеш», «Чаррухъунрив, хала неш».

Даргазиб «Гъар ассаламу гІялайкумлис» «Ва гІялайкум салам» биэс гІягІниси саби» — бикІар. Илала мягІна саламлис жаваб бедлуген ибси саби. Дубурланта тІалабуни хІясибли, саламлис жаваб саркъибси ва малхІямси тІамаличил чарбалта. Жаваб чарбирули, вявикІес гъеч асубируси ахІен.

Амма саламлис жаваб бахъ гІяшли чарбар-нира лайикъбарибси ахІен: лихІбазив нукъсансини ил ахІергъесра асубиар. Салам бедлугухІеливан, саламлис жаваб чарбалтухІелира, я алавчарли я сунела гъала хІерикІесра асухІебиар: адамла вяхІлизи вархъли хІерилзуси сай, илхІелира липІхІедикІути хІулбачил вахъхІи вякъитхІейзурли.

БучІантани ил шайчиб ца гъатІи тІалаб лебниличилара багъес гІягІниси саби. Дагъиста халкъанала гІядатунни хІясибли, адам, къанирули сецад гъалакли виалра, салам бедлугухІелира илис жаваб чарбалтухІелира, чараагарли ганз хІярхІебиру, салам бедлугусила яра жаваб чарбалтусила хІурматбарни чебиахъули. Илди къанхІебирули биалли яра барх аркъути биалли, салам-каламлис гІергъи арадешличила яра цархІилтачила хъархъардирхъу, ихтилатбиру, аги-къяйдаличи хІеръили, гІяхІдеш булга.

ЖамигІятла гІямрулизиб салам бедлугнила халаси къадри лебси саби. Даргантани ил къадри буралализиб ишкъяйда аргъахъиб:

«Кабиибтази — «Кадиилраяв!», лѣбкѣутази — «Лѣркѣулраяв!» вѣклѣдли, хІу адам ветаруд». Чебиуливан, салам хІелугуси даргантани адамлизи халирули ахІен. Иличила цалра учІанни гѣеч хѣумартес асухІебирар.

Ассаламу гІялайкум — Ва гІялайкум салам» Дагѣиста лебилра халкѣанас кумхаси ва гІярабуназибад гІебасибси салам саби, сабира дуги-хІерила лерилра манзилтазиб бузахѣуси. Илала кІел жура лер: таманси ва таманси ахІенси: таманси ахІенси — «Ассаламу гІялайкум», таманси — «Ассаламу гІялайкум ва ряхІматуллагѣи ва баракатугѣ». Таманси жура имѣІаливан динна агѣлули пайдалабиру.

Амма дубурла дахѣал шимала гІядатунани никІабас, гІулухѣабас ва хѣунул адамтас ил салам бедлугахѣес лайикѣбарили ахІен, хІятта ил салам хѣунул адамтанира бедлугути даргалара камти шими лердиалра. Илала сабаб ил саламла кІиэсил мягІнализиб чебаэс вирар: 1. «ХІушаб даршудеш биаб — хІушабра даршудеш биаб» ва 2. «Набзибад (нушазибад) хІушаб урехи агара». Ашкарлигу, халкѣли никІа дурхІя цІакѣти мурул адамтази — «Набзибад хІушаб урехи агара» вѣкІни лайикѣсилизи халбарили ахІен. «Ассаламу гІялайкум ва ряхІматуллагѣи ва баракатугѣ» ибсила мягІна ишгѣуна саби — «ХІушаб даршудеш, Аллагѣла уркІеѣи ва баракат дѣаб».

СУАЛТИ ВА ХІЯНЧУРБИ:

1. ГІебасибси ва аслу-минала саламти лерниличила бурая.

2. Салам секѣйда бедес гІягІниси? Жѣаваб секѣйда чарбалтуси?

3. Сегъуна жаваб бедлугуси савли? Хіерейс? Дуравхъун-
силизи? Кайибсилизи?

4. Хіушала шилизиб салам бедлугнила хасдешуни лерал,
пикридухъена. Илис мисалти дурая.

5. Класслизир чумал тяхІярла аги-къяйда пикридарили,
салам бедая ва жаваб чарбарая:

а) ца учІан 60 дусла ухънази халварили, ил кайили
сай, б) катхІел аркъусилизи, в) бархІехъ чарулхъусилизи,
г) зилантала къукъяличи ца гъамирули, д) кайибсила мя-
кълавад шалгІевулхъули.

Рамазан МяхІяммадов

ВелхІунрив, никІа багъадур

— Ну аркъулра, неш.

ТІалабкарти ва дигили дицІибти нешла
хІулбани уршила куц хъярхъли хІербариб, амма ил
вегІварнилизиб сегъуналра къаяв аги. Уршиличирти
палтар илкъяйда далдикилри ва чедетаахъили
ибгилри, хІятта ил Цаибил сентябрьла байрамлис
мактабла бяхІилизи биршуси суратлизивад
кацІибсигъуна сайри.

— Селра хъухІертуррира, дила багъадур?

— ИшбархІилис хІяжатти лерилра ваяхІ каси-
ра, неш.

СалихІ къакъакад ватихъиб. Хапли илис даим
тетрадуначилси мугІяллим къарширикиб.

— РелхІунрив, Муслимат Расуловна! — вавала
гъайкІариван зайбухъун дурхІяла тІама.

Муслимат Расуловна декІти пикрумазирад
черсаргъиб, алавчарли хІерризур; никІа дурхІя
чеили, шалали пишряхъиб ва жаваб чарбатур.

СалихІ гІинизла мякъла каиб. Илаб хабуртази
ахъили, чумал хъунул адам лугІмесли бакибхІели-
ван цаличи ца цІапакири.

— ДелхІунраяв!

Цапакунти цализибад ца къяббердиб ва, никІа дурхІа чеили, уржили салам бедиб:

— ВелхІунрив хІура, урши.

СалихІли сунела гъуни даимбариб. Удивван илини сунела юлдаш чеиб ва дуцІухъун. Амма ил юлдашлис гІевваайчи, сатхІелси кьякъалавад дуравхъи, берхъибси муцІурла вегІ тјамада лагвяхІ ватихъиб. Иличи гъамирухІели, дурхІяли ганз хІярхІбариб: халасила мякъалавад дуцІикІули шалгІевухъес илис цІахбизур. Тјамаданира учІанна ил баркъуди хІясиббариб.

— ВелхІунрив, адавзи ГІусман! — зайбухъун дурхІяла тІама. — ХІед гІяхІ сягІят бираб.

— ВелхІунрив хІура, никІа багъадур. Бура, гъари, къучакъ, ну архІяличи дуравхъни секъяйда багъуррил.

— ХІу бергарагличил шилизивад савли хан гъуйчивяхІ аркъулри. Илбагъандан хІу архІяличи аркъули ургар или гъанбикиб. Ну хатІаикили виасли, хІу чевверхи, адавзи ГІусман.

— «ХІу бергарагличил шилизивад хан гъуйчивяхІ аркъулри», — тикрардариб ухънани СалихІла гъай, ва илала дяхІ сенрил шаладиуб. — Ге, хІу вархъли сайри, никІа гІякълукар, — хала гъигъбушиб ухънани ва СалихІла хъуцІарличи някъ кабихъиб:

— Баркалла, багъадур, баркалла хІед ва хІу алкъути бегІтас. Сеннира илдас нуни жамигІятла гъалаб баркалла балахъис. Ил барес нуни чейсулра, — ва пишяхъили чебатур, — итхІелла пионер сайливан.

Савлила заклизиб берхІи, шалати нурли адамтас сахаватли пархбикІули, малхІямли пишбяхъилри.



ХІУ БЕГІТАЗИ ВА ТУХУМЛИЗИ ДУГЪАИЛЗУЛРИ



**БегІти
ва тухум**

Дагъиста халкъанала гІядатунани гъарил адамлизибат тІалаббириули саби бегІ гъалабси яргалис сунела бегІтала, узи-рузила ва тухумла хІурматбарни.

Гъайгъай, гъарил учІай сунела бегІти ва тухумти ункъли бала: дудеш, неш, хала дудеш, хала неш, рузи, дудешла узи, дудешла рузи, нешла узи, нешла рузи, узикъар, къариган ва цархІилтира.

Илдази вархъли дугъаилзес чебиркур, сенахІенну сунела бегІтала, узи-рузила ва гъамтала хІурматбарни илдази дугъаилзнилизибра якъинни дакІубулхъан. Илкъайда, вегІла тухумтира балес чебиркур, илдази вархъли дугъаилзесра.

БегІтази,
хала бегІтази,
узи-рузилизи
дугъаилзни

БегІтази, хала бегІтази ва узи-
рузилизи дигиличил ва малхІямли
дугъаилзуси сай. Чурхли яра ил-
даци хІерхІейкІули дугъаилзес асу-
хІебирар.

Сунела бегІтази дугъаилзухІели, ишдигъунти
дугъби пайдаладиру: дудеш, неш, ази, аба, жан
дудеш, жан аба, я аба, я ада, я дила неш, я дила
дудеш, жан хала неш, жан хала дудеш, я хала неш,
я хала дудеш ва цархІилтира.

«Нура хІечил вакІишав, дудеш?», «ХІу жяв-
жявли чаррухъенгу, жан аба», «ВелхІунрив, хала
дудеш», «Ца хабар бурагу, хала неш», «Жан хала
дудеш, нура хІечил укабагу», «Анхълизи аркъехІев,
я хала дудеш?»

Узи-рузилизира илкъяйда малхІямли ва диги-
личил дугъаилзуси сай. Нушала гІядатунани илхІе-
ли ишдигъунти дугъби-дугъабизуни пайдаладарни
тІалаббирули саби: «узи, рузи, я узи, я рузи, жан узи,
жан рузи, дила узи, я дила рузи» ва цархІилтира.

«ХІуни дурсри хІядурдарилрив, рузи?»
«БелчІахъес жуз бихагу, жан узи».

Тухумлизи
дугъаилзни
Нушала чихъти адамдешла гІядатунана
ни тухумлизира хІурматличил ва
малхІямли, илдала уркІи разибиэсли
дугъаилзни тІалаббирули саби.

Илбагъандан гІямрули сайичив халаси тухум-
лизи дугъаилзухІели, «дудеш, ада, неш, хала дудеш,
хала неш, адавзи, дудешла узи, нешла рузи» ибти
ва царалти дугъби пайдаладиру:

«ХІела арадеш сена, дила адавзи?», «РелхІун-
рив, нешла рузи», «ХІу рикІуси бирис, зизи»,

«Нушачи хІякъяду, Мустапа-ада», «Нуни кайсисну, тавра биха, хала неш».

Сай дугъаилзуси тухум зилан яра сайичив виштІаси виаллира, илала хІурматбарни якъин-бирахъути дугъби пайдаладиру: «узи, рузи, дила узи, дила рузи, жан узи, узикъар, рузикъар, жан рузикъар, я узикъар, къариган» ва цархІилтира: «ХІу хІулкІули чарухъаби, дила узикъар», «ХІела архІя гъарбизаб, дила рузи», «ХІу нушачи рашигу, жан рузикъар».

Дагъиста царалти халкъаналара бегІтази ва тухумлизи дугъабилзнила къяйдурти илдигъунти сари. Масала, лезгибала хъалибаргуназиб гъайби-кІес бурсибирути биштІатазибад бархли тІалаббину, гІеббуру: «адавзи а», «зизи а», «узи а», «рузи а».

СУАЛТИ В А ХІЯНЧУРБИ:

1. БегІтази секъяйда дугъаилзес гІягІниси? БегІтази хІуша секъяйда дугъадилзулрая?

2. Хала бегІтази, узи-рузилизи ва тухумлизи секъяйда дугъаизес гІягІниси? Илис мисалти дурая.

3. Сен чурхли яра ахъси тІамаличил дугъаизес асу-хІебируси?

4. Ца учІан: а) узилизи, б) дудешлизи, в) узикъарлизи, г) адавзизи халварили жуз гахъес, кІинайс шадив укъяхъес пурбанбарахъес дугъадизирая. Илала гІергъи рурсбира илкъяйда дугъабизахъая.

5. ГІергъиси хабар белчІеная ва илини се гІеббурулил, бурая.

Хала дудешличив

— Галга цІедеш хІясибли бала, адам — баркъудлуми хІясибли, — иб анхъчи ХІябибуллагъли кІел бархІи гъалав бегІтачил шагъарлизивад вакІибси уршила урши Мурадлизи. — ИшбархІилис хІянчи диахъехІе, нушанира нушала кІялгІялизи гъайбирехІе.

Ухъна разили сай: иш назикси мархІя дусмала бакили зурба галга бетаахъалра, илала цІедеш цІикІти яра къяржа детхІерар. Юх, никІа мархІя шагъарла кункти дугІбани балкІахъи ахІен. Хъярла хъитІализибад жярла мурчІ бетхІерар, — пахруба-риб тјамадани чула къамличи.

Хала дудешра Мурадла кІидерхІла къушла гъала бетаиб. Някъби-къяшми ицули лебли, илдачи мотоцикла тІама чехиб.

Чумал минутли мотоцикличиб Мурадла дудешра нешра дурабикиб.

— Ассаламу гІялайкум, анхъчиби. ХІуша дамсра дамсурли, гушра диубли дургудая или, хала нешли чудухинкІала къям бархъиб.

— Хабчабли хІушаб паргъатдеш хІегиб биэс, дила дурхІни.

— Марлира, бархІехълис нуша хала нешли Мурадличи къалабадарира, дудеш, — иб Зайнабли.

— ХІед анхълизиб гІяхІбизуру, дила урши? — дугъаизур Расул. — Ишгъуна дугІла жагадеш хІуни шагъарлизиб чехІебиид.

«Агъ, дила урши, шагъарли хІечи асарбарили

саби, — пикриухъун ХІябибуллагъ. — Ишди пергерти мер-муса, нуша чучи ишцад бурсити, дугІла тІабигІят дуили сари, алавчарти дубуртала гъайбатдеш ва чихъти кагибдеш — дугІла жагадеш. Гъайгъай, шагъарла «дугІла ахІенси жагадеш» алапала хІянчизартани балкъаахъурси, гъалагбарибси, къицІбарибси ва шинни аркибси саби. Ялгъанси ва мялицІси».

Пикруми къябаили, ил Мурадлизидугъаизур:

— Сен дархъилира хала нешли чудухинкІи, дила духучан?

— Деркахъес ахІенара, я хала дудеш?

— Марлира, дургар, дила Мурад.

— ХІебиалли, хала дудеш, илини нушачи дакІубарибси къайгъи заманаличиб къиматлабарни гІяхІси ахІенрира?

— Бархъси гъай саби, дила лачин, бархъси.

БирцибхІеливан умуси хъанцІа заклизир зубарти пархдохъун.

— Неш, ва неш, лехІризигу... ишабси лехІдешличи. Иш... иш...

— Гъайбатси саби эс дигулрив, дила лачин?

— ГІе, гІе, хала дудеш. Амма иш бибкІибси лехІдеш ахІен. Иргъулрив, неш, ва неш, секъяйда шявхъбухъунал назикси цІуэри? ИлиникІун къарра вавнира хІясратли хІяршдирусигъуна саби. Нешли сунела уршиван. Амма цІуэри кункли вяшарбухъи кІунбацІиб. Илала малхІямси хІяршличи хІясратти къар гІяхІцадхІи къухІли калун. Юх, юх, неш, цІуэри, децІлизир къар датурли, кІунхІебацІиб.

— Ил галгубала хъар къамаличи абацІиб.

— Се бирули цІуэрли илаб, дила урши?

— Иргъулрив, неш, галгубала хъаранала шадти вяшаръала? Илди даимти юлдашуни галгубалара цІуэрилара дукелцІи сари.

— Селичи дукаркІутира илди, дила лачин?

— Галгуби, дила неш, цІуэрила малхІямдешличи хІясратли къухІли калунти къарличи чула ахъдешличирад гъими агарли пишдирхъули вяшардикІули сари, цІуэриличил пишнадиркъули.

— Сари, дила урши, сари.

ХІябибуллара Расулра нешлара уршилара ихтилатличи шипІбярГили лехІлири.

— Ге, дила неш, къарличи зурба галгуби чула ахъдешличирад хІехарабачиван хІердикІули сари, цІуэри галгубала ахъдешла даимси тяниш биъни хІергъибти шиниша къарличи тамашадирули. Дудеш, дудеш! Ва неш! ХІеръаягу, сегъуна тамашала лехІдеш сабил! Сегъунти гІяхІти ва малхІямти тІамразибад, тІеманазибад цалабикилил, сегъуна цабалгунси, жагаси лехІдеш сабил! Тамашала дубуртала тама шала лехІдеш!

Хала дудешли гІяшли шивкІивъиб:

— ХІела уркІилис, дила шалай, ЧебяхІси тІабигІятла ДигІяндешла дуб гъаргбиуб. Ил гІяхІси лишан саби.

Зайнабра Расулра арбукъес хІядурбиуб:

— Дуги гІяхІси бакІаб, дудеш!

— Дуги гІяхІси бакІаб, урши. Муриси гъанкІ бакІаб, урши, — гІяхІдеш балгун бегІтани.

— ХІушаб гъунби гІяхІдираб, дила дурхІни.

— ХІушабра дуги гІяхІси бакІаб, неш ва дудеш.

Мурад хІякализиди вергур. Ил илбархІила лерил-

ра анцІбукъуни гъандикахъес бекІхІейуб: варгъила къяшмачиб бакІибси гъанкІли сунела бамбала някъбачил Мурадла хІулби кІантІили ва мурили къяпІдариб.

Гъаб-уб хІебиубси кункдешличил савли Мурад чеваргъибхІели, лехІел шайчирти дубуртала гІелабад гъаббикІуси берхІила нуранани алгъай шайчибси дубурла бяхІ варакъбарилри. БерхІила нуранани, кІел дубура цаладыхъили, урхІмешуагар гуми белшири. Тамаша! Мурад берхІила нуранала шаласи гумилиув сайри.

Ил хала дудешличивяхІ ветухъун:

— ВелхІунрив, хала дудеш!

— ВелхІунрив хІура, дила духучан. Савли жявли айзурси чилра пашманиубси ахІен.

Мурадли дубурличи сагадан хІеръиб. Яргаличилси тамаша: берхІила къяжа дубурла бехІличи абацІили цІуцІбиилри ва адамтас разили пишбяхъилри.

— БелхІунрив, берхІи, — малхІямли дугъаизур Мурад.



АДАМЛИЗИ ХІУРМАТЛИЧИЛ ДУГЪАИЛЗЕН

Дагъиста
халкъанала
адамдешла
дугъабизуни.

Дагъиста лебилра халкъанала гІяда-
тунани урхІла, ятла адамтази,
гъалмагъунази, сунела тянишунази,
уртахъунази ва хІебалутази бархли
— лебтазилра веГІла тухумлизиван
хІурматличил дугъаилзни тІалаббирули саби.

Мурул адамтази лезгиби ишкъяйда дугъабилзан:
«халу», «ими», «дайи» (адавзи), «буба» (дудеш,
хала дудеш). Лезгиби хъунул адамтазира илкъяйда
хІурматличил дугъабилзули саби: «хала», «эме»
(нешла рузи), «бажи», «диде» (неш, хала неш).
Рурсбази халати ишкъяйда дугъабилзан: я руш (я
рурси), я хтул (я рурсила рурси), дурхІнази — я хва
(я урши, я уршила урши). Зиланти мурул адамти ва
хъунул адамти цализи ца ишкъяйда дугъабилзан:
«я стха» (я узи), «я вах» (я рузи).

Ил шайчиб пикри битІикІули саби булугуналар
дугъабилзунала тяхІярли: «Ивзрав, бутта уссу
(салам, дила дудешла узи), «Бивзрав, ниттилессу»
(салам, дила нешла рузи).

УрхІла, ятла адамлизи «дила узи, дила адавзи,
дила дудешла узи, дила нешла рузи» или дугъаилзни
— илди чула тухумла даражаличи абикахъили,
сунела неш-дудешлисван илдасра мардешла,
кумекбирес чеаснила, хІурматбирнила хъя саби.

Дагъиста царалти миллатуналара дугъаилзнила гІядатуни илдигъунти сари.

Халасилизи дугъаилзни Гъести гІямрула адамлизи, त्याмадализи, сайичив гІямрула халасилизи хІурматличил дугъаилзухІели, «дудеш», «ада», «хала дудеш», «адавзи» ибти ва цархІилти дугъби чеимцІадирути сари. Хъунул адамлизи дугъаилзухІели биалли, «неш», «хала неш», «нешла рузи», «зизи» иру. Адам валуси виалли, илала ура буруси саби. «МяхІяммад итавахІ арякъун, Мустапа-ада», «Ит иша живаришав, хала дудеш ХІябибуллагъ?», «ХІед гъундури гІяхІдираб, нешла рузи».

Ятла адамлизи «адавзи», «нешла рузи» или дугъаилзнили дарганталара ахъти адабличила, адамдешличила бурули саби, илди тухумла даражаличи абиркахъули.

Дарганти бикІар: «УрхІ хІелусини къариган хІела, къариган хІелусини — узакъар, узикъар хІелусини — узи». УрхІлизи дугъаизес хІебалусиличи ишкъяйда гІяйиббиру: «УрхІлизи дугъаизес хІебалусини, къаригайзи дугъаизес хІебала, къаригайзи дугъаизес хІебалусини — узикъарлизи, узикъарлизи дугъаизес хІебалусини — узизи».

ВиштІасилизи дугъаилзни «ВиштІасира адам сай, — бикІар дарганти, — илизира хІурматличил дугъаилзес чебиркур».

Даргантала гІядатуни хІясибли сайичив виштІасилизи малхІямли ва хІурматличил дугъаилзес чебиркур, у ахъили «узи, рузи, узикъар, рузикъар», «къариган» ибти дугъбира имцІадарили: «ПирхикІличил хІязтамаркъуд, МяхІяммад»,

«КецІа инжитмабирид, узикъар. Илисра хІедван изаруси саби».

Зилайзи

дугъаилзни

Зилайзи зилан дугъаилзухІели, илди дугъби дуру: «узи, рузи, узикъар, рузикъар», «дила юлдаш, дила узи» ва цархІилтира: «ХІела арадеш имцІабиаб, Муса», «Гъариллизир инсап-хІая диэс чебиркур, дила узи», «ХІу набчи рашигу, дила рузи», «ХІед ишаб къулайлибирар, диларузикъар», «АдамлахІурматбирен, дила къариган», «ХІуни адамлизи салам малхІамли бедлуген, узи». ЗягІипсиличи гъаввикІни дубурлантала гІяхІси гІядат саби. Хъябшсиличи, халати ва त्याмадабицун ахІенну, биштІатира, гІулухъабира, жагъилтира башути саби.

ЗягІипсилизи

дугъаилзни

ЗягІипсилис гІяхІси гъайра дарман-бирар. Илбагъандан зягІипсилизи сай гъамли сагъирниличи умут акІахъ-если ва имцІабаихъесли дугъаилзуси сай. Ил — зягІипсилизи дугъаилзнила хасдеш саби. Хъябш-силизи биштІати ва гІулухъаби ишкъяйда дугъабилзан: «ИшбархІи хІела дяхІла ранг дагъесли гІяхІдиубли сари, дила юлдаш», «ХІу гъамли сагъируд, дила рузи», «Нуша гъамли гъатІира дарх хІязтадиркъехІе, Муслим», «ХІу жяв-жявли сагъиаби, Нури-ада. НушакІун хІела сагати хабуртачи хІерлира».

Адамлис адам – дарман. Дагъиста халкъанала бурала.

ЦацахІели гІулухъабани дугъабизни някъ буцниличил чебирцІахъули бирар. Ил зилантани барес асубирар. Амма нушала гІядатунани, чула гІяхІяйзи ахІенси, халасилизи ва хъунул адамлизи гъалаб някъ гъабатахъес лайикъбарибси ахІен.

СУАЛТИ ВА ХІЯНЧУРБИ:

1. Секъяйда дугъаилзуси халасиличи? ВиштІасиличи? ЗягІипсиличи?

2. Сегъуна къадри лебси ятла адамличи «адавзи», «дила нешла рузи», «рузикъар» или дугъаилзнила?

3. Дугъадизирая: а) виштІасиличи: 1. хІейсахъес, 2. пулан адамла юрт чинаб сабил бурахъес, б) зилайчи: 1. хІед кумекбарахъес, 2. жуз гахъес, в) зягІипсиличи: ил араиубли дигни балахъули, г) рурсиличи: 1. кумекбарнилис баркалла балахъули, 2. ручка гахъес тиладибирули, 3. илис кумекбарес хІядурли виъни иргъахъули.

4. ХІушала шилизиб секъяйда дугъабилзулил, ихтилат-барая: халати — халатачи, халати — биштІатачи, арати — зягІиптачи, зиланти дурхІни — зилантачи.

Ильяс ХІясанов

ЧІянкІалавра хІенкъула Ухсарра

ЧІянкІалав ваткайхъили Ухсарличи вакІиб.

— Чинаб лебри викІуда берхІе унц? — хъарбаиб бархъаначи хІенкъулази.

— ЛакІ-лакІуназиб ил нуни белгили чебаира, хІурматла ЧІянкІалав, гІур чехІебаира: ну хІенкъла гІелав сайри. Вархкъя ШапигІ ишбархІи дуки хІекІиб. Хъалибарг зягІипли биэс илала...

— ВяхІ! Дуги гІяхІбираб, Ухсар-урши, ну ита гъаввикІус...

ХІебаргиб сунела вегІли берхІе я ЛакІ-лакІуназиб, я Шурмар бекІличиб, я вацІализиб. ХІебаргиб ца бархІи умцІули, кІел бархІи умцІули, я хІябал бархІи къяйцІли.

ЧІянкІалавлис децІси унц бетахъни ахІенри. Чи-биалра вайгъабза чевдукаряхІили виэсгу ибси пикри къукъула лямцІван бекІлизиб бет-садбухъун...

БерхІе бетахъибхІейчирад, хІябал жумягІ шал-
гІердухъун. Ухсарлизи унцла хІекъ биха викІусира
аги.

Чула ва унрубала хІяйван-къачаличил ду-
ки укъес ЧІянкІалавличи ярга баиб. Савли
гъаббашахъули къатІла хІенкъра сайра къяшла
дякъличи дуравхъунси ЧІянкІалавлис бигъайчил
гІеббитІунси хІябдусан бугъара сайра Ухсар хан
гъуйчив цугсайкиб.

— ВелхІунрив, Ухсар-урши! — ЧІянкІалавли
мурталраван салам гъаббаахъиб.

— ВелхІунрив, дила ази, хІура, — жигарли
жаваб бедиб шантала хІенкъулани.

— ХІед гІяхІ сягІят бираб! Жъавли муза
буцилригу?

— ХІед гъалавхъес или дуравхъунсири, дила
ази, — гъамиубли някъ буциб Ухсарли. Иш
бугъа хІела саби, ЧІянкІалав. Нешла дерхъибти
ниъван хІялалбаиб. Я урхІлизибад я тухумлизибад
гъайла хІебакъахъири. Ну хІезивад урузли виъни
сабабли...

— Агъ, хІела хъали анкІили бицІла Ухсар-
урши, гъатІи хІезибад нуни унцла хІекъ сахІейсни
хІебалули викІулрив? Шанти се бикІара, жамигІят
севан хІербикІара, дила уркІи къалли батал бати?!
Къалабали хІушала къатІла хІенкълизи батаа, чила-
биалра алгъай хІули чегайчи.

— Иш хІела саби ира нуни! Вассалам ва калам,
— бугъала хъяблис алавбарибси бигъала батаиб
Ухсарли, ва, гІелавяхІ шуралра хІяхъили, шили-
зивяхІ ваткайхъиб.

— Ну цІахмайраба, Ухсар-урши! — гІелавад
вявикІахъули ЧІянкІалавра, Ухсар шурмала ургав
ветахъиб.



ГІЯХІДЕШ СЕН БУЛГУСИ

Мурхъси
мягІна

Дагъиста халкъанас дахъал дусмала
манзиллизир къиянти гІямру къадар-
диуб: бекІахъудила ва тІабиГІятла
къиянти шуртІри, кахти излуми, дурала улкнала
гъармукабала даимти чябхъинти.

Илдигъунти аги-къяйдализиб ца адамлис
итилли гІяхІдеш балгнила, гІяхІдешличи илала
умут имцІабиахънила, цали итил гІевуцнила, илис
кумекбарнила, ил къелгІевукнила, цаличи цали
къайгъи дакІубарнила къадри мекелли халасири.

«Адамлис гІяхІдеш барес, адамлис гІяхІдеш
балгес къалабаикІен» бикІар дубурланти. СенкІун
уркІи-уркІикад гІяхІдеш булгусини царалис
ламарт, вершадеш яра уряхІти кІибяхІяндеш
хІедиру. Дагъиста лебилра халкъанани ламарт,
кІибяхІяндеш, вершадеш мурталра цІахдешлизи,
усалдешлизи халдиру.

ГІяхІдеш балгнилира адамличи бирхауди
имцІабиру. «ГІяхІси гъайли адамла уркІи рази-
биру, уркІила гъав цІакъбиру, иличибли илала
бузерила сабухъчебдеш бархли имцІабиру» —
бикІар дагъистанланти. ГІяхІдеш булгуси адамла
даража, шанти-ургар хІурмат-хатир, сунечи диги
чеимцІадирар. Гъарилли цалис цали мурталра
гІяхІдеш булгалли, ахирра адамтала жамигІят
имцІали дигичебси бетарар.

Чис
гІяхІдеш
булгуси

ГІяхІдеш балгнила дугъби гІямрула лерилра шуртІразир пайдаладарес хІядурли булгуси мезлизир лерти сари. Илди жявхІейчирад халкъли акІахъуб, наслуличирад наслуличи дашули, нушачи даиб. Илди, гъайгъай, ишхІелира алкІули сари.

Чис гІяхІдеш булгуси? Дагъиста халкъанала гІядатунани ил суайс якъинси ца жаваб лугули саби: гІяхІдеш булгуси саби гъарил адамлис. СенахІенну гъарил адам хІурматличи ва гІяхІдеш балгниличи лайикъси сай.

ГІядат хІясибли, дубурланти хъайчикабиитачи, саби халаси ва даимси талихІлира баракатлира гІеббуцахъес, гІяхІдеш балгнила дугъбачил дугъабилзан, урши-рурси акІубти бегІти биалли илданичула акІубсила гІямру талихІчерти ва духъянти детаахъес, ил хабардерхурси, шила багъа бакІахъеси багъадур ветаахъес, уркІи-уркІикад мубаракбиро.

ГІяхІдеш балгес хъумуртуси ахІен хъу балцуси хъубзарлизи я дурзамличилси букІуйзи. Илди санигІятунала халаси манпагІятдешличила балули, халкъли илдас гІяхІдеш булгнила дахъал дугъби акІахъуб.

УркІи-уркІикад гІяхІдеш булгуси саби веГІла хІяжатдеш ахъибси устази, се-биалра асибси муштарилизи.

Школала (мактабла) мугІяллимтази ишкъяйда гІяхІдеш булгули бирар: «ХІед пасихІти бучІанти къадарбиаб», «ХІела лебилра бучІанти пагъмукарти бетааб», «ХІела лебилра бучІанти кабизурти адапти ва сайвеГІуни бетааб»,

Илкъяйда гІяхІдеш булгу гъункъязи, архІяличи

аркъусилизи, гІярмиялизи гъуниввалтусилизи, «хІушала урши хІулкІули чарухъаб» или, илала бегІтази, базарличи дуравхъунсилизи.

ГІяхІдеш булгуси саби мукърала бегІтази, шадлихъла авидлизи кабиибтази, байрамличи аркъутази, байрамличибад чарбиубтази.

МицІираг белгъунтала мякълавад шалгІевулхъухІели, саламра бедили, дарган «ХІуша хІялбала дирабая!» викІар.

Муръаличи кабиибтази биалли илдала децІани хІярхІдиахъести, уркІурбази сабур картІести, чус илгъуна анцІбукъ гъатІи къадархІебиубли дигни иргъахъути дугъби дуру.

ГІяхІдеш булгу мактаблизи аркъусилизира: «ХІед ишбархІи гъарбизаб», «ХІед ишбархІира гІяхІти къиматуни дикаб», «ГІяхІти къиматуначил уркІи шалали чарухъаби», — или.

Чебиуливан, халкъанала дахъал наслубани адамла гъарил гІяхІси ганзлис гІяхІдеш балгнила дугъби акІахъубли сари, гъарил адамлизи гІяхІдеш балгнила илди дугъби дуресли кабихъили, кабизахъурли саби, адамлис гІямрулизир чІянкІли гІяхІдешуни, гъарбизуни, талихІ, арадеш, хъулиб баракат ва цабалгундеш диубли дигни балахъули. Гъайгъай, гъарил адамли дубурлантала ил рухІла къанун цаван бузахъалли, жамигІятлизиб вайдешлис, къясдешлис, убяхІдешлис мер кахІевлан. Ил багъандан сари Дагъиста халкъанани илди акІра акІахъубти. ЦабутІаван, адамтани цалис цали гІяхІдеш булгни адамтала жамигІят гІяхІси бетарниличи ца бягІуси дякъ саби. Нушабра ил дякъкад дашес гІягІниси саби.

СУАЛТИ ВА ХІЯНЧУРБИ:

1. Адамлис гІяхІдеш балгнила кьадриличила бурая.
ХІушала бегІтани дурути гІяхІдеш балгнила дугьби гьандикахъая.

2. Адамла хІурматбарни селизиб дакІубулхъана?

3. Чизи гІяхІдеш булгуси?

4. ХІушани чизи ва секъяйда гІяхІдеш булгули дирудая?

5. ХІушала шила гІяхІдеш балгнила дугьби дурая.

С.Рабаданов

Сирила мякълар дурибти чархараби

ТалихІли сай варгеси
Ветмааб сирилавси,
Сунни талихІ бургуси
Ветааб сирилавси.
КъацІла у хъумхІертеси
Ветааб сирилавси.
Душманра гьалмагъварес
Сунезиб пагъму лебси,
Аммаки цалра гьалмагъ
Душман варес хІейруси
Ветааб сирилавси.
Лебси саби ца секІал
ГІямрулизиб гІеркъаси —
Сунес цІахдеш бикІуси,
Ил секІал хІебагъеси
Ветааб сирилавси.



ЧИЗИ ВА СЕКЪЯЙДА ГІЯХІДЕШ БУЛГУСИ

Дунъяла бахъал халкъанала хІедургар Дагъиста дубурланталагъунти тамашала адамдешла гІядатуни. Илдазирад инсайчи дигили дицІнила шайчир хаслира декІардулхъули сари гІяхІдеш булгнила пергерти гІядатуни. Илдигъунти гІядатуни чІянкІли гІяхІти, сахаватти адамтала дирар.

Дагъиста лебилра халкъанани гІяхІдеш булгу гъарил адамлис: биштІатас, жагъилтас, त्याмадабас, мурул адамтас, хъунул адамтас, вегІла шайс, дурашайс, гІяхІяйс, вегІлайс ва царал миллатла вакилтас.

Хъубзарлизи ва букІуйзи Дагъиста халкъанала яшавла даража ва баракат хъубзарла ва букІа бузерила сабухъчебдешлизибад дигахъусири. Даргантани хъубзарлис ва букІуйс ишкъяйда гІяхІдеш булгни гІядат бетаурли саби: «ДегІунти верхІкъярякъли дакІаб. Держъили дакІаб. Бучибси сабухъ баракатбиаб. ХІела унцани дамсни мабагъаб. МаранкІили хІела лерилра усурби дицІаб. ХІянчи гъамадбиаб. ХІела гъар мазали хІяб-хІябал мукъара даркъаб. ХІела маза-маслис къарани дерхъаб. Дахъдааб хІела маза-мас» ва цархІилтира.

СяхІбатличир СяхІбатличи вакІибсини мекъла бегІтази яра хъайчикабирутази чара-

агарли гІяхІдеш балгнила дахъал дугъби дуру:
«Гъарбизаб хІушала мекъ. ХІушала мекъ гІяхІси
сягІятличиб балбикаб. Сагали хъайчикабиибтас
мурталра талихІ, арадеш диаб. Цікурини хІушала
хъалира гІямрура шаладараб. Муруйс верхІел
нарта верхІел исбагыра баркъаб ХІуша дарх
духънадаабая. Сагати хъалиціа талихІчерти детааб.
Хъалиціа талихІчерли дуркъдиаб».

Гъункъязи, АрхІяби дахъал журала дирар:
архІякъянази гІярмиялизи, шагъарлизи, гІузру
хІясибли дураша... АрхІяличи ду-
равхъунсилизира гъункъязира, гІяхІдеш булгули,
шанти ва юдашуни, ил гъуниввалтули, ишкъяйда
дугъабилзан: «ХІу ара-сагъли чарухъаби. ХІед гъун-
дури гІяхІдираб. ХІед бухъянси гъуни къантІбиаб,
къантІсира гъамадбиаб. ХІед гІяхІсягІят бираб.
Къяшми кункли, хунжи декІли вакІаби. Ду-
бурлантала яхІли вархъматаби. Мурадличи вааби».

ВиштІаси ВиштІаси акІубхІели дурути гІяхІдеш
акІубхІели балгнила дугъбира дахъал лерти
сари. Илдазирад цацадехІ гъандур-
шехІе: «ХІушала акІубси гІямру духъяна ветааб.
ХІушала акІубси ара-хІулкІули халавааб. АкІубси
хІушала юртла тІал ветааб, дудешлис — лехІел
някъ, хъучив — хъубзар, мекъличив делхъчи
ветааб. ХІушала урши (рурси) хІушани ва шантани
пахрубареси ветааб (ретааб). ХІушала урши сартан
беціла хІули сайтІеси ветааб».

Муръаначиб Муръала агълуличил, вебкІибсила
узи-уршиличил, лебилра тухумли-
чил ва шантачил деці буртІули ва батаурсиличил
пашмандеш балахъули, дубурланти бикІар: «Сунени

хІяб шалали баргаб, хІушаб арадеш биаб. Сай гьалжанала агьлу вараб, хІушала уркІбази сабур картІаб, хІушаб гьатІира биштІати габ, сай хІушаб гьалжанализив багалавиаб. Аллагь илала бунагь-хатІаличивад чевверхаб. ХІушала ил децІ бегІла гІергьиси бетааб. ГІурхІели хІушаб гІяхІси анцІ-букьличи цаладикес къадарбиаб» ва цархІилтира.

Сагаси
палтар,
ваяхІ
асибсиз

«Чарх арали дурдаби. Илдигъунти исули ва дуркъдирули, гІямру деркІаби. Асибси хІед баракатбиаб — бикІар дагьистанланти муштарилизи, ил мубаракирули.

ЗягІипсиз

ГІяхІси гьайра гІяхІси дарман биъни балули, Дагьиста лебил халкъанани

зягІипсиз гІяхІдеш булгнила дахъал жураби акІахъуб: «ХІела изала савилис (яра бархІехълис) чебарбукаб. Аллагьли хІечи уркІецибараб. ХІед арадеш имциабараб. ХІед разидеш имциабараб. ХІушала юртлиз гьатІи разидеш ахІенси изала хьурамабиаб».

ГІяхІял
вакІибхІели

ЮртлизигІяхІялацІибхІели, даргала, лезгибала, табасарантала, къумукълантала иличи «Хошгелди!» или

дугьабилзан. КІарахъантани ишгъуна буру: «ЛъикІалъе батаги!» — ХІу вакІни гІяхІдешлис биаб». Илди дугьби ишкъяйда чедирцІахъу: «ХІуни мурталра разидеш бихаби. ХІела гьар ганз гІяхІдешлис биаб».

Гьести
гІямрула
хьунул
адамтази

Салам бедили гІергьи, гьести гІямрула хьунул адамтази ишкъяйда дугьаизни лайикъбарибси саби: кІарахъантани: «Дур ва сал чакъад!»

— Арабиаб хІела дурхІни; булугунани: Арсурвавран
цІуллушиву чан кѣаданнав — ХІела дурхІни
хІербирули калаб; лезгибани: «Ви балаяр сагърай»
— ХІела дурхІни арабиаб» ва цархІилтира.

Укусилизи Ишкъяйда дугъабилзан: «ХІед бер-
кала ашааб, узи. ХІушала къумур-
лизиб баракат каммабиаб. Беркала хІялалбиаб.

ДекІариркухІели Ишкъяйда иру: «ХІу арали калаби,
Рашид. ХІед бархІехъла гІяхІди-
раб, ПатІимат. ХІед дуги гІяхІси бакІаб, ПатІимат.
Хъулиб баракат каммабиаб. Мулк-муса эркинти
детааб».

Устази Ишкъяйда иру: «Баркалла. ХІела
някъбас къуватра, хІулбас шалара,
чархлис арадешра каммабиаб».

**Шадлихъла
агълулизи** Шадлихъла бутІакъянчибази салам-
ра бедили, ишкъяйда дугъабилзан:
«ХІушаб илдигъунти шадлихъуни
баракатдиаб. ХІушани гІямру шадлихъуначир дер-
кІабая. ХІушаб шадлихъуни ва байрумти ахІенси
балагъ-къадар къадармадиаб. Байрамличи кайцІуси
хІушала гъарил ганз баршаб. Хъулирра хІушаб
байрамгъунти гІямру къадардиаб» ва цархІилтира.

СУАЛТИ ВА ХІЯНЧУРБИ:

1. Секъяйда гІяхІдеш булгуси хъубзарлизи? БукІуй-
зи? Гъункъязи? Укусилизи? БархІехъ яра дугели
декІариркухІели?

2. Секъяйда дугъаизни лайикъбирули сяхІбатла бегІтачи,
бебКіала бегІтачи, сагати палтар асибсиличи?

3. ХІушала шилизир ил шайчир секъяйда гІяхІдеш
булгулил, пикридухъеная ва бурая.

4. ГІяхІдеш балгеная ва жаваб чарбарая ца учІан халварили: а) хтѹ балцуси хтѹбзарлизи, б) букІуйзи, в) сагаси хІева чегъурсилизи, г) архІяли аркъусилизи, гъ) дугели декІариркусилизи, гь) гъести гІямрула хъунул адамлизи, гІ) укусилизи ва цархІилтира.

5. ГІергъиси белкІли се гІеббурулил багъес, ил белчІеная.

ХІябиб ГІялиев

ДуббатурхІели

*(ГІямар ва Шамай ГІямарла Батирайла бегІти саби,
Аминат — хъунул)*

Аминат Шамайла шулгІи гугриибхІели, ГІямарли дуббатла балга таманбирулри:

— АлхІямдулиллагъ! ХІябилра бизити чудни лерри! Сари даркъибтала анкъилаб цІара, цІаличиб шангра каммадиабгу бегІла вай заманара. Юртличибси баракатлира, хъалибаргла талихІлира хІулруркІахъули калаби хІу, дила Лейла Шамай! Хъали аваданбиабгу хІела! Илагъи, баркаллабиаб хІедра, дила рурси Аминат, ишдигъунти бизити чудни даркънилис. Нуни беркунси чудула дубцадалра агри чемабааби хІуни.

— Аллагъли аргъаб хІела, дила ГІямар. ЧархбекІ хІелара арали калаб, беркунси ашааб, калунси хІялалбиаб, — разили рикІулри Шамай.

ГІямар гъалакли айзур ва маргъличивяхІ вати-хъиб.

— Муйли-дурхІни чудна балхули деркІаба хІушани гІямру, — иб аркъукад ГІямарли.

— ГІямру детІайчи калаби хІу, дила ГІямар, — муруйс гІергъи гІяшли иб Шамайли.



ГЪАЙЛА АДАБ ВА АБАДЛА ГЪАЙ

Цадеш Гъаларти дурсрачир нушани салам
 бедлугнила, дугъаилзнила, гІяхІдеш
булгнила Дагъиста халкъанала гъарли-марті адам-
дешла гІядатуні гъандикахъира. Илди гІядатуні
Дагъиста халкъанани ца гъатІи мягІничебси шали-
личил — абадла гъайличил — чедицІахъиб.

Дагъиста халкъанала дагърилизиб салам бедлуг-
нила, дугъаилзнила, гІяхІдеш булгнира гІядатуні ва
абадла гъай белхъхІебелхъуси цадеш саби, сунесра
къантІли гъайла адаб бикІуси: илбагъандан илди
дарх дузахъес гІягІнити сари.

Гъайла абадла хъулчилизиб адамла хІурмат-
барни, жамигІятлизир адамдеш, диги мурхъдарни
ва минадарни саби, адамтала уркІурбазиб лебил
жамигІятлис цаси рухІла низам кабизахъес. Дубур-
ланти «Гъайла адаб адамли адамлизі бедлугуси
нурла чирагъ саби» бикІар. Илбагъандан саби нуша-
ла гІядатунани гъайла адаб (сунела авалра бутІа-
личил) дурусли ва тамай бузахъни тІалаббируси.

Абадла Абадла гъайла къадри гІячихъли
гъайла чебиахъути анцІбукъуни гІямрулизир
къадри гъар бархІи къаршидиркур. «МухІли
 лебси — мурдали, урчила вегІ —
хъурали», — бикІар дарганти, цабутІаван ил бурала
гъайла абадличира чебетихъули ва абадла гъайли

адамлис сай мурадличи ваахъес кумекбирниличилишанбирули. ГІямрулизиб ишгъуна анцІбукъ бирар. Нурины сунела кІел юлдашлизи кумекбарес бакІахъес жиили сай. «Гъавра хІейкІус!» — къантІкайубли сай Къурбан.

«Сепайда, дила узи, ишбархІи дила имкан агара къадин, — викІули сай СалихІ. — Илбагъандан хІу набчивад иш гъакІлис чевверхи. ГІурхІели сегъуна хІяжатдеш ахъалра, ну сеннира хІела арилиув вирус».

КІелра юлдашла жавабла мягІна ца саби: «ХІякъяс». Амма Нури кІелра юлдашличи цаван гъимхІевкІиб. Сен? АнцІбукъ юлдашунала цали сунела жаваблизир абадла гъай пайдаладарнилизиб саби.

Абадла гъайли адамличи бирхауди, диги, игъдибар имцІадиру, хІурмат ахъбурцу. Нушала гІядатунани тІалаббируси къяйдали, илди гъай лебтанилра цаван дузахъалли, арагІеб жамигІят гІяхІси бетхІеэс имкан агара.

Абадла	Абадла гъай Дагъиста лебилра халкъа-
гъай	нала лерти сари.

Даргантанира ихтилатуназир, дугъабизуназир дахъал абадла гъай пайдаладиру. Илдазирад гІулухъабанира жагъилтанира имцІаливан дузахъу:

а) баркалла, баркалла гІяхІси гъайлис, баркалла ну гъаникахънилис (гІевуцнилис), хІела жан дат, хІела хъали мабуъ, хІела хъали гІяхІбиъ, марлира, или сабив, хІела жайчира, хІерагу ца, вирхаи;

б) замана агаракъадин, замана биалли, замана биалри лявкъяси, замана биалри бираси, дила имкан агаракъадин, нагагъ имкан биалли, сепайда,

сепайда дила ахъри агара къадин, сепайда, дила имкан хІебирар къадин, гъай гІяйиб гъай, хІу чевверхи, хІу чевверхи хІейгеси бурили (барили) виасли, ягъари, — гу ва цархІилтира.

«Абадла гъай мялхІямси гъай саби», — бикІар дарганти. Илбагъандан «малхІямси гъайли абитІунси турра кабикІахъу».

Даргала халкъла малхІямси ва абадла гъайличила дахъал буралаби лер: «ГІяхІси гъай унцлизи булхъан», «Вайси гъайли бекІ булъа», «ГІяхІси гъайли абитІунси турра кабикІахъу, чурхси гъайли кабитІунсира абилтІахъу», «МалхІямси гъай уркІиличи хъярхъли биур», «Вайси гъайли барес хІебируси, гІяхІси гъайли биру».

Даргантала пасихІси бурала леб: «Халасилис урши вии, зилайс — узи, виштІасилис — дудеш». Ил дурхъаси гІякълули даргантала гъайла адабла хъулчи белгибариб: «Халасиличил уршиван гъайикІен, зилайчил — узиван, виштІасиличил — дудешван».

Нушала гІядатуні хІясибли салам бедлугнира, хІурматличил дугъаилзнира, гІяхІдеш булгнира, абадла гъай пайдаладирнира цализирад ца къябхІедердахъили, дарх дузахъу.

СУАЛТИ ВА ХІЯНЧУРБИ:

1. Гъайла адаб се сабил, сегъунти бутІназибад цалабикибсил, бурая.

2. Даргантала цацадехІ абадла гъай гъандикахъая. ХІушала шилизир сегъунти абадла гъай имцІали дузахъулил, мугІяллимличил белгибарая.

3. АлхІят бархІи мактабла анхълизиб дурабуркІуси

билхъализир гІузру лебли хІуни бутІакъяндеш дарес хІерни абадла гъай пайдаладарили аргъахъа: а) мугІяллимлизи, б) юлдашлизи, в) валхІелуси адамлизи, 2-ибил класслизи ручІуси рурсилизи.

4. ХІяжатти абадла гъай дурили, хІези жуз гахъес къабуликахъа: а) хІела юлдаш, б) риштІал рузи, в) дудеш, г) камли тянишси адам, гъ) мугІяллим, гъ) библиотекализир рузан Хамис СалихІовна.

5. Гъайла абадличила даргала халкъла буралаби гъанди кахъая.

6. Се иргъахъули гІергъиси хабарли?

Рамазан МяхІяммадов

Адамлис се гІягІинили

Мактаблизирад арцурсиван кункли ляркъуси Аминатра больницализирад ритибсиван зугъали чарриубси Хамисра Аминатхъа къапула гъалаб къаршибикиб. Аминатли ралликъянази арацІахъес тиладибариб. Аминат ил бусравличи хІядурсиван вичІиррухъун:

— Дила бузерила цаибил бархІиличила багъес дигулрив? Гъар секІал лергІер ункъли гъуйчидикиб, дила Хамис. Директорла малхІямдешли хІяйранрарира. Илала дарести камли хІедурги, амма нуша дахъхІи гъибандидикІира. Илини ну институт белчІиниличил ва бузерила бехІбихъудличил мубаракрарира. ЖагасимугІяллимракІни мактаблис гъарбиз саби вики. «Дила рурси». «ХІу мурадли раъ». «ХІела хъали гІяхІбиъ» вики. Гъалана чир хІянчили чир къелгІеррукес, кумекбирес чесиб. БегІтачила жагали суравасиб. Набзиб сегъуна пагъ

лебал, дурхІни дигахъисал, хъарбаиб. Рулхъес, далайрикІес балас ибхІели, хъяшаван разивиуб. Нугъуна духуси рурси сегъуна-дигара хІянчилизира бажардирикур викІи. ТІаш, тІаш! Сен дамкъурли хІела дяхІ, дила рузи? Больницализиб хІед хІянчи агарли уббухъуну?

— БекІ тухтур чеибхІели, уркІи бяргІиб, рузи.

— Сен? Ил дебали къяркъсирив? ТІалабкар-сирив?

— Юх, илис къяркъси сай викІес хІейрар.

— Вайси хІянчи гъалабихъибу, рузи?

— Юх, хІянчилисра вайси саби викІес хІейрар.

— ХІу черрерхи, рузи, амма нуни селра иргъули ахІенра.

— Савли ну бекІ тухтурличи арацІира: «Набчирив? ХІела мурад?» Нуни бурира. «Ишгъуна хІянчи леб. Къабуйрив?» Нуни бекІ гъакІбарира. «ХІяжатти кагъурти дицІахъа, ва итни бархІи хІянчиличи дурарухъен». Иргъулрив — байхъала минутли лерилра бекІдалири, унзала гІелар, дурабушибси кецІаван, рагъарриубра. Шакра хІерикили.

— Агъ, дила рузи, рирхаэс къиянни саби. Илисра адам викІусив?

— ДукелцІи ахІену, ил миъла къалала у Адам сабри. Ну илар илцад ряргІира, хІятта къаркъала гъаннара серсербикІули лебал. ЦІуба халатлиуб миъ, миъла уркІи, миъла къала. Сен адамли адамлис гІяхІси гъай бурее хІебалуси? Пишяхъес сен урузкІусира? ХІу, дила Аминат, халаси гъарбизличил мубаракрирулри: хІу хІянчиличи хъуливан разили рашуд, хъули — байрамличиван шадли.



ХЪАЛИБАРГЛА ГІЯДАТУНИ



Гъарил хъалибаргла сунечицун хастира ва арагІеб миллатлис кумхатира гІядатунни дирар: гІядатунни агарси кулпет бируси ахІен. Дубурланти бикІар: «Уршиличи хІеръили, бегІти сегъунти сабил багъес виар», сенкІун «гІяхІти бегІтала дурхІнира гІяхІти бирар, вайти бегІтала дурхІни — имцІаливан вайти». Халкъла ил бурала барсбарили, цараван бурес виар: «ГІяхІти гІядатуначилси хъалибаргла дурхІни гІяхІти бирар, вайти гІядатуначилси хъалибаргла — имцІаливан вайти, низам булъути, хІебучІути».

Сен

Ашкарливан, адамдеш, инсап-хІяя, ла-
мус, адаб, бархъдеш, уркІеџичевдеш...»
ва цархІилти гІяхІти кѣиликѣуни гѣарил урши-
рурсили бегІ гѣалар хѣалибарглизир кайсу.
Илкѣяйда хѣалибарглизир дуб-дубли кайсу чула
гІурлати гІямрулизир багаладиѣсти бузерила уста-
дешунира. Якѣинси саби, нагагъ бегІти хѣулкни
биалли, хѣулкидеш хѣулир џІахдешлизи халдирули
ва далтІули хІедиаалли, имџІаливан ил хѣалибаргла
дурхІни гІямрула бархѣси гѣуйчибад чеббулкІан.
Ѣгер бегІти дурхІнас чихѣти адамдешла гІибратуни
биалли, хѣулир хѣулкидеш далтІули, пуждирули
диалли, ашкарлигу, ил хѣалибаргла дурхІни
хѣулкни бетхІерар. Чебиуливан, арагІеб жамигІят-
лис хѣалибаргла гІяхІти гІядатунала къадри халаси
саби. Илбагъандан сари Дагѣиста лерилра милла-
туни хѣалибаргла гІяхІти гІядатунигІерли џІумали
кадизурти.

Хѣалибаргла
џаџадехІ
гІядатуни

Гѣарил хѣалибаргла (жагѣил ахІен-
си) сунечиџун хасти гІядатуни дирар:
рурсбани нешла санигІят гІебисни,
уршбани — дудешла, кІел гІиниз
диубхІели, белгиси гІинзи шинничи башни, каби-
хѣес гѣалаб хала дудешлизи хабар бурахѣни, чула
тухумлизивадси дявтала бутІакѣянчила гІямру
гѣандиркахѣни...

Амма хѣалибаргла имџІатигѣунти гІядатуни
лебил шилис, миллатлис ва арагІеб Дагѣистайс
кумхати дирар. Илдазирад сари дурхІнани
чула бегІтала хІурматбирни. БегІтала хІурмат
хІебирусиличи, ил декІси џІахдешлизи халбирули,
шантани мурталра халаси гІяйиб биру.

Дагъистайзиб бегІтала хІурматбирес ибси иш-
къяйда иргъу: бегІ-
тази дигиличил ва
малхІямли дугъаилз-
ни, бегІтала амру бе-
турхахъни, бегІтачи шантани гІяйиббирахъеси се-
кІал хІебарни, шилизиб ва дураб бегІтала хІурмат
асилти баркъудлумачил гъатІира чеахъбирни ва
гІеббурцни.

БегІтала хІурмат
хІебирусилочи гІяхІ хІякъян.
Даргала халкъла бурала.

Хъалибаргла биркІантани барсур кумекбирни:
халатани — биштІатас, биштІатани — халатас,
халати узи-рузини биштІатачи хІерудибирни, ил-
дази насихІятуни дурни, илдас саби гІяхІси гІибрат-
ли биъни) — Дагъиста миллатунала хъалибаргуна-
ла гІяхІти гІядатуни сари.

ГІяхІти гІядатуначилси хъалибаргла урши-
рурси, чучи унра яра гІяхІял вакІибхІели, бусягІят
абилзан ва ил кайахъес ута яра гІянала гъамбиру.
ДурхІнани шадиб аркъухІели, бегІтази хъарбиу,
саби чичи, чина аркъулил ва мурт чарбулхъулил
буру. Къакъалаб цІивхъбикІули, къаркъуба хІертур,
виштІасилис ва халасилис кумекбиру.

Укнила адаб ЖъавхІейчирад кадизурти хъалибарг-
ла укнила адабунира лерти сари:

1. Укес гъалав някъби ицни;
2. Халаси (дудеш) вехІихъайчи, царалти букес
бехІхІебирхъни;
3. Гъар имкан лебхІели, хъалибарг барх букни;
4. БукухІели мялхІямли ихтилатбикІни;
5. КъацІла хІурматбирули, къидикъури дукни;
6. УкухІели къалабахІейкІни, букуси ункъли
чІямбирни.

Гъарил хъалибаргла лерилра гІядатуні дегІла
гІяхІти диэс чебиркур.

СУАЛТИ ВА ХІЯНЧУРБИ:

1. Сен дурхІнани бегІ гъалабси бяркъ хъалибарглизіб
кайсуси?
2. Хъалибаргла гІядатуначила бурая.
3. БегІтала хІурматбарни селизіб дакІубулхъуси?
4. ХІушала хъалибаргунала гІядатуначила бурая.
5. ХІушани бегІтас, унрубас, узи-рузилис ва цархІилтас
секъяйда кумекбирули дирудая?
6. Сегъунти бирара гІяхІти гІядатуначилси хъалибаргла
дурхІни?
7. Пѣргъиси белкІ белчІи пикрибарая.

МяхІяммадрасул

Хала нешла дурсри

Савли чеваргъили, палтарла вегІиубмад, Эсем-
байли хъуливад дуравхъес къасбарибгу, илзамана
цархІил хъулирад рагъарриубси Индирани ил тІа-
шаиб:

— Нешла хъарбаркъличила хъумартуррив?

ХІякизурси узис рузи малхІямли пишряхъиб.

Эсембай хІейгу-хІейгули хъули чариуб ва сунела
буруш ибгес вехІихъиб.

— ТІашизи, гъари, дила лачин, тІашизи, —
иб ил секІайчи кахриубси Ханумли. — Даширая
нушани ишгъуна вягІда бирехІену. Гъаннала гІѣргъи
Индирани рурсбачи, хъунул адамличи дарес хъарти
диру, Эсембайли — уршбачи, мурул адамтачи
хъарти. Къабуллирав илгъуна вягІдаличи?

— Ну къабуллира, хала неш, — иб Индирани,

някъбазибси гІянала баткаили.

— Буруш биресра ибгесра чебиркур чІянкІли хьунул адамличицун.

— Эсембайлисрав гъари? — хъарбаиб Инди-
рани.

— Ге, Эсембайлиса.

— Набчи... илала буруш ибгесра хъарсив?

— Хъарси саби.

Хала нешла жавабтани разиварибси Эсембайли
рузис лезми чебаахъиб ва сагадан хъулилад дурав-
хъес вализур, амма Ханумли илал хъуцІарличи
някъ кабахъиб: гъачамлис къалабамайкІуд.

— Сен гъатІи ил секІал Эсембайличи хъарли
хІебиубли, набчи хъарси?

— СенахІенну, дила къакъба, Эсембайли
хІуниван жагали ва гІяхІил ил секІал барес
хІейрухІели.

Ил гапли Индирала хІулби жагадариб. Узичи
ил уктемли хІерризур.

— Сен хІейрусира, хІябилра хъярхъли вирус! —
иб децІагибси Эсембайли ва, сунела къабулагардеш
хала нешлизи хІясибхІебарахъес цІудара хІулбира
гІяшдуцили, сунела буруш ибгес къасбариб.

— ХІуни, Эсембай, рузис цархІил секІайзиб
кумекбарес вируд, — тІашаиб ил Ханумли. —
Рузисцун ахІи, набра кумекбарес вируд. Буруш
бирес, чІябар ушкес, къям-кІуцІул ицес... лерилра
илди хьунул адамличи хъарти сари.

— Дила дудешли биалли...

— ХІела дудешличила, Эсембай, нуша кІинайс
гъайдикІехІе. Гъанна биалли, Индирани хІела бу
руш ибгайчи, ихди азбарларти урцул иша кадуха.

Урцуйчил чевяхІихъухІели, къалабамайкІуд, гъала хІерикІен. Урцулра цагъакІли дахъал камайсид.

— Урцул лерхис. ГІур се бариша, хала неш?
— Ханумлис гІяхІизахъес багъандан, Эсембай седигара барес хІядурлири.

ГІур баресира камхІебирар, — Ханумли алавчарли хІеръиб ва уркІиличи бакІибси пикри буриб. — Дила хІясибли, хІуни ил сундук Индирази хъусхІебирахъид.

— Чина?

— Итил гІямзила, — иб Ханумли, ца шайчи хІеррикІули: сундук ита-иша бихес хІяжатдеш аги, амма... — Их цакъадар декІси саби. ХІу, гъабза, мякълав левли, Индирази ил ахъбуцахъес лайикъли хІебирар; уршбачи, дила лачин, рурсбас кумекбирес хъарси саби. Вари, хІуни иличила хъуммартид.

— ГІяхІси саби, хала неш! — Ханумла дурсрачи разиубси Эсембай урцул кадухес къалабаикиб.



ХЪАЛИБАРГЛА ЧЕБЛА

**Хъалибаргла
низам**

БегІти чула дурхІнала цаибти бяркъ-
чиби саби. ДурхІни миллатла адам-
дешла гІядатуни хІясибли бяркъни-
лис бегІтани жамигІятла гъалаб жаваб бедлуга.
Чила-биалра уршили вайдеш баралли, имџаливан
илала у хІебуруну, ил дурхІяла дудешличи гІяйиб-
бирули, «Пулан адамла уршили усалдеш бариб»
бикІар. Ил багъандан уршилис сунела бегІтачи
чизилра гІяйиб хІебарахъесли вяшикІес чебиркур.

ДурхІни адамдешла тІалабуни хІясибли бя-
ркъес багъандан, гъарил хъалибарглизиб кабизурси
низам биэс гІягІнибиркур. «Низам агарси хъалибарг
— шин агарси шинкъангъуна», — бикІар дарганти.
Хъа бекІ сайливан хъалибарглизиб низам кабилза-
хъуси саби дудешли.

Хъалибарглизиб низам кулпетла гъарил бир-
кІай сунечи хъарси, сунела чебла заманаличиб ва
дурусли бетурхахънилизиб дакІубулхъан.

Хъалибаргла дахъал ва мягІничерти чеблуми
низамагарсилизир усалли ва чедихІяртли детурхар,
илаб хъалибаргла чебла се сабил сяйли иргъу.

**Хъалибаргла
цацадехІ
чеблуми**

Дагъиста хъалибарглизир гъарил
адамла чублуми лерти сари, сена-
хІенну чеблумазибад азадси хъали-

барг бируси ахІен. Хъалибаргла чеблуми илала гъарил биркІа чеблумазирад цаладиркур.

Дагъиста хъалибаргунала чеблуми азирти дусмала манзиллизир белгидиуб, дубурланта ла гІямрула бетуцли детаур.

Гъалабра буриливан, хъалибаргла гъарил биркІа дахъал чеблуми лерти сари.

Урши-рурси чула хъалибарглис ва тухумлисцун ахІенну арагІеб шилис багалабиэс гІягІнибиркур. Дурашав вяшикІуси сай, илди шими-ургаб вегІла шиличила хабардерхахъесли. Даргантала пикри хІясибли «Багъадур — шила багъа» сай.

БегІ гъалабси яргалис никІа урши-рурсила дарх-ли чучи хъарти, чуни дарес, детерхахъес гІягІнити дирар: биштІати узи-рузичи хІербикІес, хъулирти хІянчилилизир бегІтас кумекбарес ва цархІилтира.

Хъалибаргла гъарил биркІа дурхъаси чебла саби хала бегІти даимси къайгъили алавбуцни. Илди декІарси юртлизиб хІербирули биалли, илдачи даим гъаввикІуси сай, илдала хІяжатдешуни ихъути сари. Гъар вякъунхІели, илдази гъатІира се барес гІягІнисил, илдас се дигулил хъарбиу. Рурсили хъали, азбар-гІяя умудиру, шин лерху, хъучибси хІянчилизиб кумекбиру.

Дагъиста лебилра халкъанани гъарил хъали-баргла биркІа чеблализи халбирули саби жамигІятли дурадуркІути билхъабазир жигарчерти бутІакъян-деш дарни, чула хъалибаргла ва тухумлацун ахІенну, чула шила ва миллатла дархъти тІалабунигІевли чІумали кайзни.

Хъалибаргла гъарил биркІай жамигІятла низам булъуси тухум тІашаэс, илизибад халкъла дархъти

гІядатуни хІедуъни тІалаббирес хъарси саби.
Чинилра тухумличил, унрубачил, шантачил ва чула
гІяхІлачил бархбасуни къябудахъути ахІен. ВегІла
хъалибаргла, тухумла, шила, миллатла ламус ахъли
ва умули бихІуси саби.

Царалти Низамла, хІурматла хъалибарглизиб
тІалабуни биштІати узи-рузини халати узи-
рузила чула бегІталагъуна хІур-
матбиру. Халати узи-рузилизи «бирис-хІебирис»,
диги-хІейги» или, жаликІес асухІебирар.

Илкъяйда дубурлантала гІядатунани дудеш
левси къушумлизи — урши, халал узи левси
шадлихъличивиштІал узи вашахъесра асубирахъули
ахІен. Нушала гІядатунани чІумали къадагъабирули
саби бегІти лебихІиб — уршбас, халал узи левихІив
— виштІал узис папрус бержахъесра держлизи
гъудуриахъесра, нясси гъай бурескІун чина хабара.
АнцІбукъ ургІебли биалли, ил хъалибарглизиб
низам агнилара уршбани чула бегІтала (яра халал
узила) хІурмат хІебирнила лишан саби,

Хъалибарглизиб гъарилла кабизурси ца мер
бирар. Урши — дудешла, рурси — нешла, виштІал
узи халал узила мерличи кахІебиръур. Халаси
вехІихъайчи, биштІати букесра бехІхІебирхъур.
ГІяхІял ухІнавхъунхІели, лебилра абилзан ва ил
бегІла хІурматла мерличи калта.

Илди тІалабуни детурхахъуси хъалибарг ца
бутІаван, низамла хъалибарг бирар. Низамла
хъалибарглизиб биалли талихІра, уржибдешра,
баракатра, гІяхІти гІядатунира дирар.

Хъалибарглизир гІяхІти гІядатуни кадизахъни
бегІ гъалаб дудешла ва нешла чебла саби.

Низамла хъалибарглизиб хъалибаргла ихтилат-
лизиб гъарил биркІайзи бутІакъяндеш дирахъу,
виштІасилизира сунела пикри бурахъу. Амма ду-
дешла амру лебтанилра цаван бетурхахъу, ил
бетурхахънира цали итиллизибад тІалаббуру.

АрхІяличивад чарухъунси дубурланна чебла
саби, сунела кулпетличи ацІайчи, гъала-гъала сунела
бегІтачи ухІнаухъес, илдала арзу-хІял дагъес.

СУАЛТИ ВА ХІЯНЧУРБИ:

1. Хъалибарглизиб низамла къадри сегъуна саби? Сен
жамигІятлис гъарил хъалибарглизиб низам биубли дигуси?
Низам лебси ва агарси хъалибаргуназиб дурхІни бяркълашал
сегъунти бетарарал, пикрудухъеная.

2. Гъарил хъалибаргла бекІлидиубти чеблумачила бурая.

3. БегІтала, халати узи-рузила хІурматбарни селизиб
дакІубулхъана?

4. ХІушани хъалибарглизиб чис ва секъяйда кумекбири-
даял, бурая.

5. ХІушала шилизир хІурматла хъалибаргуни леру?
Сен унрубани, шантани илдала хІурмат бируси? Илди
хъалибаргунала дурхІни бяркълашал сегъунти саби?

6. Гергъиси белкІли нушази се гІеббурулира?

МяхІяммадрасул

ГІяхІси дев ва гІяхІси баркъуди

— Хала неш! Бура, се бариша? ХІед дигуси,
хІед гІяхІбилзуси се леба? Бура. Нуни се-дигара
барес вирус! Бирра бирис. ХІуван ахІерси наб чилра
агара! — чейкили илини хала нешла някъ кІелра
някъли буциб, ритІакІили сунечи гІяшрирахъуб,
байикун.

— Се тиладибаришара хІези? — пишряхъиб хала неш. — Гъаригу, пикрирулхъасну.

— Пикрирухъен, пикрирухъен, хала неш. Ну къалабали ахІенра. Гъу, се дигахъида?

— Гъари, дила лачин, ца гІяхІси девличила пикрирухъен. ГІяхІси ибхІелира, гъариллис къабул-бикеси, ил бакъибхІели, гъарилла уркІи ванабиэси ва шалабиэси.

— Вайти адамталарав?

— ГІяхІси девли вайси адамра гІяхІси вета-рахъули вирар, дила мукъара.

— Аргъира, хала неш. Пикрибирис. БегІлара гІяхІси дев пикрибирис ва бегІ гъалаб хІези бурис!

Эсембай хъулилад дуравхъун... Ил алавчарли хІеризур. Илала пикри авал-шел дус риубсигъуна рурсили сунечи битІакІиб... Рахли рурсила някъли-зибад пушыгІ батбухъун, ва цІуэрли бетхІелбяхІ гъабяхъиб.

— Неш! — чІярбяхъиб рурсили.

Лаг-кат демжурти машинабала ургавадиркули, Эсембай пушыгІлис гІергъиикиб... ПушыгІ бархъли лагбяхІ арцур ва хІулбани чебиънабад бетяхъиб. Рисуси пушыгІла регІ рурси гъанрикили, Эсембай хала нешличи чарухъес, илизибад арц сасили, сагаси пушыгІ асес ва рурсилис бедес къасбариб. Ил пикриличил Эсембай дуцІли гІела чариуб, амма ит мерличир я рурси я илала неш аги.



ТУХУМДЕШЛА ГІЯДАТУНИ

Хъалибарг
ва тухум

Дагъистайзиб хъалибарг ца тухумлизи кабурхар: шилизиб цунси, тухум агарси хъалибарг дебали камли къаршибиркур. Гъалаб лезгибала цацадехІ шимазиб ишгъуна гІядат бирусири: шилизи гечиубси дурашан, ил тухум агарли кахІелахъес, бухънабала маслигІят хІясибли, шила ца тухумлизи кархахъи. Шанти илдас «къабулай миресар» — «тухумлизи къабулбарибти» бикІи.

Илдигъунти гІядатуни гъалар Дагъиста царалти шимазирра дуибти сари, илдала лугІилизиб Чиркей гъанбушес вирар (ишхІелла Буйнакъла район).

Гечиубси сагаси шилизив сагаси тухумлизи къабулваралли, ил цунни хІейрар, хІяжатдеш биубхІели, ил сагаси тухумли чула сайливан валтахъа, кумек гІеббиахъу. Илбагъандан дарганти бикІар: «Шантани шан варалли, дурашан шан ветарар».

Дагъистайзир тухумли сунела гъарил хъалибарглис жамигІятла гъалар жавабкардеш диху. Хъалибарглис саби сегъуна тухумлизибад саби — берхъибси яра мискин, халаси яра багъаагарси — гъеч авараагарли хІебирар.

Дагъиста гІядатуни хІясибли, гъарил адамли сай чиди тухумлизивад саял, сунела лебилра тухумти ункъли балес чебси саби.

Тухумдешла
цацадехІ
гІядатунѝ

Гъарил хъалибарглаван, гъарил тухум-
лара сунечи хастѝ гІядатунѝ дирар.
ЦабутІаван, иличибли баянбиру ца
тухумлизиб имѝІаливан устни, итил-
лизиб — мугІяллимти, хІябъибиллизиб — гІялимти,
шуибиллизиб имѝІаливан букІуни бетарни,
дурабулхъни.

Дагъѝста лебилра халкъанала гІядат бетаурли
саби тухумтани унраличир юртани лушни, имкан
бакІалли, хъуми ва мурала мерани дарх яра мякълар
дирахъни, миѝІираг ца хІенкълизи кайъни. Илди
гІядатунѝ жявти замунтазир акІубти диалра, илдала
асурти ишхІелира гІячихъли лерал.

Тухумдешла илди гІядатунѝ итхІелла гІямрула
къѝянти шуртІрани акІахъуб ва халкъла дагъри-
лизир дебшладариб: юртани, хъуми, мурала мерани
унраличир диалли, барсур кумекбирес къулайли
бирар. ХІяжатдеш акІубхІели, цали ца гІеббурцесра
гъамадли уббулхъан.

Дагъѝста халкъанала тухумдешла гІядатунѝ
бебкІибти бархли унраличиб хІярибирхъни тІалаб-
бирули саби. УрхІла мер-мусаличив вебкІибси ту-
хум вегІла ВатІайзи левху ва чула хІябрази хІя-
риирхъу. Илдигъунти анѝІбукъуни ишхІелира
къаршидиркули сари: гъалавван ца дарган хІя-
жи дурала улкализивад вархли савхиб. Ил —
тухумдешла гІядатунѝнала цІакъ саби. Илгъуна бируси
саби чула тухумла хІурмат ахъли бихІес, хІушала
адам хІябрази хІяриихъес хІейубри или, духудеш
камсилизи гІуркъхІебяхъяхъес.

Барсур кумекбирнила дурабад, тухумдешла
гІяхІти гІядатунѝназибад саби зягІипсиличи гъабби-

кІни, ил гІевуцни, илис ва илала кулпетлис кумекбирни. ЗягІипсичи гъаббакІес халатицун ахІенну, биштІатира, гІулухъабира, жагъилтира башути саби.

Тухумла бекІа яра мекъ диубхІели, илди лебилра тухумтала жигарчерти бутІакъяндешличил гъунчидуршу. Илдигъунти хъалибаргуни гІяхІси насихІятличил, харжаначил, кумекличил гІердурцу. Чула ургала балхІебикибти, гъимбукІибти цацабехІ тухум биалра, илдигъунти анцІбукъуназиб, чула гъими бячІи, даршукабирар.

Шилизиб гъарил тухум чула хІурмат-хатир ахъли дихІес абзбиркур, чула ахъри ва имканти хІясибли жамигІятлис манпагІятси хІянчи биру.

Тухум жамигІятла хІянчиличи, билхъализи, сяхІбатличи, муръаличи, хъубзарла байрамличи цахІнаб уржили башни имцІали къулайсизили ва асарчебсизили халбарибси саби, тухумла халалгъуна гъалакайкили.

Даргазир цацабехІ тухумтала байрахъунира дуибти сари.

СУАЛТИ ВА ХІЯНЧУРБИ:

1. Хъалибаргла ва тухумла бархбасличила бурая.
2. ХІушани тухумдешла сегъунти гІядатуни дагъуррая? Илдазирад хІушаб чидни имцІали гІяхІдизура? Сен?
3. Сен жамигІятла гъалаб лебил тухумли сунела гъарил биркІайс жавабкардеш дихути?
4. ХІушала тухумти гъанбикахъая ва хІушаб барибси кумекличила бурая.
5. ХІушала тухумла гІяхІти гІядатуначила ва гІяхІти адамтачила бурая.

Унц

Гѣбшнила берхІи малхІямлири. Зубайру, халаси бекІ уктемли кабуцибси тазаси тјамада, гъаргала кайиб. Рахли къапу гъичІ духъун, ва гъести гІямрула дубурлан кагибси ганзличил къалабахІейкІули ацІиб. ГІяхІялла ганзлизиб ва кабизлизиб илини сунела къимат бални чебиулри.

— ХІечила, хІурматла Зубайру, — викІулри ил, сунела ура бурили, къимбизурси супелла бехІ гъатІира къяртІлукІули, — чуйнара гапла гъай аргъира, амма гъанна ахІенси тјанишиэс къадархІебиуб.

Дубурлантала уркІигъаргси ихтилатлизиб гІяхІ-цад замана арбякъун.

— Ну хІечи инкІяхънила сабаб ишгъуна саби, хІурматла ЗубайрухІяжи, — сай вакІнила мурад аргъахъес вехІихъиб НухІи, сунени бурайчи, хъа бегІтани иличила хъархІебиъни балули.

Хъа вегІ НухІила хабарличи лехІизур. Арбякъунси базар бархІи НухІини ЗубайрухІяжила къамлизивадси Къурбайс унц бицилри. Амма Къурба, архІяличив харжиубли, кјса бацІли уббухъун. ИлхІели НухІини или сай:

— ХІу Зубайрула къамлизивад сайра викІулрив? Наб хІу илгъуна хІурматла къамлизивад виъни баибси саби. Илгъуна къамла адамличи игъдибар хІебихъес хІейрус.

Къурбан НухІизи арц цугли хІябэсил бархІи диахъис или хъямачи ветикиб.

Зубайрула вяхІла ца лишан барсхІебиуб, я чула къам-тайпализив илгъуна къур бегІла усал Къурбан левси хІейъниличила хІебуриб. Иличи ургІебли чула тухумла илгъуна хІурматбарнилис баркаллара багъахъур, гІузру хІясибли Къурбан шилизив къаршихІейкни багъандан вачарла багъа сунезибад сасахъес тиладибариб.

БархІехъ Зубайруни уршби бучиб:

— БацІси гавлаг тІашли хІебуар. Чидисаял ца угърашли нушала уличив чевдукаряхІес къасбарили сай. Нушани ил такъсир танбихІагарли батахІелли, чили бала ил тамяхІкар бецІ гъачам къацІбики буъни? Нушани нушала багъа, бархІиличиб бархІи пулукІхІебикІахъули, ахъси даражаличиб бихІес чебиркур яра ца савли лерилра нуша хІурматагартили, жамигІятлизиб гъай бетхІебурхутили черсаргъехІе. Чебиуливан, анцІбукъ ца унцлизибцун ахІен. Унц буреба ахІен. Чизилра чехІебаахъили, ил базарличибад арбукес хІейрар. ХІуша савли архІяличи дурадухъеная ва ил базарла шила гъундурала мякъларти хъулрала бегІтази суравасая ва ил хІярамзада чи саял белгиварая. Илис нушани къяркъси танбихІгІеббиахъехІе: шанти тубикІеси, Къяба-Дарго нешла дерхъиб ниъ хІярамдиъ бикІеси.

МаркІачІибиухІели Зубайрухъайчи дебали бачабархибти узбикъурти пяхъли дурабикиб:

— Нушанира тухумдеш дихес ва дихІес балутира. Сен нушазира иличила жявлил хІебагъахъурси?

ГІянручІ шилизибад хъярхъти урчачиб шел къябшти гъабза арцуртиван дурабухъун ва ласбулхъла гІелаб бегъуб.



ТУХУМЛА ЧЕБЛУМИ ВА ТУХУМЛА ХІУРМАТ

Тухумла
хІурмат

Тухум бикІар акІнила бархбасуначилти чумал хъалибаргла цадешлис, сабира тухумдешла гІядатунани цалабяхъибси. Тухум сецад уржибси ва цІакъси биалра, тухумлизи кадурхути лерилра хъалибаргунас илцад къулайли бирар.

Дагъиста лебил халкъанани гъарил тухумлира жамигІятлизиб сунела хІурмат ахъли бихІни тІалаб-бирули саби. Ил тІалаб азирти дусми гъалабван ишхІелира мягІничебли лебал.

Секъяйда бирара тухумли шанти-ургаб сунела хІурмат мурталра ахъли бихІес? Дубурланта гІядатунани ил суайс таманси ва дурусси жаваб лугули саби. Гъарил тухумла жамигІятла гъалар дахъал чеблуми лерти сари. Нагагъ лебил тухумли, илала гъарил биркІай сунела лерилра чеблуми ахъти адамдешла даражаличир ихъули диалли, шилизиб илгъуна тухумла мурталра хІурмат бирар. Илбагъандан гъарил тухумли жамигІятлизиб сунела хІурмат бихІес багъандан, гъарил сунела биркІайзибад тухумличи хъарти детурхахъни, сунела адамдеш ахъли дихІни хІялалли хІеритъни тІалаббири.

Тухумла
чеблуми

Тухумла цацадехІ чеблуми ишди сари:

1. Тухумла гъарил халасини сунела тухумла гъарил виштІасилис, гІулухъас, жагъиллис къайимдешдирни, илди чула гІяхІти баркъудлумазиб, къайгъназиб, хІяракатлизиб даимал гІеббурцни ва къелгІеббикни. Илкъайда вайдеш, усалдеш, цІахдеш бируси чула биркІан илхІяйзив тІашаэс ва, хІяжатси биалли, чула чуни танбихІлаваресра гъарил тухумличиб чебси саби.

2. Тухумла лебилра биркІантани барсур кумек-бируси саби. Хаслира халаси ва гъалакси кумек гІеббаахъес гІягІнисаби тухумкъияйзиикибхІели, бебкІа биубхІели, сяхІбат бетурхухІели, билхъа дурабуркІухІели. Илдигъунти шуртІразив тухум жигарчевли гІевурцу, сенкІун илкъайда кумекхІебарни ва гІевхІевцни арагІеб тухумлис цІахдеш саби.

3. Тухумли сунела гъарил биркІанна рухІла ва яшавла аги ункъли балесра хъарси саби, хІяжатси мерличиб асарчебси кумек гІеббаахъес багъандан. Тухумли сунела биркІан, ил сецад къиянси ва баркъагар виалра, лайкакІили, хъумартурли вал-туси ахІен.

4. Лебилра тухумтани чула тухумдеш ахъли дихІути ва дихути сари. Илбагъандан тухумти цабехІличи цабехІ, байрумтачиб яра гІузру биуб-хІелицун ахІи, урга-ургади барсур шадиб башес, цаличи ца гъаббикІес гІягІнити саби.

5. Тухумла чебла саби сунела гъарил биркІай-зибад шилизир кадизурти гІяхІти гІядатунни ду-русли дузахъни тІалаббирес. «ВегІла адам вегІли руркъуси сай» — бикІар дарганти. Илбагъандан халкъла гІядатунала дазулизивад дураулхъуси

тухумли чараагарли тІашиу, пикриухъни ва гІядатуні хІедулъни тІалаббѣру. Шилизив тухум лебил тухумла даимси хІерудилиув увхІелхъахъуси сай.

6. Тухумла хІурмат имцІабиахъес, жамигІятлизиб илала гъай асарчебси биахъес, арагІеб тухум жамигІятла хІянчиличи, билхъаличи, бузерила байрумтачи, муръаначи цахІнаб, барх дурабулхъни лайкъсилизи халбѣру. Илгъуна тяхІярли тухумла жавабкардешра ахъдурцу.

7. Тухумла гъарил биркІай чула тухумла, чула миллатла дархъти тІалабуни мурталра гІердурцути ва далтахъути сари. Шантала ва миллатла дархъти тІалабуни багъанданти тухумла уржибдеш ва цабалгундеш жамигІятли мурталра ахъли къиматладиру.

Нагагъ тухумли чула тІалабуни уржили далтахъули, гІердурцули ва детурхахъули, шила ва миллатла тІалабуни детерхахъес гІелумбилзалли, шилизиб илгъуна тухумла гъарли-марси ва ахъси хІурмат хІебирар. Иличи ургІебли тухумла хІурмат имцІабирар, илини сунелаван ахІи, жамигІятла, шила тІалабуни гъала кадалталли.

Тухумдешла илди ва царалти чеблуми детурхахъалли, жамигІятлизиб илгъуна тухумла даража, хІурмат ахъли дирар. Илгъуна тухумлизиwadсилі ахъли ва пахруличил бурес виар: «Ну пулан тухумлизиwad сайра».

Шилизиб урши-рурси, гІулухъа, жагъти чула бегІталацун ахІенну, тухумлара вакилти саби. Илбагъандан тухумла гъар биркІа усалдешра асилдешра лебил тухумличи цаван чедетиур.

Ил жамигІятла гъалаб лебил тухумла цахІнarti жавабкардеш сари.

Ашкарлигу, ишбархІила школала (мактабла) гъарил учІаннира сунела чеблуми я вегІла хъали-баргличи я вегІла тухумличи жамигІятли сегъу-налра гІяйиб хІебаресли детурхахъес гІягІнити сари. Хъалибаргла ва тухумла хІурмат учІаннира нана хІуливан мяхІкамбируси саби.

Дагъиста халкъанала илди пергерти гІядатуни гъарил адам, гъарил хъалибарг, гъарил тухум — арагІеб лебил жамигІят шаласи, сахаватси, уркІигъаргси, рухІлашал жагаси ва умуси бетаахъес жи ва тІалабуни сари. Дебали духути ва мурхъси мягІнала сари Дагъиста халкъанала рухІла къанун-ти, илдала лугІилизир тухумдешла гІядатунира.

Дугъбала баян.

Къайим — виштІасиличи яра ухъна-хъияличи хІеруди бузахъан.

Тухумла биркІан — тухумла адам.

СУАЛТИ ВА ХІЯНЧУРБИ:

1. Тухумти чи сабил, бурая.
2. Тухумла хІурмат селизибад дигахъу?
3. Тухумли сунела багъа секъяйда ахъли бихІес бирара?
4. Тухумла чеблумачила бурая. Секъяйда детурхахъули илди хІушала шилизир? ХІушала бегІтани? ХІушани?
5. Мактабла учІанни сунела тухумла хІурмат секъяйда ахъбуцес ва убяхІбушес вирава?
6. Тухумла чеблумачила хІушала багъудлуми мурхъди-убхІели, хІушала баркъудлумазиб се барсбирарал, се гІяхІбулхъанал, бурая.

7. ХІушаб, хІушала бегІтас тухумли барибси кумекличила бурая. Гьар бархІи царайс гІяхІдеш бирен.

Рамазан МяхІяммадов

Къалмакъар

Пулухъабала хІяз бемжурлири. ХІясанра ХІу-сенра къалпбирес даимбиуб, ва Къасумли илдази хІязлизиб шилтахъ хІебирахъес маслигІятбариб.


— Чи сайри хІу нушази гІевугъес? — пяршбухъун илди. — ХІези нешли «МухІли буцадли, бекІ уцар» ибси гІякълу хІебурибу? — мискъилладивариб илдани Къасум. — ХІед бархъдеш бигулрив? ХІера иш хІед бархъдеш...

Хапли илаб Къасумла узикъарра гариганра багъарбиуб ва бирхІути декІарбариб:

— Ишала чилра агарси сай или гъанмабикаб. Цалис ца ваибси сай. Амма цаличи — кІел-хІябал чемабухъаб. Ил — нушала къам, тайпа мучлаагар барни саби. Нуша хатир калахъи, хІурмат буахъи гъеч хІедуэхІе. Нуша илгъуна къамлизирад ахІенра. Иш гъакІлис чердурхехІе, амма илгъуна тикрар-биалли... нушачи гІяйиб мабараб. УрхІлизирад хІи дашули, нушазирадниъ дашути ахІен. Гъаннабиалли даршудиънилис ва чердерхнилис цала цали някъби цІацІадарая. Гъу, къалабали! ГъатІира, гъатІира! Илкъяйда, арадираб гъалмагъдеш. Духусини дирар гъалмагъдеш гІягІниси тяхІярли къиматладирути ва умули дихІути. Гъалмагълис ламарт мабиридая.



УНРАДЕШЛА ГІЯДАТУНИ

**Унруби**

Адам адамтала ургав, илдачилти даимти бархбасуназив хІериэс акІубси сай. Ил сабабли гъарил адамла (мяштІла яра инкарла) унруби бирар. Унруби бирути саби хІябал журала: унруби-тухум, унруби-урхІ ва заманала унруби. Пѣргъитала лугІилизи кабурхар парталичивси унра, архІяличивси унра, хІянчиличивси унра, шадлихъла къушумлизивси унра ва цархІилтира. Гъарил унрала цаван хІурматбируси саби. Унрадеш халати жавабкардеш сари. ЧІянкІли чихъти

адамдеш лерси инсай дихІес вирар кадизурти унрадеш, унрани «Дила унра пергер гъабза сай» эсли. Дагъиста халкъанала гІядатуні хІясибли, лебилра унрубачил игъдибарла, узидешла, уркІи-гъаргти ва гъалмагъдешла бархбасуни диэс гІягІнिति сари. Унрубала ургар къясдеш, гъими, хІясаддеш диэс гъеч асухІебирар. Халкъанала гІякълу бухІнабуцибти Дагъиста буралабанира гІяхІси унрала халаси къадри чебиахъу: «Унруби гІяхІти биалли, сукъур рурсира шери аркъян» (табасарантла ва даргала). «ГІяхІси унрала багъа хІебирар» (лезгибала). «Хъалибарг гІеббуца, гъалмагъ разивара, бегІтала хІурматбара, унрубачил цавалги, гІяхІяйс дяхІ шалали гъуниваи» — насихІят бурули саби кІарахъала буралалира.

ГІяхІси унра къиматлаирниличила бурули саби дубурлантани юрт, хъу, мурала мер исухІели унра сегъуна саял никрилизи кайснилира.

Гъарахъси узичив гъамси унра имцІали багалаирар. Даргала халкъла бурала.

Дагъиста халкъанани гІяхІси унра гъарбизнилизихалиру. Амма унрала гІяхІдеш яра вайдеш дахъал анцІбукъуназиб вегІлизибад дигахъу. Илбагъандан дубурлантала насихІят пикрилизи касни къулайси ва бархъси саби: «Унра вайси виънила багъана хІезиб ахІенара? ХІу иличил дигиличил, хІурматличил, ламусличил ва сабурличил вяшикІулрира? Унра валхІейкни хІезибад дигахъуси ахІенал, никриухъен» — бикІар гІякълучеб дубурлантани.

Унрадешла
цацадехІ
гІядатуні

«Гъарахъси узичив гъамси унра гІяхІси вирар» — бикІар дарганти.
Унрадешличи дубурлантала гІяхІ-

цад тІалабуни жявхІейчирад кадизур. Сегъунти диэс гІягІнити унрадеш? Сегъунти биэс хІяжатти унруби? Унрачи халкъла дахъал тІалабуни лерти сари. БегІ гъалабси яргалис унрадешла гІяхІти гІядатуни вегІли дузахъути сари, сунела унралис гъалайкили. ГІяхІдеш бирнилизив, салам бедлугнилизив, кумекбирнилизив сай мурталра гъалаиркес гІягІниси саби, унрани цаибил ганз кацІайчи хІерли кахІейили. ЦабутІаван, илкъяйда саби унрала хІурматбируси, унрала хІурматбирни биалли дубурлантала гІяхІтигъунти гІядатунала ца саби. ГІяхІ биубхІелира вай биубхІелра, унра унрачи бегІ гъалав музаулхъуси сай. Хаслира вай биубхІели гІелаулхъес гъеч асубируси ахІен, сунела сецад дахъал ва ибкъти хІянчи диалра.

Бархъси, хІялалси баркъудилизиб унрас унрали кумекбиру. Унрас кумекбарес багъандан, илини билхъа барайчи хІерликайруси ахІен.

Унрала мекъ яра бебкІа биубхІели, илис халаси кумек хІяжатси саби: илала мицІирагличи хІерэс, далхес, илди изес, хурег хІядурбарес, унруби къям-къулсализибад гІеббурцес ва царалтира. Илдигъунти анцІбукъуназиб Дагъистайзиб унрас, хІерели я дугели хІеили, кумекбиру. Илдигъунти анцІбукъуназир унрала унрадеш ва адамдеш имцІали саркъили дакІудулхъан.

Унрачи бугътан чебирхъуси ахІен, унрачила гъар гъанбикибси хІебуру, вайси хабар тІинтІхІебиру.

Чилра унрала нукъсандешунагІив умцІуси ахІен, унруби-ургар чилнилла гъими-къяс адилкъес асухІеблар. Унрани унрала хІяжатдеш ихъу, унрала лебдешличи къясдеш хІебиру.

Унрачи унра хІурматличил дугъаилзан, цаличи ца шадиб башар, азихъличи жибиру, насихІят гІеббурахъу.

Гъалаб унрадешла ца гъатІи гІяхІси гІядат жигарчебсири. Сагаси юрт лушухІели, хъа вегІли унрала азбарлизи хІербикІуси улкъай хІебалти. Нагагъ илабяхІ улкъай хІебарес гІямалагарси биалри, илхІелира чараагарли унрала ихтияр сайсусири. Унрани ихтияр хІебаралри, унрас илгъуна улкъай хІейгули ахъалри, хъа вегІли ил бяхІлизиб улкъайлис мер балтуси ахІенри. ГІядат илгъуна саби, ва ихтияр хІегибси унрачи гъимукІес чисалра хъулчи лебси ахІен. Чебиуливан, унрадешла асар юртла кабизличира чебетиули саби.

Дин ва унрадеш Бусурман диннира унрубала бархба-
суни узидешла ва гъалмагъдешла диъ-
ни тІалаббириули саби.

МяхІяммад идбаглизи гъачам иб: я Расулуллагъ!
Пулан хъунул адам дугели рулгули сари, хІерели дубрурцар, лерилра хъарти детурхахъу, амма сунела гъайли унрубас заралбиру». МяхІяммад идбагли аргъахъиб: «Илизиб гІяхІдеш агара. Ил цІализир рирар».

СУАЛТИ ВА ХІЯНЧУРБИ:

1. Унрадешличила Дагъиста халкъанала буралаби гъандикахъая. Сегъунти насихІятуни дурули илдани нушази?

2. Сегъунти бирара унруби? ХІуни хІела унрачила се гІяхІси бурес вируда? Парталичивси хІела унрачила?

3. Унрадешла сегъунти тІалабуни, гІядатуни лера?

4. Унразибад бусурман динни се тІалаббириули?

5. Унрубас хІуни сегјуна кумекбирулри? ГІяхІдеш бирен унралис.

6. Гергъиси назмули нушази се гІеббурулира?

Р. Рашидов

ХІед гъундури гІяхІдираб

ХІед гъундури гІяхІдираб,
Дила багъадур унра!
Ца гъунар сахІерхили,
ХІу чархІелхъни балулра.

ХІези дурес кІел дев лер,
Гъарахъ гъунивалтули,
КъаяйцІмайкІуд гурдаливан
Майдунти урдалтули.

Бирен хІялалси хІянчи,
ХІулбала гъалаб лебси.
ГІямултази маркуд хІу
Буцес гъуни гъамадси.

Нушала уркІбалара
Арбуха ванадеш барх,
Кумекли биабну хІед
БамкъурхІели гъуйчиб аргъ.

Камсилра уркІила цІа
Бати нушаб хІунира, —
Мукърачира бихехІе,
БихехІе хІябрачира.

Гъундури дархилину,
Вирен мурталра сахъли.
Вааби, унра урши,
ХІед дигуцада ахъли.
Дила унра МяхІяммад.

ХІела хъулир усурби
ДицІаб либхІли анкІили,
БицІаб бахъхІила къани
ЧердикІибти чІянкІили,
Дила унра МяхІяммад.

ХІела кункси бидавли
Дихаб гъар даим дузаб,
ХІу велгІути хъумачил
Гъалмагъдикаб хІебла заб,
Дила унра МяхІяммад.

ХІед гъаргалаб талихІла
Ухаб даим зубари,
Чи ухънавиаллира,
ХІу ухънамайруд, вари,
ГІялихъала МяхІяммад.



ШАНТИ ВА ШИЛА ГІЯДАТУНИ

Хъалибарг,
тухум, ши,
шанти

Лебилра адамти, хъалибаргунази ва тухумлизи цалабикили, чула шимазиб яра шагъуртазиб хІербирар. Ил багъандан гъарил адам ца замана-лизив белгиси хъалибаргла биркІанра сай, тухумра саи, шанра сай.

Гъарил хъалибаргла ва тухумла саби бегІти, чула хъалибаргуназир ва тухумлизир кадизурти ва чуни дузахъути гІядатунни дирар. Илкъяйда гъарил шилара сунечи хаста, ил шилизир акІубти ва иларцун дузути гІядатунни дуибти сари. Илис ца мисал лебкехІе.

Гъалар кІарахъала Согъратл шила мицІираг урхІла ванзаличи чедухъалри, лерилра илди ил ванзала бегІтас далтутири. Иличи ургІебли, урхІла шила мицІираг чула ванзаличи дакІалри, илди чус дирутири.

Амма шила гІядатунала халаси бутІа царалти шимасра ва арагІеб миллатлисра цаси, кумхаси бирар. Шила гІядатунани шантала гІямру гъуйчидуршу, белгиси бетуцлизир дихІу.

Шила гІядатунира кІел къукъяличи дуртІути сари: рухІла ва бузерила. Шила бузерила гІяхІцад гІядатунни тІабигІятличил уржили дархдасунти сари. Алавчарли ризкъи ункъли духъули диалли —

ризкѝи, картошка дерхѝили дашалли — картошка, зершила сабухѝуни гІяхІти дашути мераначир зерши делгІа. Бала имцІати шимазир кѝалтинти ва варгѝни диру, тІутІи дахѝал лерти мер-мусаличир — чягѝир.

Гѝариладамла, хѝалибаргла ватухумла шилизиб ахѝси яра гІяшси хІурмат бирар. Илкѝяйда царалти шими-ургаб гѝарил шилара хІурмат бируси саби. Дагѝиста халкѝанани вегІла шила хІурмат ахѝли бихІни гѝарил шанна чеблализи халбиру.

Дурашаб усалдеш баралли, бегІ гѝалаб ил чиди шилизивад саял суравису, чІянкІли кІинайс илала у хѝарбаэс асубирар.

Шила багѝа хІурматличил бихІни гѝарилла чебла саби. Даргала халкѝла бурала.

ХІебиалли, чили дурашаб усалдеш, лайикѝагардеш, убяхІдеш баралра, илини сунела шила багѝа камбирахѝу. Ца адамла усалдеш лебилра шантаци чебетиур, ца адамла усалдешли лебилра шантаци, шиличи гІяйиббирахѝу. ВегІла шиличи цІудара дамгѝа кабатурси шила жамигІятлисра хІейгахѝу, шилизив ил хІурматагарирар.

Иличи ургІебли, чили дурашар асилдеш, гѝабзадеш чедаахѝалра, илини сунела ши гапбирахѝу, сунела шила багѝа имцІабирахѝу. «ГІяхІгѝабза — шила багѝа, вайгѝабза — шила багѝабуѝ» — бикІар дарганти. ВатІанна ЧеряхІти дургѝбала замана чула шан игит ветаурси абзур шилис налогуналашал кункдеш бирусири.

Илкѝяйда, дурала мер-мусаличив гѝарил адам сунела шила, лебилра шантала вакил сай, сунела шила дяхІ ва дяхІимцІала сай. «ХІу унра шилизи

аркъухІели, хІечи лебилра ши хІербикІар», —
насихІят бурули саби табасарантла буралали.

ДахъхІила кадизурти гІядатуначилти хабар-
дерхурти шими сари: Кубачи (даргала), ГІянди
(кІарахъала), Балхар (булугунала), Унцукул (кІа-
рахъала). Пергерти къалтинти дирниличил маш-
гъурдиуб табасарантла ва лезгибала дахъал ши-
мира.

Дагъиста гъарил миллатла бахъал поэтунани,
гІялимтани, игитунани, устнани чула шимала ва
миллатла багъа ахъбуциб. Илди — чула шимала
пахру саби.

Шила	Гъалабра буриливан, гъарил шила
цададехІ	дахъал гІядатунни дирар. Шила гІяда-
гІядатунни	тунни хІябал журала сари: чІянкІли
	ил шиличи хаста, ил шиличира мил-
	латличира хаста, ил шилисра Дагъиста лерилра
	миллатунасра кумхати.

Дагъиста шимала адамдешла гІядатуначила
жагали буриб Дагъиста машгъурси поэт Фазу
ГІялиевани:

— «ца дубурланна ужагълизиб цІа кали биалли,
ил ужагълизибад ужагълизи бедлуга» (хъулибад
хъули),

— «ца дубурланнацун бетІула мехІ кали биал-
ли, ил лерилра ужагъунази биур» (хъулрази),

— «жагъил архІяличи дураулхъули виалли, ил
гъунивватес лебилра ши дурабулхъан»,

— «шилизив ца зягІипикалли, арагІеб шили
паргъатдеш хІебургу»,

— «шилизиб бекІа биалли, мекъ яра акІнила
бархІи дурахІебуркІу»,

— «цали усалдеш баралли, илис лебилра шанти диванчиби бетарар»,

— «нагагъ ца игит ветаалли, арагIеб шила байрам бирар».

Дагъиста гъарил миллатла гIядат саби къияндикибхIели, шантани чилра цунни хIелтни, шанти бусягIятал кумекличил музабулхъни, децI бутIес къалабабиркни.

ГIядат сабливан, шантани чула шилизибти цIуръабачи, гIяргабачи, тухумти агарти бухънабачи уркIецIибиру ва гъар шайчибад къайгъилира напакъалира гIеббурцу. Илдигъунтас хаслира дуббуцарла хала бархIи кумек имцIабирар.

Шила гIяхIти гIядатуназибад саби шила къакъурбала умудешличи, хIябрачи, алавчарси вацIаличи хIеруди бирни, гIинзурби, гумурби къулайдирни.

Шила багъа имцIабиру шилизиб кабизурси низам биънили, шилизир пасатIдеш, хъулкидеш, къалмакъар агнили. Нагагъ шанти-ургаб разиагардеш акIалли, илдала ургала, гIядат хIясибли, шила бухънабани, унрубани маслигIятличил бекIбиру, гъунчибуршу.

Дубурлантала гIядатунани арагIеб ши ца уржибси хъалибаргван цабалги хIербиъни тIалаббириули саби.

Гъалар шимазир гъаркъяти ахIенти, вайти гIядатунира дирутири. Илдазирад сари цацабехIадамти лагъла, убяхIси къамлизибад или мучлаагарбирни, «хIила» душмайс гIелабадбиркни. ИшбархIи дагъистанлантани илдигъунти гIядатунигъеч дузахъули ахIен.

СУАЛТИ ВА ХІЯНЧУРБИ:

1. Сегъунти баркъудлумани шила багъа ахъбурцу?
2. Секъяйда вяшикІес гІягІниси дурашав?
3. Гъарил шайчи жамигІятла сегъунти тІалабуни лерал бурая.
4. Шила гІядатуначила кІарахъала поэт Фазу ГІялиевани се белкІуна? Ил мер белчІеная. ХІушала шила царалти гІядатуначила бурая.
5. ХІушала шила багъа лѣбкъяхъути шантачила бурая. Илди хІушаб селизиб гІибратти саби? Школала учІай шила багъа секъяйда ахъбурцу?
6. Пергъиси хабар белчІеная ва пикрибарая.

Рамазан МяхІяммадов

Дурашаб

ГІялира ГІусманра — шилизиб бурибти кІел юлдаш — базарличибад чарбиублири. Рахли илдачи сирмугла зумати къадубала гІеларад белгиагар тІама-гъама чехиб. Жагъилти цаличи ца хІербизур ва къадубазибяхІ дуцІбухъун. КІелра жагъил тамашабиуб: илав илдани чула шан билгІяцІ Къурбан чеиб. Амма билгІяцІла аги миъличиб дягалагъунари: кІел дурашай Къурбан саламатли савцахъилри. ТІяхІ-тІяхІбухъи кІелра юлдаш бирхІутачи чебетаиб.

— ГІурра виркуд хІу нушази, угъраш. ИлхІе-лира хІела нушани шалила лигуби сагадан цацли дуйгІехІе, дибягъ, — урехи чебилахъули кІелра дурашан хІила цІелда ветаурси Къурбайчибад пяхІли бетяхъиб: илдала хъярхъдеш юлдашунала чІумати хункІани гІяхІцад имцІабилахъуб.

Къурбан сай верцахъибтас баркаллаикIес,
чебухъунтас жяргали иргес вехIихъиб:

— Хъунчаби, падахусуни бирар цаличи кIел
чебулхъути.

Къалмакъар Къурбайс дурашантала «мутIрус
гIяхIбизниличибли» дехIдихъибти дуилри. Юлда-
шунани ил тубикIули суктувариб. Къурбайс
сунела шантала занзбигъунти гъай дурашантала
хункIиичир декIли чейгулри. Амма хIяжарлис
сунела шантала хункIалара хIял багъес чебуркъуб:
илини, билгIяцIли, арагIеб ши цIахбарилри.

БархIехъ ил анцIбукъличила гумай вахIбухъун:
«ХIераягу, ца падахусли ши цIахбирули!» «Ил
угъраш шиличи цIудара дамгъа кабалтахъули
ватахIелли, жягIял цалра дурашайзи гъайэс я илала
вахIлизи хIердизес хIедирехIе. Ил нушаб цIахдеш
саби». «Чула жинсли ил тIашхIеалли, жамигIятлис
ил тIашаэс чебиркур».

Юлдашунас илаб «Шантала тур, варгъила
биалра, кабирхIур» — ибси бурала гъанбикиб.

Угъраш виалра, вегIла шан ватахъни багъандан
шантани кIелра юлдаш ганбариб.



ДАГЪИСТА ХАЛКЪАНАЛА ГІЯХІЯЛДЕШЛА ГІЯДАТУНИ

ГІяхІялдешла
къадри

Дагъиста халкъани жявхІейчибад ГІяхІялдешла пергерти ГІядатуна-чибли машгърти саби. 1875-ибил дуслизив Испаниялизивад вакІибси ГІялим В.В. Лиль-Адам даргала ГІяямахъи шила шантани ункъли къабулвариб. Даргантала ГІяхІялдешличи тамашаиубси ГІялимли белкІун: «Хъа бегІтани ну биругІев ункъли валхес къасбариб, бахъал адамтани ну чучи ГІяхІладли живарра».

Булугунала Лахар ва Кара шимази вякъунсилис илабти адамти сунес гъунибаэс хаскабиубли хІядур-бикІули кали бургар или гъанбиркур.

Чедибси Табасарайзибти хъубзурани хІерейс дуббатес хаскабиубли гъунила дубла урдубирхъу: гъункъя дубхІетурли вархъхІеэс.

Чула яра царал миллатла ГІяхІял ахъси дара-жаличив гъарилли къабулирнили адамти, шими ва миллатуни-ургар кагибдеш, бирхауди, гъалмагъдеш, уржибдеш мурхъдиру, халкълизир дигичевдеш, адамдеш, уркІецІичевдеш имцІадиру. Чебиуливан, ГІяхІялдешли шимала жамиГІятуни ва миллатуни-ургар даршути ва талихІчерти ГІямрулис, узити унрадешлис чІумаси хъулчи кабирхъули саби.

Илбагъандан сари ишхІелира Дагъистайзир (архІяличивад вегІла машиналичив яра автобус-личив бархІехълис хъули чарухъес вирукъи) гІяхІял дешла дурхъати гІядатуни пулукІхІедиахъубли ди-хІути.

**Шилизив
гІяхІял
агархІели**

ГІяхІялдешла мурхъси къадри балу-хІели саби дагъистанланти бикІути:
«ГІяхІли хІебашуси юрт мабиаб!»

Дагъиста халкъанани, шилизив гъун-къяла гІяхІял агара виалли, ил ургнила гІядатунира кадизахъур.

ГІяхІял агарси гъункъя бархІехъ шила гумай-лизи лявкъян. Саламра бедили, яхши-хушра дарили гІергъи, илизи гумайла агълули бегІ гъалаб, гІядат хІясибли, шилизив илала гІяхІял левал, хъарбиу. Эгер ил шилизив гъункъяла гІяхІял агара виалли, илис гІяхІялдеш диру ил гумайлизивси вегІла хІур-матла адамли. ИлхІейчибад илди даимлис гІяхІли бетарути саби, сенахІенну, нушала гІядатуни хІя-сибли, гІяхІялла хъулиб беркунси къацІ хъумуртуси ахІен.

Дугелила гІяхІяйзиб сунес дигуси юртла къапулизи къутІдахъес ва гІяхІял сайливан ацІес ихтияр лебси саби.

Магърибла шайчибти кІарахъала ил гІядат бара декІарси саби. Ишав къанси гІяхІял гумайлизи хІешар. Ил сунес дигуси юртлизи айцІур ва дугъаилзан: «Даширая узби детарехІе». Илгъуна гІяхІял ишав гъатІира дурхъасилизи халиру.

Даргала имцІатигъунти шимазиб бузуси гІядат хІясибли, къанси гъункъя сунес дигуси юртлизи айцІур ва хъарбиу: «ХІушаб гІяхІял хІейгив?» Хъа

вегІли жаваб бедлуга: «ГІяхІял хІейгути дуги-хІери мадакІаб».

ГІяхІял кѡбулхІерни халаси цІахдеш саби, илхІелира сунела тухумличи ва арагІеб шиличи бархли чебетисуи.

Дубуртазиб бузуси гІядат хІясибли, мурул хѡулив агархІели, хѡунуй бархІехъ ГІяхІял кѡбулирнила ва дугели гІяхІял кѡбулхІейру, цацадехІти илкѡяйда гІяхІяйзи бурра буру: кѡяйдурти «Хѡулив мурул агара». Илгѡуна багѡана лебхІели, гІяхІял кѡбулхІерни багѡандан хѡунул адамличи чилилра гІяйиб-бируси ахІен. Азирти дусми гѡалаб Дагѡистайзи башути дурала улкнала гѡункѡаби ва гІялимти дубурланта гІяхІялдешличи тамашабири.

Дагѡистайзир гІяхІялдеш даршдусмазир кѡабхІедердили наслулизирад наслулизи дашар. Даргантани ахѡли кѡиматлабиру «бегІтала гІяхІли», «дудешла гІяхІли», лезгибани — «бубайран хѡанахваяр» — «хала бегІтала гІяхІли». КІарахѡала буралалира гІебалкІути наслубази гІеббурули саби: «Халаси гѡунира дудешла гІяхІлира буца».

Дагѡиста халкѡанала гІяхІялдешла гІядатунани тІалаббирили саби, гІяхІял ацІибхІели, хѡулибти абилзни, гІяхІял бегІла хІурматла мерличи катни, гІяхІсигѡуна хѡули хѡураварни, бизисигѡуна хурег гѡалабихѡни, гІяхІя мурад бетерхахѡни. «ГІяхІял хѡулив пача сай», — бикІар кѡумукѡланти.

ГІяхІял хѡули ацІибхІели «ХІу гушлирив?» «ХІу милиглирив?» «ХІу вяргІилрив?» викІуси ахІенну, илис ил сягІят беркала, шин гѡаладирхѡу, янила замана ил ванаси мерличи калта.

Аркъуси гІяхІял шила дубла ветаайчи гъунивалта, ил вацІли вархъхІейу.

БегІтала гІяхІяйзи илала хъалибаргла агиличила, узи-уршиличила, шантачила хъар-хъардыхъес хъа вегІла узи-рузби ва уршби абицІур.

«ГІяхІял юртлизив левхІели, хяличира тІама ахъмабирид», — бикІар дарганти, гІяхІялла уркІиличи вайси хІебакІахъес. «ГІяхІяйс хъа вегІла дяхІ мурталра разили диэс чебиркур», — бикІули саби лезгибира.

БиштІати урши-рурсилира гІяхІялла чус зиланти дурхІначила хъарбиу, дяргІибти шин лерху, дабри умударили, дерахъубли яра гІявадакили кадирхъу.

Чиди миллатла виалра, Дагъистайзив гІяхІял илкъяйда хІурматличил къабулиру. ЦацадехІ шимазиб дуббалтути хъа бегІтани рахли гІяхІял лявкъян или, хурегла пай балта, ил вакІибмад гъалабихъес.

ГІяхІялла хІурматбарни вегІла ши халабарни саби. Даргала халкъла бурала.

Дагъиста халкъанала гІяхІялдешла илдигъунти дурхъати гІядатунисалра хъумартес асухІебирар.

СУАЛТИ ВА ХІЯНЧУРБИ:

1. ГІяхІялдешла къадриличила бурая.
2. ГІяхІял секъяйда къабулируси?
3. ХІушала шилизив гІяхІял секъяйда къабулиру? ХІушала бегІтала чинаб гІяхІли лебал, бурая.
4. ГІяхІял хъа бегІтачив вахъхІи калес, илдази гъатІира гІяхІси хурег дигахъира викІес асубурусив? Сен?
5. ХІуни гІяхІяйс сегъуна гІяхІдеш барири?

ГІяхІял халаварнила,
 Ил чевяхІли чейънила
 ГІяхІси гІядат нушачиб —
 Мурталра ахъдешличиб.

ГІяхІял халахІерибси —
 Шира халахІебиур.
 Шила жамигІятличи
 ГІякъубара гІеббиур.

Девла баян.

ГІякъуба — гІяйиб

Рамазан МяхІяммадов

ГІяхІял

Кепдешли ва хъунуй удикъурти цІали къагъварибси Къурбан ГІябидлизи чумал цІакъти гъай дурес гъалаклири. «Вахъ жявли шайтІайчи мурдамайруд, сабурбара, — жургъбухъун илала бекІлизиб пикри ва гъимила къячІаълумазиб лямцІван кІунбацІиб:

— Сен дила биштІати, сен дила хІехараби вявбарибти? Сен илдази «ХІуша чила дурхІни саррая?» или хъарикІуси? Балахъис нуни илди чила сабил. Сен дила лачинти зигарбарибти? ПисгІебра батурли бургар, мискъилладира бариб биэс, дукелцІиличира хІебихъили хІебатур. ГІяжаибдеш хІебиалли, дурхІни анхълизи букъни! АнхъкІун гъалжанала-мага хІебиэс? Даршал дусла къарис

анхъ, бураягу, селис хІяжатси? Къялуби дячи сари бикІар. Назикти дурги. Илдирә гІур дус сарил ляркъян.

Дила, урибси ХІямидхъала Къурба, дурхІни я вявбирес, я махбирес, я зигарбирес чизиб ихтияр лебси? Юх, ил анцІбукъ нуни гъеч бацІли хІебалтас. Ну илдигъунтала къамлизивад ахІенра.

ГІябидла юртла гъалаб кункси машина рурхІулри.

— Чила саби иш машина? — гъимиличил хъарбаиб илини ГІябидла уршилизи.

— Нушала гІяхІялла саби.

Къурбан хІякизур ва къякъли вяхъибсиван гІелавяхІ чариуб: илала кепдешли дамкъахъурти дагърилизир ГІябидличи гъимиличиб гІяхІялла хІурматбирнила чебла чедибикиб.

— Нуни ил ГІябид бикІуси угъраш кІинайсра чеэс вирус, — сунези сай пурхурухъун ил.

ДуцІли вакІили, дуцІли чарра ухъунси Къурбайчила пикриикІули, ГІябидла уршили ца секІал гъеч аргъес вирули ахІенри: сен хІяжатсири илис нушала хъа гъалабси машина чила сабил, багъес?



БАРСУР КУМЕКБИРНИЛА ГІЯДАТУНИ

**Барсур
кумекла
кьадри**

Дагъиста халкъанала адамдешла гІядатуназибад декІарбулхъули саби барсур кумекбирнила бахъхІила пергерси гІядат. Барсур кумек биру гъарил къияндешлизиб, балагълизиб, хъалибарглизиб, тухумлизиб, унра шимас, царалти миллатунас. Цалис цали кумекбирни гІямрула хІяжатдеш ва тІалаб саби. Барсур кумек бирар адамлис адамла, хъалибарглис — хъалибаргла, тухумлис — тухумла, шилис — шила, миллатлис — миллатунала.

Дагъистайзиб барсур кумек биру къияндешуни ва балагъуни дяхІяхъесцун ахІенну, бегІла гІядатла хІянчи детурхухІелира: арши заманаличир диршес, унхърала сабухъ бурчес, дягІни белшес, юрт басес, далга садерчес, мицІираг белгъес, диъ бицес...

Дагъистайзиб барсур кумек бирни адамла рухІла тІалаб, гІямрула бетуц ва адамдешла лишан бетаурли саби.

Барсур кумек бирнила гІядатунала мурхъси кьадри леб. АнцІубукъ, масала, чила-биалра хІянчи хъараахънилизибцун ахІен. Бархси хІянчили илала лебилра бутІакъянчиби рухІлашал жагатили ва давлачебтили, адамдеш ва уркІецІичебдеш имцІатили бетарахъу. Илгъуна бархси кумекла бузерили

адамти саби-ургаб ва жамигІят имцІали уржахъу, диги, бирхауди, хІурмат-хатир мурхъдиру. Вайдешлис, къясдешлис, кІибяхІяндешлис адамла уркІилизиб мер камбиру.

Илбагъанданра саби Дагъиста халкъанани барсур кумек барнила гІядат ахъли кыматлабируси. Илкъяйда хІяжатси мерличиб адамлис кумек-хІебарнира дубуртазиб цІахдешлизи халбиру.

Барсур кумек Нушала гІядатуни хІясибли, кумекличи хІяжатси адам кумек гІебхІебаахъили валтуси ахІен. Бахъал дубурланти гъа-лакסי кумекличил музабулхъан, хаслира хабара-гарси балагъ (цІала, дягІла, мерсла, хІеркІла) чебакІибхІели. Илдигъунти шуртІразир дагъистан-лантани я чула цІакъани я чула жан дархли ахІе-рахІедиру.

Бахъал адамтала бутІакъяндешличил дархда-сунти мекъ яра къяртІи чуницун дурадеркІесра чисалра гъамадли хІебирар. Илбагъандан илдала бегІтас унрубани, тухумли, шантани хІяжатси кумек гІеббиахъу, илди ваяхІличил, берк-бержличил, къям-къулсаличил бархли гІеббурцу.

Илкъяйда барсур кумекбиру хъуми арцІилизи-рад умударес, юртлис къаркъа гечдарес ва дахъал царалти хІянчурбазиб.

Дагъиста халкъанала барсур кумек бирнила хасдеш саби: къиянти ва декІтицун ахІи, гІядатла ва гъар бархІила хІянчи детурхахъухІелира барсур кумек бирни, жихІеили хъалли кумекличил вашни.

Билхъа дубуртазиб барсур кумек бирнила ца жура саби. Билхъа Дагъиста лебилра халкъанала

леб. КІарахъала илис «гвай» бикІар, — лезгиби — «мел», булугуни — «марша», къумукъла — «булкъа», дарганти — «билхъа».

Билхъа Дагъиста шимазиб билхъаличи жами-
бетурхни гІят, шанти, тухумти гІяхІси кепла
хІяйзиб, байрамличиван разили, цаца-
хІели сагати палтар дархли чегъурли цалабиркур.
Лябкъян त्याмадаби, жагъилти, никІаби. Лябкъян
шадлихъличиван адамлис кумекбарни сунела рухІла
чеблализи халбирули. Илбагъандан илгъуна бузе-
рила шадлихъличир далуйтира зайдулхъан.

Бузерила сабухъчебдеш имцІабиахъес ва ни-
зам биахъес цалабикибтани хІянчилис ца гъуни-
чебиахъан декІарвиру. Илини биалли бирусила гъаб-
гІергъидеш белгибиру, гъар къукъялис хІянчила
дазу якъинбиру. Къиянси мерличи, хІянчи хІярхІ-
диубихІи, кумек бурхъу. Хурег хІядурбирути аш-
чибира сунела хІерудилиуб бихІу.

Дагъиста имцІатигъунти шимазиб билхъаличи
дацІти някъбачил хІебашар, билхъала веГІлис
чараагарли себиалра биху.

Жагъилтас ва гІулухъабас илгъуна хІянчи,
билхъа, бузерила уstadешлацун ахІенну, гъалмагъ-
дешла, узидешла ва адамлис гІяхІдеш бирнилизиб
жамигІятличил цадешла асарчебси ва хъумхІертеси
дарс бетарар.

Билхъачиби Билхъала бегІтани баркалла багъа-
аркъули хъурхІели, адапти арбашес бехІбир-
саби хъур. Гъайгъай, илди баххІебахи,
гушли бархъиути ахІен. Тамашала
сари Дагъиста халкъанала гІядатуни: адапти
билхъаличи бакІиб, билхъала бегІтас савгъатуни

хиб, илдала хІянчи хъараахъур ва саби аркъухІели, билхъала бегІтас баркалла бикІули саби, саби шадси байрамличи жибарибхІеливан. Илдас билхъа чула гІяхІти къиликъуни: серхурдеш, адамдеш, устадеш шантази чедаахъес гІяхІси имкайчи шурбулхъули саби. Масала, юрт балснила билхъа хъараахъур-хІели, билхъачибани юртла бегІтази ишкъяйда гІяхІдеш булгу: «ХІушала юрт мукъри-сяхІбатунала бетааб», «ХІушала юртлизиб баракат каммабиаб», «ХІушала юртлис мурталра шадлихъуни къадар-диаб».

Кумекла шайчиб Дагъиста дубурлантала духуси насихІят леб. «ХІуни кумекбаррив — хъумарти, хІед кумекбарибу — хъуммартид», «ХІела кумекличила антмайрид, хІед барибси кумекличила — гъар мерличиб бура».

СУАЛТИ ВА ХІЯНЧУРБИ:

1. Билхъала сегъуна къадри лебси?
2. Сегъунти билхъаби дурадуркІу хІушала шилизир? Илдазир хІушала бегІтани, узи-уршили сегъунти бутІакъяндеш диру?
3. Дагъистайзир барсур кумек бирниличирли сегъунти хІянчи детурхахъу?
4. Кумекбирнила хІянчи сен шадлихъла аги-хІяйзир детурхутил, бурая.
5. УрхІлис кумекбарес имкан бакІни сен гъарбизлизи халбируси?
6. Аркъути билхъачибала гъай гъандикахъая.
7. Пгергъиси хабар белчІеная. Илини нушази се гІеб-бурулил, никридухъеная.

ХатІала багъа

Дубурла гъярцІа гъуйчиб бугІмани бицІибси уркура, сунечи уркІецидухъахъес дигусиван, язихъли къячІарбикІулри. Уркура ахъси бехІличи гъамбикІесбиб — удибяхІ хІеръадли, урки чирхъбилзан. ИлхІели жагъил хъубзар сунела хатІаличи шакикиб: унци дукІлизир, уркура бицІайчи, дехІсурдарес гІягІнитири. ХІябяркъурси БяхІцІа, бехІлигІиб урухкІули, чедибяхІ хІячІбикІесбяхІиб. Бухъна унц, «Бухъна унци маргъ заяхІебиру» ибси бурала марбарес къайгъилизисиван, паргъатли башулри.

Хъинжличиб гъуни гъатІира къакъабиуб. БяхІцІала урехи имцІабиубли, хъячІъала цІакъдиуб. Рахли, даимти хъячІъала анцІдукъунсиван, бухъна унц гІибкъбизур, ва БяхІцІа кункли гъабгъабасиб. Пякъир унц гъалли бехІла дубла, дяръили руржули, кабикиб.

ГІяхІмадличибад бяргІибси майа чедиберхур: унци кадикибти диалри, илдала лигубиалра дучес хІейри. Илини, цаалра берцахъес или, бухъна унц, тамриг къяббарили, дукІлизибад баткаиб. ГъатІи ГІяхІмадли барес вируси аги, илис къалабаси кумек хІяжатлири.

Жагъил хъубзарли сай гъапулдешлизив сецадхІи калунал, хІебагъур. Лявкъуси адам чеънили ил гъапулдешлизивад тІатІухъахъун. Амма ил ала рази-деш хъярхъли бацІиб — чесайуси гъалавван суне-ни дугІ шайчив гъимукІахъибси ва децІага-

хъибси Мухтар сайри. «Итини наб кумекхІебиру, — лямцІбухъун ГІяхІмадла бекІлизиб усал пикри, — сенкІун итала мерличив ну виасри, ваппабай-гъайла аги каили, хамли шалгІевулхъаси».

Мухтар чесаиб ва, антхІеили, дукІлизибад уркура декІарбарес ветухъун. КІилиналра декІси уркура баткаиб, гІелабахІ хихбарили, гъуни акъубухъахъун.

Илди гъалакли унцличи бетухъун. Мухтарли, дукІ буцили, ГІяхІмад унцла къуйрукъ цІацІабарили, БяхІцІа биругІеб лагбях, битІакІиб. Унц руржули харчбизур, къардкъардбухъун ва, бяхІ-личибад тйдибирули, кІел ганз кацІиб. ГІяхІмад-ли гъигъатур — унц берциб.

Мухтар, хІярп хІеили, шилизивяхІ ватихъиб. ГІяхІмадлис, цІахси танбихІ чекасес чебуркъубли, биса гІянддиркухІеливан гІядаблири. Илбагъандан илини я Мухтарлизи баркалла эс я илала хІулбази хІеризес хІейуб.

«Агъ, сен халаси нигІмат буилил, — пикриикІулри ил, — сайгъунала хІулбази уруз-хІярцІли ахІи, ряхІятли, хІялалли хІерикІес рухІласи ихтияр лебни».

Уркурли биалли, саби мурул адам сабли, нургъби сахаватли чяхІдарили, къаркъала рахІятбиахъес ихтиярагархІеливан, декІси цІумличил дургІелабахІ сунела гъуни даимбарилри.

ГІяхІмад ишхІели урчІемцІали дус виубкъира, ил сунела цаибси хатІаличила гъеч хъумартес вирули ахІен.



ДАГЪИСТА ХАЛКЪАНАЛА ГЪАЛМАГЪДЕШЛА ГІЯДАТУНИ



Дунъяла халкъани Дагъиста камси ванзаличир дахъал миллатуни даршули, узбиван уржили хІер-дирниличи, хаслира гІергъиси замана тамашабирули саби.

Тарихла
цадеш

Дагъиста узити миллатуни жявти замунтазир цабехІ халкълизирад детаур. Дагъиста миллатунала мезанира илди замунтазир Дагъиста цадехІ нешла мезлизирад акІуб. ХІебиалли, Дагъиста халкъанира чула мезанира тухумти саби.

Дахъал миллатунар Дагъиста узити халкъанала гьалмагъдеш ва уржибдеш тарихла цадешла чIумаси хьулчиличи делшунти сари.

Дагъиста ламус Дагъиста халкъанала цадеш дебшла-дирули сари илдала рухIлати цати тIалабунанира — Дагъиста халкъанала ламусли. Ил ламусли тIалаббурули саби бархъдеш, адамдеш, гьалмагъдеш, сунела унрубачил ва миллатуначил даршули хIериъни, илдала хIурматбирни, гIяхIялдеш дирни, гIяхIял царал миллатла виалли, ил гьатIира ункъли къабулварни. Ашкарлигу, дубурлантала илдигъунти гIядатунани, ламусли Дагъиста цадеш гьатIира уржахъу.

Бархдеш Дагъиста халкъани мурталра барх хIербирни гIядат бетаурли саби. Цалра миллатла Дагъистайзибад декIарбиэс тарихлизиб къас биубси ахIен.

Дагъиста дахъал шими бахъал миллатунала вакилти гечбиубли детаурти сари. Масала, лезгибала Курах бикIуси шилизи даршал дусичиб гьалаб булугунала, кIарахъала, даргала, урусла ва гуржи халкъанала вакилти гечбиуб. Илдани Курахлизир чула къатIани акIахъуб. ИшхIелира ил шилизир ишдигъунти тухумти леб ТIухчарар, Цадахъарар, Аварар, Ресар, Гуржияр.

Чумал милатла вакилти гечбиубли акIубти сари Куруш, Чиркей, Мажалис, Ахты, Хучни ва цархIилти шимира. Дагъистайзив гьарил адам сунес дигуси шилизи гечиэс вируси сай. Дагъиста халкъанала гьалмагъдеш чIумадикинилис белгиси сабабли детаур цабахI халкъли итилтала, унрубала мезани далнира. Даргантани чула унруби

кІарахъала, булугунала, къумукъла мезани ункъли дала. КІарахъай дала дарган, къумукъ, чечен ва гуржи мезани. Лезгибани биалли, азербайжантала, рутулла, табасарантла, къумукълантани — дарган, булугунала, азербайжантала, ногъайла мезани.

Мезани дални Бахъал бегІтани чула дурхІни мез да-
гъахъес ва белчІуди касахъес унра мил-
латла шимази бурхъи. Бахъал дубурлан-
ти къумукъ мез дагъес ва бузес диркъаличи баши.

Цали итилла мез далнили миллатуни сари-ургар имцІали уржахъу, илди-ургаб бирхауди имцІабиру. Дахъал миллатунар ва мезанар улкализиб халкъани даршули хІербиънилис ца шартІ саби цали итил миллатла мез руркъни.

Дагъиста халкъани узити биалра, тарихла бу-
хъянси манзиллизир илди-ургар жалани, масъулти ахІекІубли кахІелун.

Жалти ирзни Дагъиста халкъанала духудеш илди-
гъунти жалани ва масъулти даршули
гъуйчидуршес, бекІдирес тяхІурти акІа-
хънилизирра чедиули сари. Халкъли илдигъунти
масъулти ирзнила дахъал тяхІурти акІахъуб: хъя
бирни, чумал адамли хъя бирни, лебил тухумли
хъя бирни, шила жамигІятлизибад авцІали адамли
хъя бирни, ургакъянадеш, маслигІят. Хъя бирусири
Аллагъличи, къуръайчи, хъуна магъарличи.

Дубуртазиб гъайлис, хъялис мардеш бихІни
адамлизиб чараагарли биэс гІягІниси къиликъ
саби. Масала, кІел душман, хъя барахъили, някъби
дуцахъили, даршубаралли, илдала гъарилли гъай-
лис мардеш бихІу, илдала гъариллизиб царалли
сунес вершадеш хІедирниличи чІумаси умут бирар.

Илгъуна саби дубурланна чІумаси гъай. Илбагъан-дан саби Дагъистайзиб бикІути: «Гъай бедирив — къянамайруд». Бедибси гъай бетурхахъни дубур-тазиб чІумаси къанун бетаур.

МаслигІят дурабуркІу хІурматла адамтани, шими яра миллатуни-ургабси жаллизи гъудурхІе-биубти шимала ва миллатунала хІурматла вакил-тани. МаслигІятчибили чеббиркІу бархъти, гІяда-туни ункъли далути, гъайла устадеш лерти, кагибти далилтачил ва мисалтачил веГІла пикри аргъахъес пагъму лебти хІурматла адапти. Илдала хІукму-личи, насихІятличи кІелра шали къабулкадиркур.

Масъулти илкъяйда ирзнилира Дагъиста хал-къанала гъалмагъдеш дебшладиру. Илдала мурхъ-деш имцІабиру унра шимала гъалмагъдешли, къяяндешуназиб барсур кумекбирнили, бахъал гІяхІли лебнили.

ИшбархІила Даршани ва азирти дусми гъалар
аги акІубти ва заманали мардарибти мил-латуни-ургарти гъалмагъдешла, бар-сур кумекбирнила пергерти гІядатуни ишхІелира пулукІдиубли ахІен. ИшхІелла хІякъикъатли илди уржибдеш ва гъалмагъдеш дебадикІахънилис, мур-хъдикІахънилис сагати имканти акІахъуб. ИшхІели Дагъиста дахъал шимира районтира гъатІира да-хъал миллатунар детаурли сари, хаслира диркъа-личи дубурла шими гечдарили гІергъи. Къаягентла районзиб уржили хІербирули саби: минала къу-мукъланти, Мичихичлизибад ва дубуртазибад геч-биубти дарганти, дубуртазир мерсдакъунхІели, геч-барибти миллатунала вакилти. ИшбархІи халкъани-ургарти уржибдеш чІумадирахъули сари

институтуназиб, университетуназиб, техникумтазиб бахъал миллатунала вакилти барх бучИнили, даимлис гъалмагъбиркнили, кІел миллатла хъалибаргуни алкІнили.

Дагъиста вецІалра шагъарра дахъал миллатунар тисари, илдазирти заводуназиб бахъал миллатунала вакилти барх уржили бузули саби, дахъал дерхІанар юртаназиб даршули Дагъиста лебилра миллатунала вакилти барх хІербирули саби.

Нушала лерилра миллатуни чула ихтиюртазир цагъунти сари, ца асил, итил усал миллат агара, сенкІун узби-ургаб чебяхІтира убяхІтира хІебирар. Дагъиста миллатунала гъалмагъдеш ишхІелира гъаларван узити ва чІумати сари. 1999-ибил дуслизиб кІарахъала ва булугунала районтачи чечентала динна угърашуни чебухъунхІели, къияйзи бикибтас гъалакси кумекличил Дагъиста миллатунала бахъал жагъилти ярагъличил итсегІят музабухъун, дубурлантала узидешла хъя сагадан марбирули. Илгъуна саби хІякьикъат.

Амма Дагъиста узити халкъани-ургарти гъалмагъдеш, чІумаси хъулчиличи делшунти диалра, гъарилли нана хІуливан мяхІкамли дихІес чебиркур.

СУАЛТИ ВА ХІЯНЧУРБИ:

1. Дагъиста халкъанала тарихла цадешличила бурая.
2. Дагъиста халкъани-ургарти гъалмагъдеш чІумадикинилизиб дубурлантала ламусла, мезани далнила къадри сегъуна саби?
3. ХІушала шилизиб, райойзиб сегъунти миллатунала

вакилти хІербирули? Илдачилти бархбасуни сегъунти диэс
гІягІнити? Сен? Илдазибад хІуни чис кумекбарири?

4. ГІергъиси хабарли нушази се гІеббурули?

ГІ. Абу-Бакар

Нушала узидеш

Се сарти нушала узидеш, нушала гьалмагъдеш?
Нушала узидешличил цугдуцести мисалти алавчарси
тІабиГІятлизирра дахъал чедаэс вирар. Дигалли
дуцІрумлизиб вавнабяхъибси дубурличибси диркъа
кася. Сецад лерал илар цаличи ца бекІлил мешули
ахІенти, чучицун хаста ранганачилти, цаличир
ца жагати, бизили тІемдикІути вавни? Гъарил
вава, гъарил бухъала сунела ранганачил, сунела
хасдешуначил жагаси бирар, тІабиГІят биалли
лерилра илди рангани жагали далдикахъни-
личибли, уржахъниличибли гъатІира давлачебли
бирар.

Нушала узидеш, жагаси, хаслира Дербентла
пагъмучебти устнани бершибси къалтинничилра
цугдуцес вирар. ХІердизирая ил къалтинничи
— адамла дагърили сецад рангани акІахъублил
илар, чум гІянд лерал илар гІур декІархІедикесли
дархдасунти някъишуни алкІахъути, тѣп зурхІябван
ухули бирар илгъуна къалтин, адамла хІер кайсу-
ли, гІямру жагадирули.

Узидеш — илди давлуми сари, узидеш — ил
цІакъ саби, узидеш — илди чебяхІси мурад сари,
узидеш — илди ишхІелла бегІлара пасихІти ва
гъайбатли зайбикІуси далай сари.



ВЕГІЛА МЕЗ — ДУРХЪАТИ МЕЗ

Дагъиста
мезани
акІни

Дагъистайзир, гъалабра буриливан,
дахъал миллатуни хІердирули сари.
Илбагъандан нушала ВатІан дахъал
мезанарра саби: чум миллат диалра,
илдицад мезанира дирар.

Амма жявли, чумал азир дус гъалар, гІя-
лимтани бурни хІясибли, Дагъистайзир цадехІ мез
дуили сари. Даршани дусмала бухІнаб цацабехІ
адамти, къамани тјйдити мер-мусаличи гечбиуб,
уб калунтазибад къяббердили яра илди ургарти
бархбасуни гІяхІцад хІярхІдиахъубли. Илбагъандан
даршани дусмала манзиллизир илдала мезаназир
дарсдешуни дакІудиуб, илкъяйда багъла-багълали
шимала лугъатуни акІуб.

ГъатІира даршани дусми ардякъун. ЦацадехІ
лугъатуни, чузирти декІардешуни имцІадикІули,
мурхъдикІули, ахирра сагати мезаначи шурдухъун.
Илкъяйда Дагъиста нешла мезла ца лугъат дарган
мез бетаур, гІурилти — кІарахъала, лезгібала,
булугунала, табасарантла ва дахъал царалти меза-
начи шурдухъун. Ил сабабли Дагъиста халкъанира
мезанира узити, тухумти сари. Дагъиста мезанала
тухумдеш ишхІелира дахъал дугъбазиб чебаэс
вирар:

даргала:	булугунала:	кІарахъала:
ца	ца	цо
кІел	кІива	кІиго
бецІ	барцІ	бецІ

ГІялиментани кабизахъни хІясибли, дарган мез 5
азир дус гьалар лерли дуили сари.

Миллатла ИшбархІи дунъяличир гІялиментани 3
мез азирличир имцІати мез дейгІи сари.
Амма дунъяла лерилра мезаназир
дегІла дурхъати ва черяхІти вегІла нешла мез
диъниличи сегъунтилра ташмишдеш агара.

Дагъиста гъарил миллатла мез миллатла дахъал
наслубани акІахъубти, давлачер ва жагадарибти,
махІкамли нушачи даахъибти мез сари.

«ВегІла мез къацІлис дирцути ахІен», —
насихІят бурули саби жявхІелла наслубани
ишхІелла жамигІятлизи. ИшбархІила дубурлантас
урус, гІяраб, Англияла мез далес хІяжатбиркули
саби. Илди мезани яшавлис сецад хІяжатти диалра,
чула дурхъадешла даражализир нешла мезличил
гъеч цугхІедиркур. Илдигъунти мезлис дарганти
«къацІла» мез бикІар. Ил шайчиб пикри ца биэс
чебиркур: урхІла мезани ункъли далес, вегІла мез
дебали дигахъес ва махІкамдирес.

ГІямрула къисматли адам чина арукалра, вегІла
нешла мез гъеч хъумартес асухІебирар. Дагъиста
миллатунала пахрули биубти поэтутани нешла
мезаначи диги чула дахъал белкІаназир чедаахъиб.
Лебил дунъялис машгъурси поэт Р. ХІямзатовли
нешла мезличила ишкъяйда белкІун:

Нагагъ жягІял дила мез детихъути диалли,
Иш ну хІядурли сайра ишбархІи хІябла керхес.

Дарган мез Дарган мез даргала дахъал наслубани
акІахъубти даргала миллатла мез сари.

Дарган мезлизи даргантала лерилра
наслубала дагъри, гІякълу кадерхурти сари.

Дарган мезлизир лер хІулби черасес хІейрути
даргала дубуртала гІянтІикІа вавнала тІемра, хІяна
хІурхъала дяхІила умудешра, янила дугІбала
къяркъдешра, нешли уршилис бучІуси лайлала
малхІямдешра ва дигила мурхъдешра, нушала
ахъанайтала кагибдешра, дубурла варачантала
хъярхъдешра, даргала дуцІрумла зурхІябла
ранганира, даргантала дахъал наслубала уркІурбала
чІума-дешра, сахаватдешра.

ВегІла нешла мезличи мурхъти диги агарси
адамла вегІла ВатІайчира диги сяйти ва чедихІяртти
дирар.

Дарган мез даргала миллатла рухІла культурала
мягІничебси бутІа сари.

ЦархІилти миллатуналаван, дарган мезра
даимси хІяракатлизир сари: 1. сагати дугъби
алкІули, 2. цацадехІ дуркъдирули, камли дузанти
детарули, 3. царалти мезаназирад дугъби гІерисули.
Дарган мезлизирти духънадаибти дугъбала камси
сияхІ гІергъиси кІапІилизиб леб. ГІергъиси
замана дарган мезлизир ишдигъунти дугъби акІуб:
назмучи, хабарчи, (поэт, писатель), гъанкІхана,
дурхІнихана, ятимхана, арадешхана, табтархана
(библиотека), белкІчи (автор), рагъам (роман,
гъалабла дев сагаси мягІнализиб пайдалабарили

саби), мискъиллади (сатира, гъалабла дев сагаси
мягІнализиб пайдалабарни) ва цархІилтира.

Мезра мицІирти жангъунти сари.

ГІялим
дарган
мезличила

Дарган мез руркъути бахъал гІялимти
леб. Илдазибад саби МяхІяммад-Ся-
гІид Мусаев, Албури ГІябдусаламов,
ГІялибег Сулейманов, Амирбек Къа-
дибяхІяммаев ва цархІилтира. Илди дарган мезлис
чула гІямру ва пагъму дедлугути адамти саби.
Гъайгъай, мез руркъуси гІялимла мезличила пикри
имцІали бархъси ва чебетаибси бирар.

ГІямрулизивад жявли арякъунси гІялим
МяхІяммадшапигІ Писаевлира дарган мезличила
духути ва учІанна пикри битІакІести гъай дуриб:

«Дарган мез даарила къадар давлачертира сари,
даарила къадар мягІничерти, кагибти, малхІямти,
цІакъти, зайдикІути, уркІилизи алтІути, чули асар-
барести дугъбазирад цаладикили сари.

Нушачи хъарси ца саби: илди мезра ванзара
нушази нушала хала бегІтаниван умули ва гъатІира
давлачердарили, черяхІдарили, нушала чеалкІуси
наслулизи даахъес».

Ил — нушала гъариллизибад дигахъуси саби.

СУАЛТИ ВА ХІЯНЧУРБИ:

1. Секъяйда акІубти Дагъиста мезани?
2. Сен Дагъиста мезани тухумти сари? Ил марбарес
жузлизирти мисалти дурая.
3. Дарган мезли лебилра даргантала наслубала гІямру,
дагъри, культура алавдуцибти сари ибси пикри хІушани се
къяйда иргъулрая?
4. Мезли адамла дагъриличи сен асарбирусил, бурая.

Дугьбала кьисмат

Тамашала саби мезлизиб цацадехІ дугьбала кьисмат! Удир гьандушибти дугьби гьалар дарган мезлизир тІинтІли дузахъи. Амма гІергъити 40-50 дус мезлизиб илдала жигарчебдеш хІярхІбиуб, цараван буралли, илди дугьби духънадаиб. ИшбархІи нушала гІямрулизир дарсдешуни кадиркухІели, илдала кьисмат сагадан бехІсурбиуб: илдазирад имцІатигъунти «мицІирдирес» дехІдихъиб:

адабият — литература
азан — акбар
жумла — предложение
идара — управление

мактаб — школа
машрикъ — восток
мугІяллим — учитель
санагІят — промышленность

инкылаб — революция
магъриб — запад
маданият — культура

тарих — история
шигІру — поэзия
шыгІир — поэт

Ражаб Адамадзиев

Нешла мез

Нешла мезла дугьбала
Гьалаб икрамбирулра,
Илди дила адабла
Хазнаван халдирулра.

Чузир лерни багъандан —
Неш, узи, рузи, ВатІан...
Жан дедесра хІядурти
Нуша сарни багъандан.

Наб дила дарган дугъби
Закир урмиван дирар:
Пикрумала бархибдеш
Шалабирули бирар.

Чузир лерни багъандан —
Мардеш, гъаламагъдеш, дигай...
Сари дихІес цІакъани
МяштІхІедируси инсай.

Наб лерил дарган дугъби
Далайван жагадилзан,
ГІяхІбаркъличи жидикІес
Кадизуртиван дилзан.

Дерхъаб, викІус, нешла мез,
Бургъаб нарт ва гІянтІикІа.
Дарган дугъбала далай,
Гъари, уртахъ, битІакІа.



ИЛДАНИ ДАГЪИСТАН МАШГЪУРБИАХЪУБ

Даршани
дусми
гъалаб

Даршал дус гъалав Дагъистайзи вакIиб-
си ца урусла гIялимли дебали тама-
шаиубли белкIун:

«Дагъистан дунъяла къакъличиб
бегIла дахъал дубуртар мер саби».

Амма Дагъистан гъарли-марли машгъур-
бияхъубти ахъти дубуртала дахъдешли ахIенну,
дубурланта гъабзадешли, гъунартани, устадешли,
бузерили, адамдешли ва гIяхIялдешли саби.

250 дус гъалаб дурала улкалан гъармука Надир
шагъличил Дагъистайзиб къяркъси ва хIила дергъ
бетерхур. Надир шагъла хIуреба дарбадягъинбарибти
булугунала ва гIяндалалла гIяхIгъубзнас бекIдеш-
дарибтири булеги Сурхай ханни ва илала урши
МуртузгIялини. 250 дус халкъли илдала уми
хъумуртули ахIен.

18-ибил дуршдусла цаибил байхъайзиб урусла
цIуба пачала гIярмияличилси дявлизир дакIуда-
рибти гъабзадеш багъандан кIарахъанти ХIяжи-
мурад ва Шамил лебил дунъяли багъур.

Дагъистан мурталра гIяхIгъубзнала ВатIан
сабри.

Дагъиста
мургъила
зубарти

Фашист гъармукабачилси 1941-1945
ибти дусмала ВатIа ЧехяхIси дергъли-
зирра дубурлонтани даршани дусми

гьаларван чула гьабзадешличил Дагъистан маш-
гьурбиахъуб. 50 дагъистанлан Советунала Союзла
Игитла хІурматла уличи лайикъбикиб. Илдала
лугІилизиб Дагъиста гьарил миллатла вакилти леб:
МемухІивадси мухІен МяхІяммад ХІяжиев, Сумен
Къурбанов, къумукълан Эльмурза Джумагулов,
лезги Валентин Эмиров, булеги Аметхан Султан ва
цархІилтира. Илдани чула жявхІелла хала бегІтала
дявила гьунарти чедицІахъиб. ИшхІелла дусмазибра
чумал дубурлан Россияла Игитла хІурматла уличи
лайкъбикили саби. Илдала михъиртачирра мургъила
зубарти пархдухъун.

Дагъиста устни Дубуртазиб чула тамашала пагъмули
Дагъистан машгьурбарести устни гьалаб-
ра лебтири, гьаннара леб ва челябкъла-
лизибра бирар.

Кубачила устнала мургъи-арцла сихІрула ва
хІулбала хІер чебасес хІейэсти ваяхІли Америкала,
Данияла, Японияла, Францияла, Польшала, Болга-
рияла, Кубала халкъани хІяйранбариб.

Дунъяличир хабардерхахъур мургъила някъбар
Балхарла тІалхІяна диранти, гІяндила варгъни
диранти, Унцукулла урцуйзирад ваяхІ диранти,
Табасаранна къалтинти диранти устнанира.

Дагъиста машгьурдеш Дагъиста лебилра
миллатунас машгьурдеш саби.

Поэтуни, делхъчиби Дагъистан жявхІелла дусмазибал пагъ-
мукарти адамтачил давлачебсири. Да-
гъиста пахрули бетаурти адамти гьарил
миллатла бахъал лебти саби.

Ил сияхІла бехІбихъудлизив гьанушес вира
хабардерхурси дарган далайчи, урибси гъайла уста
Пямарла Батирай.

Дагъиста литературала ахъанайти саби лезги Кочхюрлан СягИд, къумукълан Ирчи Къазакъ, кIарахъан МяхIмуд ва цархIилтира.

Дагъистан машгъурбирахъули саби нушала ишхIелла литературала вакилтанира.

КIарахъан Расул ХIямзатовла шаласи пагъму лебил дунъялис машгъурси саби. Илала назмурти ва поэмаби дунъяла дахъал мезаначи шурдатур.

Дунъяла дахъал улкназир дучIули сари дарган ГIяхIмадхан Абу-Бакарла хабуртала жузира. Илала белкIани хIясибли 8 художественный фильм кадихьиб: «Гъагултани зак бархъбалтули саби», «ДяхIила мекъ», «Адам ва ХIява», «Дила риганайлис духури», «Кубачилан кулехала дигIяндешуни» ва цархIилтира.

ШуцIали дусличир гьалар къумукълан ГIялим-Паша Салаватовли делкIунти пьесаби Дагъиста театртани ишбархIира чедиахъули лерал.

1934 ибил дуслизив урусла писатель Максим Горький лезгибала поэт Сулейман Стальскийличил тьянишиубсири. Илини хъарбариб: «Ишдигъунти адамти мяхIкамбарая».

Урус мезличил лукIули калунси булеги Эффенди Капиевла белкIани ишхIелира лебил улкализир даимси иштяхIличил дучIули сари.

Лебил Россияла бучIантачи даили сари ногъайлан Кулунчакова Бийкела назмуртала жузи.

Дагъистан машгъурбияхъуб макъамти ва накъра лукIанти булегуни Мурад Кажлаевли, Ширвани Чалаевли ва цархIилтанира.

Царалти улкни ва миллатуни-ургар Дагъистайчила хабардерхахъур дубуртар улкала далай-

чибани ва делхъчибани. «Лезгинкала» делхъчибани дунъяла дахъал улкни хІяйрандариб. Бурибти делхъла устни дунъяла гъар миллатли иштяхІличил къабулбирули саби.

Мушлукъяби Даршани дусми гъалаб Дагъистайзиб хабардерхурти мушлукъяби биру-тири. Дунъяличир детурхути декІар-декІарти абзаназир чула ВатІан Дагъистан чебяхІбирули, дахъал сархибдешуни диахъуб дубуртар улкала лебилра миллатунала бахъал мушлукъябани: дунъяла шуйна гъавкъяна кІарахъан мушлукъя ГІяли ГІялиев, сунес БецІхан бикІуси кІарахъан мушлукъя МяхІяммадхан ХІямзатханов, дарганти къаркъа иргънила шайчивси гъавкъяна ГІиса ГІялиев, мушлукъяби МяхІяммад ГІязизов ва Бузай Ибрагъимов, боксер НурмахІяммад Шанавазов, къумукъланти мушлукъяби узби Насруллаевхъали, лезгиби-мушлукъяби Руслан Ашуралиев, Арслан Аллахвердиев ва бахъал царалтира.

Нушала гъалабла ва ишхІелла бахъал гІялим-тани дунъяла дахъал улкназиб Дагъистайчила хабардерхахъур.

Даршани дусми гъалаб Дагъиста гІялимти ва пи-крикарти ГІярабунала машрикълизиб балутири.

ГІялимти Пагъмукар гІялим сайри дарган ГІяли-бек Тахо-Годи, сайра 1925-1937 ибти дусмазив МяхІячкъалализив ва Москвализив узули калунси.

Дагъиста машгъурдеш имцІабарибти гІялимтала лугІилизиб леб академик ХІябибулла Амирханов, академик Рашид Аскерханов, академик Ибрагъим Шамов, тарихчи Расул МяхІяммадов, Сакинат

ХІяжиева, ХІяжи ХІямзатов, МяхІяммад-СягІид Мусаев ва бахъал царалти Дагъиста миллатунала вакилти.

Лезги гІялим Закидин Рамазанов гъанна чумал дус Америкала ца университетлизив узули сай. Иллини урус, Англияла, Швецияла, Испанияла мезани ункъли дала.

Нушала ВатІан — «ахъ дубуртар Дагъистан» машгъурбирахъути гъубзни, гІялимти, мушлукъяби, поэтунни, устни дебали бахъал лебти саби:

Дубуртачивра ахъси.

Виаб гъар адам ахъси.

Марлира, ил – адамла талихІ саби — сай сунела ВатІан машгъурбияхънила ахъси даражаличи айкни. Хъумартес асухІебирар: адамдешла илгъуна ахъанайличи гъуни дурхІядешлизибад бехІбирхъур. ХІед ил гъуйчир халати гъарбизуни дѳаб, хІела лерилра гІяхІти къасани детерхаб. Илди детурхар къасличил учІадли.

Дугъбала баян.

ШигІру — поэзия

машрикъ — восток

гъавкъяна — чемпион

СУАЛТИ ВА ХІЯНЧУРБИ:

1. Дагъиста машгъурдешличила бурая.
2. Чили машгъурбариба Дагъистан? Ил шайчир хІушани далути уми дурая.
3. ХІушала шилизив, райойзив Дагъистан машгъур-бияхъубти гІялимти, мушлукъяби, поэтунни, игитунни, делхъдалайла устни яра царалти санигІятла адамти лебу?

ЖУЗЛИЗИР ЛЕР

Ассаламу гІялайкум, хІурматла учІан	3
1. Нушала ВатІан	6
2. Дила Дагъистан	12
3. Дила дахъал миллатунар Дагъистан	18
4. Дагъиста пачалихъла бехІбихъуд	23
5. Дагъиста насаб	28
6. Инсаниятла культура	33
7-8. Дагъиста халкъанала культура	36

АДАМДЕШЛА ГІЯДАТУНИ

9. Адамла культура	42
10. Кайзурси адам	46
11-12. Дубурлантала ламус	50
13. Ули адам жагаирули сай.....	56
14. Убихъгъуна ветаахъес дигули.....	60
15. Адамли сунела у жагабирули сай.....	67
16. Салам бедлугнила къяйдурти.....	71
17. Саламла жураби.....	75
18. ХІу бегІтази ва тухумлизи дугъаилзулри	80
19. Адамлизи хІурматличил дугъаилзен.....	87
20. ГІяхІдеш сен булгуси.....	92
21. Чизи ва секъяйда гІяхІдеш булгуси.....	96
22. Гъайла адаб ва абадла гъай	101
23. Хъалибаргла гІядатуни.....	106
24. Хъалибаргла чебла	112
25. Тухумдешла гІядатуни	117
26. Тухумла чеблуми ва тухумла хІурмат	122
27. Унрадешла гІядатуни	127
28. Шанти ва шила гІядатуни.....	132
29. Дагъиста халкъанала гІяхІялдешла гІядатуни.....	138
30. Барсур кумекбирнила гІядатуни	114
31. Дагъиста халкъанала гъалмагъдешла гІядатуни	150
32. ВегІла мез — дурхъати мез	156
33-34. Илдани Дагъистан машгъурбиахъуб	162

Магомедов Рамазан Магомедович

КУЛЬТУРА И ТРАДИЦИИ НАРОДОВ ДАГЕСТАНА

Учебник для 4 класса

на даргинском языке

Редактор *П.Ю. Кадиева*

Художник *М.И. Аджимурзаева*

Художественный редактор *М.Ш. Муталлибов*

Технический редактор *Р.Ю. Буттаева*

Корректор *А.С. Исмаилова*

Сдано в набор 07.02.2008. Подписано в печать 26.02.2008.
Формат 70х90 ¹/₁₆. Бум. офсетная № 1. Гарнитура SchoolBookC.
Печать офсетная. Усл.п.л. 12,28. Уч.-изд.л. 6,61.
Тираж 6020 экз. Зак. № 19698 (П-Гз).

ООО «Издательство НИИ педагогики»
367000, Махачкала, ул. Леваневского, 4.

Отпечатано в ОАО «Смоленский полиграфический комбинат»
214020, г. Смоленск, ул. Смольянинова, 1.



ООО “Издательство НИИ педагогики”

КУЛЬТУРА И ТРАДИЦИИ НАРОДОВ ДАГЕСТАНА

Учебник для 4 класса на даргинском языке